



H. VII. 37.

Ph.

•

980

Ph

o

980

P. BALDUINI WURZER

MONACHI CISTERCIENSIS IN ANTIQUISSIMO ET EXEMPTO ASCETERIO B. V. MARIAE
DE ALDERSPACH PROFESSI

PHILOSOPHIA REGULARIS

SIVE

SYSTEMA PROBLEMATICUM

DE

PHILOSOPHIA IN ASCETERIIS REGULARIBUS TRADENDA


CUI INSERTAE SUNT

POSITIONES EX UNIVERSA PHILOSOPHIA

QUAS

ALTEFATUS AUTHOR IN PUBLICA EXERCITATIONE DISCUTIENDAS
PROPOSUIT

C. P. S.



RATISPONAE, SUMPTIBUS JOANNIS LEOPOLDI MONTAG. 1769.

Multi quidem philosophantur; at nulla habita ratione finis: aliter qui ad
Iurisprudentiam civilem; aliter qui ad medicinæ scientiam; aliter qui
ad Theologiam aspirant, manuducuntur: Nostrum fuit, Philosophiæ
Candidatum sistere ad limina Theologiæ.

DAN. HUETIUS *in Præfat. de Concord. verit. nat. cum supernat.*



RELIGIOSO LECTORI ΦΙΛΟΣΟΦΩ.

S. P.



Magni profecto moliminis opus ag-
gredior; cum præsens *Philosophiæ*
Regularis Systema Problematicum
tam illustri politissimarum litera-
rum ætate publici iuris facere con-
tendo. Non enim me latet; quid nominis,
quid rei sit, esse Philosophum ad genium no-
vaturientis huius seculi elaboratum: ubi pulso
Peripateticorum veterino, excussoque Schola-
sticorum pulvere mentis humanæ acies plus
ratione, plus experientia, quam autoritate
Magistri, in cuius verba iurare aliquando san-
ctum



ctum habebatur, sapere addidit. Verum longe absum, ut rudem hunc novitii ingenii partum oculis tot illustrium virorum subiiciam, qui non sine magni nominis gloria e publicis cathedris Cartesii, Gassendi, Newtoni, Wolfii &c. placita numerosis auditorum coetibus suggerere, & animo non nisi mathematicis disciplinis prius exculto in intima veritatis, et naturæ adyta penetrare consueverunt. Religiosos solum convenire mihi liceat Philosophos, quibus intra domesticos parietes ea delata est provincia; ut iuvenes suos confratres per familiare biennii spatium in studio philosophico exercitatos reddant. His itaque viris doctrina non minus, quam religionis zelo conspicuis præsens problema discutiendum appono: *Qualis Philosophia, quæve philosophandi methodus tyroni religioso expediat in ordine ad subsequens studium seu theologicum, seu iuridicum?* Nemo enim ignorat: in claustris regularibus nulli datum esse in solo studio philosophico conquiescere; sed potius hoc persoluto iuvenes Clerici iis applicantur illico disciplinis, per quas ad augendam Ecclesiæ, ac S. ordinis utilitatem, & promovendam cum propriam, tum proximorum salutem expediti evadant. Ansam problematis huius ad manus dederat insignis tractatus de studiis monasticis R. D. Joannis Mabillonii monachi Benedictini: cuius viri præclara in rem literariam merita immortalibus fastis



fastis iamiam adscripta nulla ætas, nulla invidia oblitterabit. Superfluum mihi videtur, ea in præsentiarum retexere, quæ profundissimus ille cænobita de cultu, perfectione, ac emendatione studiorum monasticorum copiosa non minus eruditione, quam discreta ascesi ibidem differit. cum nullus dubitem; quin omnes didascalici religiosi insigne hoc volumen sedulis dudum extriverint manibus. Eapropter illa solummodo ex hoc fonte depromere laboravi, quæ ad resolutionem alterius problematis facere iudicaveram. An mentem celeberrimi huius viri vel a longe affecutus sim? aliorum esto iudicium: lubens me ferulæ censoriæ submitto. Neque iniuriam mihi inferri autumo, si quis malefactam forte levidensis huius opusculi œconomiam despexerit: dummodo benevolæ mentis conatum sibi non displicere fateatur.

In magnis etenim voluisse sat est. Vale!
et fave.





DISSERTATIO
HISTORICO-CRITICA
DE
NECESSITATE, UTILITATE, ET
QUALITATE STUDII PHILOSOPHICI
IN ATHENAEIS MONASTICIS.



Quemadmodum artes nunquam caruere
osoribus, ita nec disciplinis philosophicis
defuit unquam quoddam infensum ge-
nus hominum, qui odio pene vatiniano
exagitati easdem ad ultimam usque Thulen exulare ius-
serunt. Hos inter in prima certe acie collocandi veni-
rent Acataleptici, Pyrrhonic, Scepticique antiquiores
una et noviores (*): qui, sicut omnem veritatis in-
venien-

(*) Inter recentiores Scepticismi præprimis incusantur
D. Hieron. Hiernhaim Abbas Præmonst. Dan. Hue-
tius, et Lockius. Hos posteriores tamen vindicat
Anton. Genuen. in Dissert. de Scepticismo.



veniendæ viam aut penitus concisam, vel non nisi summe arduam esse somniabant; sic omnem quoque in rerum naturæ Philosophiam existere pernegantes, de rebus universis dubitandum esse fatis frigide argutabantur. Verum vix amplius illos confutatione dignos esse autumo: cum quotidianus sanæ rationis usus, sensuumque palpabilis experientia maleferiatos hosce fycophantas obmutescere iubeat, nisi vel pleno meridie cæcutire velint: prout lepide non minus, quam solide illis Poëta (*) apud Cl. Anton. Genuen. illudit. nempe

*Nil unquam insanius esse,
quam sapiens Pyrrhonis de grege: fluctuat anceps
qui omnibus in rebus, quidquam nec repperit, in quo
sit potis incertos animi sedare tumultus;
effutiens quæcunque hic sunt, sensusque lacessunt,
aut animæ assensum eliciunt: aut reiiciuntur
omnia, res prorsus veras non esse, sed umbras,
queis, velut a spectro, timet usque illudier. an non
dignus et hic mane, et sero cui verbera centum
per caput, et circa saliant latus? - - - -
- - - - nam ratione carere
is se dum probat, et veri nihil esse, potestne
veri per se ipsum quid noscere? si queat, ultro
vera dari fateatur oportet: si negat a se
dignosci; et quinam verum suadere valebit
esse mihi id, quod ait?*

At, dum pro aris et focus philosophicis in claustris regularibus exstruendis dimico, longe alii hostes expugnandi mihi obveniunt: illi nimirum solitarii plerumque seneciones, qui, nescio, an pia simplicitate decepti, an zelo minus iusto sufflammati erectas in cœnobiis

(*) Marchio Spiriti in epistola ad Franc. Danielelem apud Anton. Genuen. T. I. Element. Met. ad calcem P. I.



exedras philosophicas fus deque vertere laborant, tanquam totidem lapides offensionis disciplinæ monasticæ, morum corruptellas, doctrinæ asceticæ exterminia, vanæ ambitionis asyla, iurgiorum, ac æmulationum Seminaria. En crimen! quod brevibus gyaris, aut carcere dignum reputant. En caussam! quæ non paucos etiam literatorum Religiosorum animos in partem sequiorem abripit. Neque existimet quisquam, frivolas me fundere querelas, aut cum umbraticis non nisi adversariis manus conferere velle, quos ægræ mentis insomnia cadmeæ adinstar segetis parturivere. Nondum enim adeo immemoriali distamus intervallo ab illa temporum serie: cum solitarii quidam monachi excepta SS. codicum, PPumque lectione, ac meditatione non modo Philosophiam, sed et omnes literas humaniores in coetibus religiosis ex integro suffocare statuerunt: cuius perduellionis vel hodiedum hinc inde complices offendimus.

Classicum fere primus occinuit in Gallia Reverendissimus Abbas Trappensis (*): qui evoluta Tractatu de studiis monasticis, quem circa annum 1691. famigeratissimus D. Joannes Mabillon Benedictinus e Congregatione S. Mauri idiomate gallico, maximo cum applausu divulgaverat; nescio, queis conscientiæ stimulis impulsus susceptum recens de promovendis studiis monasticis negotium, *rem plenam periculi*, et *vulnus toti ordini monastico inflictum* compellare attentavit. Hinc, ut impendenti exinde monachorum ruinæ paternæ quidem providus, at plus iusto sollicitus consularet; lauda-

(*) Rev. ac illust. D. Armandus Buthillier de Rancè. Vir in seculo præclaris ad Philologiam præsertim græcam pertinentibus ingenii monumentis editis a prima adolescentia notus. notior adhuc a promota reformatione Trappensi. ut pluribus in eius vita refert P. Pet. le Nain.



laudato Tractatui Responsiones suas publica itidem luce donatas opponere aggressus est: in quibus nimio fortasse zeli ardore consumtus palam asserere haud dubitavit. *Scientias monachis prorsus nocere, illorum corda pervertere, eos lethaliter afficere, atque illud pietatis, simplicitatis, et puritatis fundamentum diruere, cui adhaeret illorum sanctificatio. Regulam, regularitatem, constitutiones, disciplinam, atque ædificationem ibi excidisse, ubi constituta sunt studia, spiritum orationis scientia aboleri, et humilitatem labefactari. Principatus, et Principes occasione studiorum iis fraudari adminiculis, quæ olim apud solitarios sibi comparabant; populos vero destitui exemplo, atque ædificatione, quæ in universam redundabat Ecclesiam (*)*.

Nemo fane in actis literariis elapsi primum sæculi adeo peregrinus erit, ut ignoret; quantas turbas Abbatis Trappensis Responsiones inter monachos Benedictinos, et Cistercienses concitarint. Neque enim diu intra septa solitaria hæc litigia delituere: quin imo in aprium tandem devoluta non Eruditorum modo, sed et Illustrum animos in unius, aut alterius partis patrocinia rapuere; ut de restituenda inter religiosos hosce dissidentes concordia pene conclamatum esse videretur. quemadmodum prolixè quidem, sed satis fideliter D. Vincentius Thuillier in Historia dissidii huius literarii (**) meminit.

Verum nunquam ego animum eo appuli, ut novam studiorum monasticorum apologiam ordiar contra adversarium sicut profapia, ita et eruditione ac pietate

A 5

illu-

(*) Ipsissima verba D. Abbatis Trap. apud Mabillon: in proloq. Animadvers. in Resp.

(**) Exstat hæc Historia in pede distarum animadversio-num Mabillonii, edit. Venet. de anno 1745.



illustrem. Longe felicius enim conatibus meis praelu-
 sit laudatus saepe Joan. Mabillonius, cum in ipso tra-
 ctatu de iisdem studiis, tum in Animadversionibus, quas
 Responsioni Abbatis Trappensis solida simul doctrina, et
 mira prorsus animi moderatione opposuit. Profecto
 gravissimis rationum momentis ibidem commonstratum
 deprehendimus: proficuum oeconomiam, quæ in mo-
 nachorum sodalitiis ab initio stabilita fuit, vix subsiste-
 re posse absque studiorum subsidio. neque sine scien-
 tiarum adminiculo eas obtineri dotes, quæ tum mona-
 chis ad statum clericalem, tum monachorum Præpositis
 ad perfectum regimen subeundum necessariæ censentur.
 imo non ultimam ruinæ status monastici causam existi-
 tisse defectum studiorum, et amoris literarum. Atque
 ut Cl. Author maiorem asserto suo fidem conciliaret, pro-
 lixo huic rationum apparatui longævam monachorum
 tum in oriente, tum in occidente traditionem subiun-
 git, qua aperte docet: omnis generis studia in asceteriis
 non solum continua praxi priscis patribus indulta, sed
 et iugi industria exculta fuisse; neque tantum inter mo-
 nachos Benedictinos, aliasque S. familias, sed inter ipsos
 etiam Cistercienses: prout luculenter apparet ex tot tan-
 tisque lucubrationibus præstantissimorum virorum, quæ
 vel publica iamiam luce fruuntur, aut in domesticis
 Chartophylaciis digna adhuc veneratione asservantur (*).
 Ipse ego ad receptam hodie in omnibus familiis regu-
 laribus, et plus quam centenaria præscriptione firma-
 tam assuetudinem provoco. Ipse ad saluberrimas cu-
 iusvis S. ordinis constitutiones appello, in quibus nun-
 quam non studiis monasticis summa sollicitudine provi-
 sum

(*) Videatur R. D. Caroli de Visch Bibliotheca Scriptorum
 S. Ord. Cisterc. Utinam assurgeret de gremio Cister-
 censi Vir, qui inchoatam semel alteri auctoris pro-
 vinciam ad nostra usque deduceret tempora.



sum esse legimus (*). Præsertim, cum singuli fere coetus religiosi non unice eum in finem congregati sunt; ut solitariae proprii Spiritus tranquillitati insudent: sed insuper, et vel maxime in hodierna providentia, ut bonum Ecclesiae, proximique utilitatem omnimodis promoveant; quod utique sine iugi studiorum exercitatione nequaquam fieri posse, exploratum habemus. ut adeo tam severa, tam tetrica D. Abbatis Trappensis opinio (quod mihi fas sit loqui inviolata tanti Viri memoria, et reverentia) ad meram speculationem referenda videatur, quam nec ipse quidem ad praxin deducere dignatus est: sed solum monachos iuxta ideam perfecti solitarii per eam instituere adlaboravit (**); quod tamen a genio præsentis ætatis toto quasi cælo alienum esse, vel obvius noverit.

Id itaque ad præsens munus meum pertinere existimo: ut studii præsertim philosophici necessitatem, una et utilitatem in sodalitiis regularibus pari rationum pondere commonstrem. Quamvis enim ad unum pene omnes in præsentis rerum providentia decretoriae Mabilionii sententiæ mecum adstipulentur: non nulli tamen consilio, et desiderio Cl. huius Authoris satisfieri arbitran-

(*) Ita providit capitulum nationale Ord. Cist. sup. Germ. an. 1654. Rothvillæ celebratum dist. 6. c. 1. de distributione temporis sect. I. et II. longe vere clarius capitulum Nationale anno 1733. Cæsareæ coactum, ubi Distinct. 12. n. 2. et infra in extractu litterarum Ill. P. Gen. n. item 2. conclusum est, ut in Congregationis Monasteriis alieni scientiarum Professores ad docendum non admittantur: sed duntaxat S. Ordinis nostri Profess. n. 4. autem eiusdem dist. cuilibet D. D. Abbatum liberum relinquitur, ut pro suis, vel in suo monasterio studium instituat, vel Ingolstadium, aut alio eos ire iubeat.

(**) Ita censet author Historiæ dissidii literarii superius iamiam laudatus.



trantur, si missis philosophorum scitis, velut sterilibus verborum tricis, nugisque mechanicis (ut erudite quasi calumniantur) dociles religiosorum animi sobriæ theologiæ, iurisprudentiæ canonicae, ac historiæ ecclesiasticæ studio occupentur. Qua in parte nec ego ab illis discedo, attamen rotunde pernego: scientiis hisce utiliter, et pro dignitate animum adiici, nisi quis prævie disciplinis philosophicis initiatus fuerit.

Necessitas autem scientiæ huius in ordine ad capefendas altiores literarum facultates ex ipsissima eiusdem natura relucere videtur. Neminem enim fugit: Philosophiam recepta fere ubivis terrarum definitione appellari *scientiam rerum divinarum, et humanarum, causarumque, cur eiusmodi res ita se habeant, fiant, ac fieri queant*. Ex quibus verbis sane perspicuum redditur: eo ipso Philosophiam ad omne genus scientiarum tutissimam sternere semitam; eo quod universa earum obiecta, quantumlibet inter se diversa sint, ex integro discutiat. Ob hanc ipsam vero obiectorum varietatem in diversas quoque partes Philosophia cepit distribui, in *Logicam* videlicet, *Metaphysicam*, *Physicam*, et *Ethicam* (*). In singulis tamen hisce partibus aut solo rationis naturalis lumine, aut iusto sensuum criterio, vel utroque simul tam multiplicia scientiarum obiecta attingi necesse est: ut adeo Philosophia nunc *Rationalis*, nunc *Experimentalis* salutarî mereatur. Iam videamus, qua utilitate, et necessitudine Religiosi in enumeratis Philosophiæ partibus occupentur.

DE

(*) His moderni Philosophi addere solent *Mathesin*. an merito? et qua ratione? infra pluribus discutiemus.



DE LOGICA.

Principem facile in Philosophia rationali locum sibi vendicat *Logica* seu *Dialectica*, sive *ars cogitandi*, et *differendi*, de cuius munere pendet; ut rationem, iudiciumque in sapientiæ studio regat, formet, & augeat: mentem humanam ad investigandam, cognoscendamque veritatem dirigat, variisque præceptis ita imbuat, ut ad omnes reliquas scientias facilius, feliciusque addiscendas expedita reddatur. Iure enim quasi hæreditario a Maioribus transmissum accepimus quoddam veritatis studium, incensumque omnia sciendi, ac penetrandi conatum. Hinc intime nobis conscii sumus: ingenitam mentibus humanis facultatem cognoscitivam iugi indies meditatione & cogitatione exerceri. verum manca ut plurimum, et imperfecta hæc facultas hæret, nisi aliunde excolatur, et perficiatur; quemadmodum et omnes alias facultates naturales perfici oportet. iuvatur autem, et perficitur subsidiis *Logicæ*, seu *dialecticæ*; utpote, quæ iuxta statas leges, ac regulas nos ita facultate cognoscitiva frui edocet, ut citra erroris periculum ad veritatem penetremus, talique uti sermone, qui ad communicandam cum aliis veritatem aptissimus censetur. Huius scientiæ necessitatem dudum perspectam habuit Præstes Hipponensis, cum adversus Academicos (*) eiusdem excellentiam his verbis deprædicat: *Hæc docet docere, hæc docet discere, in hac se ipsam ratis demonstrat, atque aperit, quæ sit, quid valeat: scit scire, sola scientes facere non solum vult, sed etiam potest.* Porro eandem ob rationem Philosophorum Princeps jam olim *Dialecticam* velut *Organum scientiarum* summis extulit encomiis: quoniam sicut harmonici concentus anima est organum, ut illo obmutescente aut omnino emoriatur

(*) l. 2. c. 13.



riatur reliqua fidium, vocumque gratia, vel aures offendat melos absonum,

ut græcas inter mensas symphonia discors:

sic sublata Logica, velut unico veritatis organo reliquus scientiarum chorus aut turpiter conticescet, aut inglorie balbutiet. *Ars igitur quædam necessaria est, quæ sit directiva ipsius actus rationis, per quam scilicet homo in ipso actu rationis ordinate, faciliter, et sine errore procedat, et hæc est ars Logica (*).*

Præprimis autem Dialecticæ, seu Logicæ notitia SS. Theologiæ, ac iurisprudentiæ studio rite comparando infervit. *Disputationis namque disciplina (quam utique ad Dialecticam referri nemo ambigit) ad omnia genera questionum, quæ in literis sacris sunt penetranda, et dissolvenda, plurimum valet (**).* Imo quidquid perversorum dogmatum est, et putatur esse robustum in terrena sapientia, hac arte dialectica subvertitur (***) . Eapropter videmus, Theologos ad unum fere omnes non minus ad eventilandas scholarum argutias, quarum usus prioribus seculis frequentissimus erat; sed insuper ad roboranda fidei dogmata methodum non nisi legibus dialecticis conformem adhibuisse: cui excolendæ, ac consolidandæ cumprimis patrocinator artificium syllogisticum, ipsis etiamnum sectariis formidabile (****). Neque etiam Eruditio historica, seu sacram, seu profanam

(*) D. Thom. 1. 1. Poster. lect. 1.

(**) D. Augustin. 1. 2. de Doct. Christ.

(***) S. Hieron. Præfat. in Ezechielem,

(****) Hinc infelix prætensæ reformationis antesignanus Mart. Lutherus in epistola ad Jodoc. Isen. data ita monet. *foris relinquendus est omnis syllogismus (si nimirum Religionis negotium agitur) non aliter, ac Abraham sacrificaturus reliquit pueros cum asinis.*

nam spectes, Logicæ adminiculis destituitur: etenim sobrias non minus, quam solidas *artis criticæ*, ac *hermeneuticæ* regulas pro destinanda veri, aut falsi tessera Logica subministrat (*); ne prona mentis humanæ levitas vel nimia credulitate, vel insana pertinacia in avia, et devia ignorantie præceps eat. Dialecticam vero iurisprudentiæ insuper suppetias ferre ipsimet fatentur viri clarissimi, quos in utriusque Themidis foro præcellentis doctrinæ fama conspicuos veneramur; qui profecto miseratione potius, quam refutatione illos censent dignos, qui neglectis philosophorum scholis, ac spretis artium adminiculis ad Iureconsultorum facultatum pulpita sese convertunt. Cum tamen ipsæ *leges nunquam velocius percipiuntur, solidius intelliguntur, peritius tractantur, melius habentur, quam cum in Philosophos inciderint* (**).

DE METAPHYSICA.

Alteram rationalis Philosophiæ partem constituit *Metaphysica*, quo nomine non quidem doctrina *μετα τα φυσικα*, seu *post physica* pertractanda, sed scientia *super physica* indigitatur; quæ res a materiæ commercio abstractas, corporeaque mole solutas contemplatur. Cum vero res aut sola intellectus operatione, aut ex ipsa naturæ conditione abstrahi concipiuntur: eapropter præsens disciplina distribui solet in

B Onto-

(*) De regulis artis criticæ consuli profecto meretur l. 3. 4. & 5. Artis logico-criticæ Cl. Ant. Genuen.

(**) Ita sæpius ad suos dixisse fertur D. Arnoldus Rath, per novem lustra in alma Anglipolitana iurium Professor celeberrimus: prout contestatur Cl. F. Theophil. Frähamer in stimulis &c.



Ontosophiam, *Ætiologiam*, et *Pneumatologiam* (*). Prior omnium fere nostrarum cognitionum principia, ac bases respicit: eoquod in considerandis primis rerum ideis, *Entis* nimirum, *substantiæ*, *accidentis* &c. harumque affectionibus generalibus occupatur. Altera earum rerum causas, ac existentiae origines pertrahitur. Tertia tandem de iisdem entibus in specie differit: nempe de spiritibus, quos ex ipsa natura a materiæ commercio separatos esse scimus. Et quidem posterioris huius metaphysicæ partis notitiam præprimis cuilibet Religioso necessariam esse ipsa obiectorum præstantia commendat. DEI etenim, Angelicorum Spirituum, Mentisque humanæ naturam (quantum lumine naturali vacat) *Pneumatologia* perscrutatur; invictoque rationum robore in Atheos, Polytheos, Pantheistas, Deistas, Spinozistas, Materialistas, Libertinos, similesque huius furfuris blaterones invehitur, quos non nisi rationis naturalis dictamine, ac illustratione redargui oportet, cui utique sprete, vel potius everse sanctiori revelatione, elusisque Religionis cuiusque momentis thraſonice non minus, quam malitiose innituntur.

Tristi profecto experientia docemur: ob defectum sobriæ *pneumatologiæ* tot immania *fortium Spirituum* (ut vocari amant) emerſiſſe monſtra, quæ ruptis pietatis compagibus non ſolum ad omnem vitæ licentiam absque rubore ſubeundam ianuas, poſtesque aperuere; ſed etiam in decretoriam humani generis perniciem coniuraſſe videntur. Quid etenim boni ſperandum ſupereſſet ab hiſce luxuriantis ingenii thraſonibus, qui DEI tanquam ſupremi entis exiſtentiam, aut

(*) His non pauci annumerant *Cosmologiam*, ſeu, doctrinam de mundo metaphyſice conſiderato: ubinam vero ea nobis collocanda videtur, inferius patebit.



aut existentis providentiam, ac veracitatem fugillare conantur? qui mentem humanam classe spirituum extorrem succisa præmii æviterni spe, aut poenæ æternum duraturæ horrore pulso immortalitate attentant spoliare? quasi vero hominum, et iumentorum unus foret interitus, et æqua utriusque conditio? Expallefceret haud dubie, velut visa gorgone ad præsentem rerum faciem Abbas Trappenfis; si tam sereno (si superis placet) literarum ævo SS. codicum textus, PPumque effata, in quorum tamen lectione, et meditatione Monachorum studia sita esse contendit; vel penitus eludi, vel ausu profano in avia, et devia pro cuiusvis placito detorqueri redivivus conspiceret. Concludendum itaque reor cum Cl. Ant. Genuen. (*) Metaphysicam omnino necessariam esse; utpote cui reliquæ scientiarum disciplinæ famulantur, suaque principia ab illa mutua accipiunt. Quod tum in omnibus scientiis verum experitur, tum verissimum in iuris naturæ, et Theologiæ studiis: ita, ut risui pateant, qui animo nondum metaphysicis ex culto iurisprudentiæ naturalis, et rerum divinarum scientiam affectant.

DE PHYSICA.

A Metaphysica tandem ordine passim recepto digredimur ad *Physicam*, seu *scientiam rerum naturalium, præprimis corporearum*: eoquod princeps illius obiectum sit corpus naturale, qua naturale; cuius originem, essentiam, affectiones, vires, variosque status modo in genere, modo in specie contemplatur. dubium certe vix superest; disciplinam hanc argumenti dignitate celebratissimam, varietate rerum iucundissimam, et foecunditate sua utilissimam esse. Sane mundus hodiernus novam, quam præferebat, faciem Phy-

B 2

sicæ

(*) T. I. in Prolegom. ad Elem. Metaph.



ficæ debet; cuius ope innumera naturæ, ac artis phænomena in lucem protracta scimus, quæ alias profundissimis ignorantiae tenebris obvoluta ad hunc usque diem delituissent. Neque tamen meris usibus profanis, aut explendis solum curiositatis humanæ desideriis Physica præsto est: quin imo per eam in mentibus nostris excitatur altissima DEI Cognitio; cuius utique patentissima simul, et occultissima providentia, ac omnipotentia in minimis æque, ac maximis sese admirationi nostræ quaquā versum obiicit. Finis namque sinceræ physicæ est: ut DEum creatorem, quem ex creaturis evidenter cognoscimus, insuper glorificemus, et ita rerum naturalium cognitioni studeamus, ut promicantem ex singulis divini opificis præsentiam veneremur, potentiam admiremur, sapientiam adoremus, bonitatem deamemus.

Quis itaque inficias ibit, monachos disciplinis physicis utilem prorsus locare operam, quæ utpote ad tam prudentem finem diriguntur? id quidem non abnuo: neque nexum, neque necessitatem illarum ad iurisprudentiæ, aut Theologiæ facultatem tantam esse, quantam in Dialectica, ac Metaphysica deprehendimus. interim tamen turpis profecto vel maxime in hodierna providentia censendus esset in Religioso illius scientiæ defectus, cuius pertractatio antiqua iam civitate gaudet, ac obiecta illius quotidiana utique, et obvia esse videmus. Porro cavendum esse consulo: ne iuvenes religiosi, dum nimium scitis physicis delectantur, evanescant in cogitationibus suis, et ambulent in mirabilibus super se; sicque immatura curiositate dementati mentis aciem ad aliud virile eruditionis genus capeffendum hebetem, ingeniumque vagum reddant. quod tamen salvo meliori cuiusque iudicio dictum volo.



DE ETHICA.

Integrum denique totius Philosophiæ apparatus concludit *Ethica*, seu *Philosophia moralis* dirigens actiones humanas ad veram beatitatem, velut ultimum vitæ nostræ finem. Ordine licet postrema sit isthæc Philosophiæ pars, ceteras tamen omnes utilitate, et excellentia altius antecedit. In huius scientiæ gratiam studium omne suscipi oportet, inque eam desinere. Quid enim emolumentum ex integra philosophia caperemus, si rerum extra nos positarum scientia poleamus, ea tamen, quæ officii nostri sunt, et sine quibus viros probos esse non datur, negligamus, aut penitus ignoremus? Dolendum profecto! quod satis multi artium liberalium Magistri, quibus tradendæ philosophiæ munus demandatum est, in unica intellectus humani cultura conquiescant, de voluntate parum solliciti: cuius tamen vel maxime interest, ut inter bonum, et malum eligat; ut verum bonum a spurio discernere discat. etenim

*Omnibus in terris, quæ sunt a gadibus usque
auroram, et gangem pauci dignoscere possunt
veræ bona (*)*.

præsertim, cum interdum fallit vitium specie virtutis, et umbra, et plerumque nitimur in vetitum, cupimusque negata.

Promptissimam vero voluntati operam in tali negotio *Ethica* exhibet; utpote quæ de actibus humanis, eorumque principiis sive internis, sive externis, de conscientia, de variis animi passionibus, earumque causis, ac effectibus, de pravis, rectisque habitibus, de vitiis, ac virtutibus, de legibus in genere, ac præ-

B 3

primis

(*) Juvenal. Sat. X.



primis de lege naturali (*), de universalibus principiis, ex quibus quoad maximam partem prudentia dependet, moresque ad honestatem componuntur, solide non minus, ac eleganter differit. Tam nobilem certe argumentorum farraginem quisquis curatius pensitaverit, de utilitate profecto, necessitate, ac præstantia Ethicæ dubius esse vix poterit, et maxime in asceteriis regularibus; in quibus utique longe perfectius honestatis studium, ac potior vitæ morigeræ ratio attendenda est. — Eam ob causam Cl. Mabillonius (**) vel maxime ad rem facere iudicat: si insuper Philosophiæ morali adiiciantur quædam regulæ ad vitam socialem conducentes, per quas Religiosi honestatem, modestiam, alternamque urbanitatem colere discant, frivolas suspiciones eliminant, temeraria iudicia evitent, odia restinguant, et opportuniora quæquæ media ad pacem, fraternamque charitatem fovendam adhibeant.

Reponent forte non nulli: hæc, et similia abunde colligi posse ex libris asceticis, et vel maxime per decursum annui tyrocinii, ubi alias Viri timorati, ac discreti, qui novitiarum plantationum curam gerunt, juvenes animos ad consuetum in qualibet familia regulari vivendi genus manuducunt. Novi illud perbene: at cum eiusmodi instructio methodo ut plurimum ascetica, ac theodidactica institui, sed nec tunc quidem ob temporis angustias pro dignitate pertractari soleat: minime alienum videtur, si congeniti luminis ductum insecuti naturali quoque ratione doceamur, ad quænam officia erga DEum, erga proximum, ac nosmet ipsos obstricti simus. Præcipue autem illi ipsi morum, ac
vitæ

(*) De hoc argumento iure prorsus denuo legi meretur laudatus sæpe Anton. Genuen. T. 4. Element. Metaph.

(**) Tract. de stud. Monast. C. IX. n. III.



vitæ religiosæ magistri Ethica opitulante clientum suorum genios, propensiones, passiones, passionumque radices penitus inspicere, et congruam adversus animi languores medelam propinare valent. Quodque procul dubio maiori fructu, ac emolumento præstabunt; si prius sese ipsos iuxta sobrias moralis philosophiæ leges agnoscere, ac in officio continere didicerint; ne, dum aliis monstraverint viam, sibi semitas ignorent. Prima quippe, et inter antiquos dudum declamata morum regula est: Γνωθὶ Σεαυτον. *Nosce te ipsum.* neque inconsulto poëta (*) olim monuisse legitur.

- - - - - *Te ipsum*

Concute, num qua sibi vitiorum inseverit olim natura, aut etiam consuetudo mala.

Has igitur scientias disciplinæ philosophicæ complectuntur; quarum utilitas, necessitudo, ac nexus non minus cum theosophia et iurisprudencia, quam aliquocunque eruditionis genere vel obvie contuenti luculenter fatis apparet. Audiendus proinde non est D. Abbas Trappensis (**), cum omne studium philosophicum in claustris solitariorum inutile esse, et magnæ illorum depravationi occasionem præbere contendit. Existimat equidem illustris hic solitariae vitæ zelotes: Religiosum nullatenus egere scitis philosophicis ad efformandum sobrium ratiocinium, aut destinandam veri, falsique tesseram; si aliunde author naturæ accuratum, ac rectum ingenium, serenamque contulit rationem (***) . quasi vero has ipsas naturæ dotes magis, magisque perfici necessum haud esset? ne turpi otio emarcescentes

B 4

tes

(*) Horat. l. i. Sat. 3.

(**) Verba D. Abbatis refert Cl. Mabillonius in Animadvers. ad Respons. Art. XVI. n. II.

(***) In Respons. ad Tract. de stud. Monast. C. IX.



tes ad consequendum finem ab authore naturæ pro-
bilitum non sine culpabili cum sacræ, tum profanæ
reipublicæ detrimento inertes evadant. Nonne in si-
mili providentia hodierni Politici iustas prorsus quere-
las effunderent, qui indies tot, et tanta naturæ dona
statui (ut aiunt) erepta monasticas intra solitudines se-
peli criminantur? Nonne dolendum, si

- - - *ingenium ingens*

inculto latet hoc sub corpore ()*

monachum induto, quod aptis alias excultum literis et
sibi, et aliis prodesse valeret? rei huius indignitatem
dudum persentiscens S. Mater Ecclesia per effatum con-
cilio Viennensis (**) fanciit: ut in quolibet Monasterio
Solitariis tradantur *scientiæ primitivæ*. quarum nomine
Benedictus XII. *Grammaticam*, et *Philosophiam* intelligi
asserit; nimirum, ne monachis proficiendi in scientia
via desit.

Frustra insuper confugit D. Abbas ad illa Apostoli
verba: (***) *Videte nequis vos decipiat per philosophiam,*
et inanem fallaciam secundum traditionem hominum, secun-
dum Elementa mundi &c. etenim nemo non videt Aposto-
lum

(*) Horat. l. I. Sat. 3.

(**) Apud Mabillon in animadvers. ad Responſionem
Abb. Trap. art. X. fatetur præterea D. Abbas Auguſt.
Calmet in Præfat. ad Comment. Litteral. in Reg. S.
Benedicti n. XXXVI. Nihil conciliis, et ſummis Pon-
tificibus, imo et Principibus magis curæ fuiſſe: quam
ut literarum ſtudia in clauſtris flourerent, et omni co-
natu excolerentur. cum hac ratione exulat a clauſtris
otioſitas, et Eccleſia afflictiſ ſeu perſecutionis, ſeu
ignorantiæ temporibus adverſus hæreticos, et fide-
lium hoſtes a Monachorum doctrina, et eruditione
præcipua accepit auxilia.

(***) Ad Coloff. 2. v. 8.

lum in his verbis solum insurgere adversus Sophistas, aliosque Logodædalos, qui ex abusu dialecticæ meris fallaciis fidelium mentes circumvenire laborarunt; aut fanaticos illos genethliacos, astrologos, geomantas, hydromantas, pyromantas &c. qui casuum, eventuumque naturalium scaturigines ab Elementorum temperie, fatalique astrorum influxu repetebant; quasi vero omnis in aspectabili hoc universo providentia, ac ordo nil aliud esset, quam

SyduS, et occulti miranda potentia fati ()*.

Hoc ipsum vero Philosophastrorum vulgus manibus, pedibusque fugiendum esse etiam hodie sanior hominum pars omnimodis persuadet. Ea tamen de causa, quod non nulli disciplinis philosophicis turpiter abusi fuerint; nullus profecto diiudicabit: sobriam quoque earum usurpationem penitus prohiberi. quemadmodum (vel ipso D. Abbate iudice) nemo SS. scripturarum lectione, ac usu interdicitur; eo quod antiqui non minus, ac noviores hæretici deliriorum suorum patrocinia ex iisdem S. codicibus postulaverint. *alioquin pro Patria miles armandus non erit, quia contra patriam non nulli arma sumserunt (**)*. tollatur ergo abusus Philosophiæ, & servetur bonus usus. quo servato, insignia prorsus emolumenta nullo non tempore in cœtus regulares non minus, ac in omne genus humanum ex Philosophia promanare fatebimur; ut adeo non immerito cum Tullio (***) exclamare liceat: *O vitæ Philosophia dux! o virtutis indagatrix, expultrixque vitiorum! quid non modo nos, sed omnino vita hominum sine Te esse potuisset? Tu urbes peperisti. Tu dissipatos homines in societatem vitæ convocasti - - - Tu literarum, et vocum communionem iunxisti. Tu inventrix legum, Tu Magistra morum, et disciplinæ fuisti.*

B 5

Verum

(*) Juvenal. Sat. 7.

(**) S. Augustin. l. I. contra Crescon. c. 2.

(***) l. 5. q. q. Tuscul.



Verum altior modo difficultas illustranda venit: quænam videlicet illa sit Philosophia, cuius usus religiosi Clericis ad subeundum SS. Theologiæ qua dogmaticæ, qua moralis, ac utriusque iurisprudentiæ studium necessarius, et proficiuus videatur? dixi studiose: *quænam Philosophia*. Nam etsi scientia hæc naturalis in se simplicissima sit, ac latissime pateat; pro varia tamen ratione, qua a præstantissimis viris nullo non tempore exculta, statisque legibus velut in corpus quoddam congesta est, ipsa quoque in multiplices *sectas*, seu scholas dividi, diversasque cepit appellitationes nancisci. Sic percelebris olim iactabatur in ipsis prope cultioris Philosophiæ incunabulis secta dogmatica sub Thalete Milesio, et Pythagora per Ioniam, Italiamque diffusa, Secta Academica sub Socrate, et Platone, Peripatetica sub Aristotele, Cynica sub Antisthene, Cyrenaica sub Aristippo, Megarica sub Euclide, Eliaca, Stoica, Epicurea &c. pluresque aliæ, quarum numerum vix inire licet. At operæ pretium nullatenus me facere existimo; si describendis talismodi sectis, earumque ancipiti fortunæ prolixius immorer, quarum vix obsoleta nomina (nisi Peripatum excipias) hodie in fastis literariis civitate fruuntur. Magis ad præsens institutum facere mihi visum est; si ad nostra solum accedamus tempora, solcite perquirentes: quisnam hodie frequentior Philosophiæ cultus obtineat? Et sane, vix alia philosophandi ratio inquirentibus occurrit nisi *vetus*, et *nova*, seu (ut dialecto vernacula loqui assuevimus) *die alte*, und *neue Philosophie*. Ad priorem refertur Peripatus in *sectam Scholasticam* transfusus: posteriori annumerantur Recentiores, Neotericique omnes, qui *sectæ Eclecticæ* nomen dedere. Expedit profecto, ut utriusque factionis philosophicæ genesin, ac momenta curatius expendamus: forsitan facta tali rerum indagine multa offendemus, quæ ad præsens systema problematicum pertinere videntur.



DE PHILOSOPHIA SCHOLASTICA.

Philosophiæ Scholasticæ natales ex secta Peripatetica repetendos esse, nullus me hercle ambigit. Postquam enim Arabes sub exitum seculi octavi in Africa, et Hispania rerum potiti essent; complura illico instituta fuere gymnasia, in quibus Aristotelis Philosophia arabice reddita publice divulgari, et omnimodis foveri cepit: eo quod barbaris istis facundum Platonis differendi genus displiceret; atque e diverso subtilis, ac præcisus Aristotelis stylus magis arrideret. Illustrata subinde in hisce gymnasiis Philosophi huius doctrina per varias, præsertim Averrois, et Avicennæ commentationes (*), in finitimam primum Hispaniæ Galliam, tum Italiam, et alias denique Europæ provincias mira celeritate devoluta literatorum animos adeo fascinavit; ut missa Philosophia Platonica, quæ antiquissimis antea Patribus frequens fuisse creditur, ad unum pene omnes sese Peripateticos faterentur (**). Inde factum est, ut ad initium seculi decimi tertii Aristotelis libri in alma Universitate Parisina maximo cum applausu publice prælegi ceperint; et quidem methodo Arabibus familiari, subtili videlicet, et contentiosa, cui ad maximam partem suppetias attulit festivum ratiocinandi artificium per syllogismos, quod suomet ex ingenio Stagyrita depromsisse legitur. Atque hæc disputatrix, et contentiosa philosophandi ratio, eo quod

(*) Observat tamen Cl. Bruckerus apud P. Hauser in Introduct. Hist. ad Philol. Philosophiam Peripateticam a commentatoribus obscuratam magis, quam illustratam fuisse. cum opera Aristotelis adeo per versiones, et commentationes corrupta fuerunt, ut ex græcis bonis facta sint latina non bona, ex latinis malis, Arabica pessima.

(**) Fusius hoc, et sequentia pertractat Cl. Joan. Lau-noius *De varia Aristotelis in Academia Parisina fortuna.*



quod in *scholis* publicis, inter multas licet fortunæ vi-
ces ad nostra usque tempora usurpata sit, *Scholastica*
tandem ubivis locorum nuncupata est.

Recens erectus in Scholis Peripatus cura, et studio
præstantissimorum illa ætate virorum Abælardi, Petri
Lombardi, Petri Hispani, Alberti Magni, Alexandri
Alensis, aliorumque mirum in modum efflorescere, ac
propagari cepit, ita quidem, ut reliquis pene omnibus
Philosophorum sectis exilio multatis (*) solus in quietâ
possessione persisteret, et in universis scientiarum Athe-
næis iura daret. Nunquam vero Peripatus magistrum-
phasse legitur, ac dum ex Parisina Academia eodem se-
culo decimo tertio tres prorsus illustres scholasticorum
sectæ, *Thomistarum* videlicet, *Scotistarum*, et *Nomina-
lium* emerferunt. Thomistæ duce Divo, et Angelico
Doctore Thoma Aquinate, viro in sacris, et profanis
scitis profundissimo gloriantur. Scotistæ antesignanum
reverentur Joannem Dunz, a patrio solo *Scotum*, a
præstantia vero doctrinæ, ingeniique perspicacia *Docto-
rem subtilem* compellatum. Nominales tandem (sic dicti
ab excutiendis solummodo vocibus, rerumque concepti-
bus, quos velut obiectum Philosophiæ præsertim ratio-
nalis statuerunt; cum e regione Scholastici *Reales* indo-
lem potius, et naturam rerum, quam voces, steriles-
que conceptus discuterent) authorem, seu potius restau-
ratorem profitentur Guilielmum de Occam alias sub no-
mine *Doctoris singularis*, vel *Authoris invincibilis* perce-
lebrem. Videtur tamen hæc secta cum suis cultoribus
penitus interiisse, nihilque nisi merum nomen postero-
rum

(*) Aristoteles etenim more Ottomanorum, regnare
se haud tuto posse putabat, nisi fratres suos omnes
contrucidasset. Ita Baco de Verulam: de Augment.
scient. l. 3. c. 4.



rum curiositati transcriptum fuisse (*). Cum interea Thomistarum, Scotistarumque placita ad præsentem usque diem in celeberrimis regularibus familiis plausibiliter divulgantur; imo etiam præstito, ut aiunt, in verba Magistri iuramento summa pertinacia, et haud impari fastu literario propugnantur.

Sectam Peripatetico - scholasticam primis saltem temporibus insuper amplexati sunt Doctores ex inclyta Societate JESU, inter quos eminere Eximius Suarez, Vasquez, Amicus, Arriaga, Toletus, aliique innumerari; qui ex aratis divite vena multiplicibus commentariis Stagyritæ doctrinam illustrare aggressi sunt. Unde contigit, ut interdum a consueta Angelici, aut Subtilis Doctoris interpretatione discederent, et viam quasi mediam capefferent. quod tamen summa semper et ad genium inclytæ huius Societatis composita modestia factum est. Magna præsertim veneratione Laudati Patres in D. Thomam feruntur; a quo hinc inde quidem ob domesticæ cuiusdam opinionis complacentiam non nisi *cum reverentia* recedunt, illius tamen mentem, et verba pro virili in partes suas pertrahere laborant; haud aliter, ac si Doctor Angelicus in ipsorum favorem oracula eructasse censendus foret (**). Verum hæc ipsa Recentiorum (hoc enim nomine præfati Doctores e S. J. compellari volunt) in S. Doctorem propensio, velut pomum Eridos mutuam partium quietem ex templo sustulit. cum Thomistæ, et cum primis viri ex sacra D. Dominici familia per celebres, iurati utpote Angelici Doctoris assemblæ literaria Zelotypia ustulati doctrinam huius S. Scholarchæ

(*) Nominalium doctrinam accurate describit R. P. Franc. Marazzanus S. I. Italus Ariminensis.

(**) Nemo sane ignorat, R. Res a Thomistis omni prorsus ætate in præcipuis quibusdam, et ad Characterem utri-



larchæ sibi solis vindicarent, purissimosque eiusdem doctrinæ latices e publicis cathedris sese propinare iactarent, alios e regione non nisi aquas turbidas, aut depravatos, vel omnino spurios fontes in Auditorum animos derivare, elato interdum supercilio contenderent. Atque inde inter utramque sectam scaturire occepit

- - - *vetus, atque antiqua simultas,*

immortale odium, et nunquam sanabile vulnus ()*.

Hinc mordax illud, et acerbum scribendi genus obtinuit, quo inter sese velitari consueverunt: cum integra schediasmata ad maximam partem non nisi salibus felle suffusis, popularibusque interdum convitiis referta prelis committunt; et veritati sese litasse arbitrantur, si in iisdem æmulos suos robusta talismodi eruditione illiberaliter dedolaverint. Hinc contentiosa pariter disputandi methodus familiaris evasit in publicis exercitationibus, quarum sub auspicio iuxta inveteratum Scholasticorum morem, nisi ampullas, et sesquipedalia verba proiecerint, certe mutuo sese in consuetis invitationum, et responsionum formulis ridicule, et plus quam comice traducere gestiunt. tandem, cum ad ipsum syl-

utriusque Sectæ pertinentibus sententiis ab invicem dissentaneos fuisse: quales sunt. *de possibilitate in- et extrinseca entium. de formali, et causali futuritione. de veritate propositionum de futuro. de famosa Prædeterminatione physica &c.* et tamen pars utraque de patrocinio Angelici Doctoris satis confidenter gloriatur. Magnus igitur nobis Apollo erit, qui in tanta rerum facie velut ex Tripode vaticinatus fuerit: cuinam credendum sit, hanc potius esse mentem S. Doctoris, quam aliam. Porro videtur mihi præsens Scholasticorum de sincero D. Thomæ sensu litigium illi haud dissimile esse, quo olim Smyrna, Rhodos, Colophon, Salamis, Chios, Argos, Athenæ de Homeri Patria digladiabantur.

(*) Juvenal. Sat. XV.



ſyllogiſtica vociferationis artificium deſcendunt; ſenſim
(niſi forſan cholerae, aut climatis intemperies animorum
malaciam tollat.)

- - - - - iurgia prima ſonare

incipiunt animis ardentibus - - -

dehinc clamore pari concurritur, et vice teli

ſævit nuda manus (*). - - - -

Postquam vero per dimidiam ferme horam, deſtinatum
videlicet in ſcholasticis exercitiis temporis ſpatium, fe-
rociter decertatum, ſeu verius, paribus utrinque pul-
monibus declamatum eſt: illico facta ad invicem mo-
deſta incurvatione inter *deſiſſimas gratiarum actiones*
pacem, et concórdiam ſimulant, poſt aliquot momenta
ad priſtina odia reverſuri (**).

Verum, etſi ſecta ſcholastica tot, tantisque moti-
bus inteſtiniſ hinc inde afflicta fuit; primas tamen ubi-
vis locorum feliciter retinuit. Nam ſcholæ diſcordes in
eo ſaltem concordēs erant, quod cuiuslibet partis aſſeclæ
ſcholasticos ſeſe profiterentur: et præcipue, poſtquam
Doctores Pariſinæ Univerſitatis anno 1611. renovaffent
Decretum per Emm. Card. S. Marci, et S. Martini Ur-
bani V. Commiſſarios iamiam anno 1366. editum, ut
in

(*) Juvenal. Sat. XV.

(**) Ædepol! vidi egomet per eiſmodi diſputationes
ipſas etiam ædes ſacras horrendis clamoribus eouſque
profanari, ut integra exercitatio literaria Lapitharum
convivio propemodum conſimilis videretur. Vera
loquor! Non equidem hoc ſtudeo, bullatis ut mihi verbis pa-
gina turgeſcat, dare pondus iæoneæ ſumo. Perſius. Sat. V.



in Gallia traderetur Philosophia Aristotelica (*). quod dein annis 1624. et 1629. a Parlamento Parisino iterato confirmatum fuit Academiarum Reginam, et Matrem continuo æmulantibus cunctis fere Europæ Universitatibus (**). Ter faustis interea scholasticæ Philosophiæ successibus circa medium seculi decimi septimi moras iniecit recenter exsurgens *Neotericorum* factio, quæ emendatis antiquorum Græcorum principiis, aut a gentilismo depuratis, inque ordinem meliorem redactis adversus Peripatum Scholasticum arma commovit. Primi classicum cecinere in Anglia Baconus de Verulamio orbi Politico, et Literato notissimus, & Robertus Boyleus: in Hetruria Galilæus Galilæi: in Gallia Petrus Gassendus, et Renatus des Cartes: in Germania Leibnitzius, Sturmus, Wolfius &c. ac præsertim nobilis Brito, ac ingentis nominis Philosophus, una et Mathematicus Isaacus Newtonus.

Caussæ

(*) Verius tamen per Philosophiam Aristotelicam, quæ illa ætate circumferebatur, intelligi possent fragmenta huius Philosophi per Arabum interpolationes miserrime confuta.

(**) Quidni? cum et mores, et vestes Gallorum hodie non aliter, ac perenni servitute compulsi æmulari studemus. Cetera, dum mentionem hic infero de Decreto in favorem Philosophiæ Peripateticæ edito, animo insimul occurrit perfacetus supplex libellus Universitatis Parisiensis ad Præsides montis Parnassi. *Requête en faveur d'Aristote à nos Seigneurs du Mont Parnasse.* qui legitur in Menagianis Tom. 2. Huic libello subiungi meretur. *Arret donné en faveur des Maîtres - Arts Médecin, et Professeurs de l'Université, pour le Maintien de la doctrine d'Aristote.* quod Decretum ridiculum exstat Tom. II. operum D. Nicol. Boileau Despreaux. Multa in his pagellis prorsus utilia ac iucunda, sed et erudito sale permixta curiosus lector offendet.

Caussæ graviores, quæ tantos Viros in arenam literariam descendere compulerunt, fuere inprimis asperum, et ad barbariem usque horridum dicendi, et docendi genus, quo in publicis prælectionibus Scholastici utebantur; *dum sibi*; ut Claudius Fleurius animadvertit (*), *cudebant aitionem singularem, ab omnibus linguis vulgaribus, et a vera latinitate distinctam.* quæ non tantum insipidis, et incultis phrasibus abundabat, sed insuper ad exprimendos mentis conceptus non nisi Logogryphos, et obscura vocabula propinabat, ad quorum significationem rite penetrandam vel ipse Oedipus recenti verborum apparatu egeret. Inde factum fuisse creditur: ut is coram vulgo literario primi subsellii Scholasticus haberetur, qui opinionem suam tam arcanis terminis, ac peregrinis vocibus proponere, ac adeo argutis cavillationibus involvere novit; ut ab auditoribus vel nulla ratione, vel certe non nisi post profundam meditationem summa tandem cum admiratione intelligeretur.

*Omnia enim stolidi magis admirantur, amantque, in versis quæ sub verbis latitantia cernunt. veraque constituunt, quæ belle tangere possunt aures, et lepidò quæ sunt fucata sonore (**).*

Altera et forsan potentissima caussa matrix erat neglectus experientiæ: cum Scholastici pene omnia rationi attribuerent *ex nimia reverentia*, et *adoratione intellectus humani*, ut egregie advertit Baconus de Verulamio (***). *Unde abduxere se a contemplatione naturæ, atque ab experientia, in propriis meditationibus, et ingenii commentis susque deque se volutantes.* Protinus etenim ad
C inu-

(*) Dissert. V. in Hist. Eccl. §. XVI.

(**) Lucret. l. 1. de rerum nat. v. 642.

(***) l. 1. De Augment. Scient.



inutiles subtilitates, ad Metaphysicas, transcendentales, supertranscendentales, imo verius chimericas speculationes prolapsi portentosas omnino quæstiones confarciebant (*): atque per integrum fere triennium (nubem quippe pro Junone apprehendentes) aridas vocum paleas excutiebant, verminososque inanium possibilitatum cortices diffringeabant, sicque in modum Erisichtonis vana aura pascebantur. Hinc mirum non est, si entia entibus, entitates entitatibus, qualitates qualitatibus multiplicarent, ac super qualibet re propofita artificiosas obiectiones formarent: quarum deinde resolutiones tanta distinctionum, subdistinctionum, præcisionumve congerie sueverunt obruere; ut Danaïdum urnam aquis prius repleveris, ac eiusmodi responfionum sinceritatem, et valorem inspexiffes. Altefati itaque viri huius rei indignitate permoti missis verbalibus

(*) Scatent revera eiusmodi insulsis quæstionibus integra volumina, ut indagantibus nullo negotio patebit. Neque etiam ætas illa a nostro temporum curriculo adeo remota est, ubi ieiunis quæstionibus *de obiecto Logica. An Logica sit ars, an scientia, an simpliciter practica? an secundum quid? de præcisionibus obiectivis. de universalibus a parte rei de ente rationis. De materia prima Peripatetica, de eiusdem materie appetitu &c.* myriades foliorum onerabantur, imo etiam positiones ex iisdem quæstionibus in publicis disputationibus inter tubarum, tympanorumque strepitus satis thrasonice ventilabantur. Nemo tamen exinde sollicitus erat, an per eiusmodi affanias reipublicæ humanæ obsequium præstaret, veram utilitatem promoveret, aut utilem veritatem detegeret. videbatur enim Scholasticis hisce suffenis sufficere, vel de lana caprina litem movisse: hinc mirum non erat, si in fine disputationis multum clamoris, et parum lanæ inventum est. Ne vero animo malevolo, et spiritu contradictionis talia profari, vel ex ignorantia potius culpasse arguar; bona omnium cuiuscunque ætatis Scholasticorum venia aliquot



libus Scholasticorum tricis, novas, & a prioribus longe diversas philosophandi vias arripuerunt; omnemque rerum naturam, relictis inutilibus speculationibus ad exactas Staticæ, ac Mechanicæ leges revocarunt. Quæ philosophandi ratio, cum plurimis indies observationibus, et experimentis illustraretur, adeo invaluit, ut totam fere Galliam, Angliam, Italiam, Germaniam &c. occuparet. præprimis, cum per adinventas varii generis mirificas machinas multa exinde in rem publicam humanam emolumenta promanare ceperunt. Ab illo mox tempore secta scholastica despectui habebatur; stomachumque excitabat, quidquid Aristotelem, quidquid Peripatum redolebat. Quinimo cum inchoatam semel Philosophiæ reformationem Viri literatissimi præsentique ætate improbo labore prosequerentur, integer tandem Peripatus cum Senecione Stagiritæo ex omnibus

C 2

cathe-

quot quæstiones hic adiiciam, quas ipse ego ex impressis opusculis quibusdam, quæ varii authores ex occasione disputationum decretoriarum publica luce donarunt, aliquando ex otiosa curiositate collegeram.

I. *Utrum homo ex eo imperfectus sit, quia non est DEUS?*

II. *Utrum DEUS non possit prædeterminare pulicem ad producendam aquilam?* III. *Utrum aliqua creatura possit naturaliter existere, et esse nullibi?* IIII. *Utrum Angelus, si nocte crearetur, sciret dari modo tenebras?* V. *An dentes sint pars hominis?* VI. *Utrum Ens rationis per propriam, vel alienam speciem intelligatur?* VII. *An Ens rationis in intellectu, vel voluntate sit positum?* VIII. *Utrum DEUS cognoscendo Ens rationis non contristetur?* IX. *Utrum si creatura ab æterno existeret, DEUS esset causa illius?* X. *Utrum Christo Enti per accidens conveniat prædicatum substantiæ?* XI. *An ignis prius agat in proximam, quam remotam partem?* XII. *Utrum si hodie daretur materia, cras forma, perendie unio, daretur compositum physicum permanens.* XIII. *Utrum creatura in ratione suæ elevabilitatis sit infinita.* XIV. *Utrum, posito si DEUS necessitaretur ad producendum aliquod ens, DEUS tamen esset essentia cause huius entis.* XV. *Utrum dentur Entia nature amabilia?*

lia?



cathedris publicis eiectus ad Monachorum Claustra confugit: ubi inter paucas adhuc regulares familias anili ætate confectus velut in Gerontodechio supremum expectat diem. Tentaverunt equidem nonnulli mitiori, ut apparebat, aura sectam scholasticam pristino splendore restituere; cum illam ab entitatibus, et qualitatibus, velut antiquis venustiolis (*) depuratam fucata recenter facie, et tunica ad novitatem variegata erudito orbi spectandam proponerent. Verum spe successum fallente illico Patroni isti mordacibus novaturientium ingeniorum ludibriis risuique sardonio patuere, haud aliter, ac

*Humano capiti cervicem pictor equinam
iungere si velit, et varias inducere plumas (**).*

Alii tamen pacatioris genii Philosophi potius condolere videntur implacidæ adeo tantorum Virorum, ac præprimis Religiosorum forti, quod tam cariosum sectæ scholasticæ iugum forsan ob sanctiores regularis obedientiæ compedes excutere non liceat.

DE

lia? &c. Ad omnes modo non tam Philosophos, quam Theologos appello: edisserant liberaliter, quæ utilitas, quæ veritas, quodnam denique sobriæ eruditionis robur sub hisce quæstionibus lateat? qualem tandem commodum ex resolutione earum reipublicæ humanæ accrescat? Pronum mihi quoque foret Authorum recensere nomina, si quis ex me studiose rogaret, verecundius tamen illa sub ticeo, ne forte quibusdam in Satyra videar nimis acer, et ultra legem tendere opus. Horat. l. 2. Sat. 1.

(*) Mundus muliebris intelligitur, qui elatiori vernacula Schönplästerchen nuncupatur.

(**) Horat. in arte poëtica ad initium.



DE PHILOSOPHIA ECLECTICA.

Philosophiæ Eclecticæ nomine ea philosophandi ratio indigitatur, quæ nullius authoritati mancipata ad sanæ rationis regulam respicit, eaque duce opitulantibus insimul sensuum experimentis clara sibi, et certa principia feligit, ex quibus legitimæ veritates derivantur; nihilque ex aliorum Philosophorum placitis admittit, quod non solidissime perquisitum, ac probatum sit. Philosophia Eclectica igitur *nullo est vincula compede, nullius iugata imperio: ex ipsa nominis etymologia non est Gassendica, non Cartesiana, non Aristotelica, sed Libertina* (*). Originem illius referunt non nulli ad Potamonem Alexandrinum, qui iamiam sub Augusti imperatoris temporibus floruit. Quin antiquissimis quoque Ecclesiæ Patribus eam familiarem fuisse, constat ex Origene, Gregorio Thaumaturgo, et Clemente Alexandrino. Postquam vero disciplinæ Philosophicæ fervili iugo Scholasticorum subiectæ fuere, illico per aliquot secula hæc sentiendi libertas ad Garamantas abiecta fuit. Qui enim semel in alterius verba iuraverit, prout Scholasticis commune est,

*Libertate caret, Dominum vehet improbus, atque
serviet æternum; ingenio quia nesciit uti* (**).

Donec tandem eadem libertas a Francisco Bacone de Verulamio, viro non tam Philosophiæ, quam emendandis pene omnibus scientiis nato, ad publica Literatorum compita revocata fuit (***). Insignes conatus huius sectæ Eclecticæ Promachi, alii plurimi diversarum

C 3

gen-

(*) Ita P. Daniel in itinere per Mundum Cartesianum.

(**) Horat. l. i. Epistol. X. ad Fusium Aristium.

(***) Consule præstantissimi huius Philosophi *Novum organum scientiarum* et libros *de augment. scient.*



gentium Philosophi tam studiose promoverunt, ut hodie celeberrimæ Academiae, ac plerique coetus Monastici eidem festive subscriberent.

Neque ex mera novaturiendi libidine id factum fuisse censendum est. Quippe Viris istis probe perspectum, ac persuasum fuerat: studium omne disciplinæ naturalium amore solius veritatis aut detegendæ, aut consolidandæ suscipi, et ad illam velut ultimum finem dirigi debere; bene providi itaque exhorruerunt periculum deceptionis, aut erroris a tam nobili fine, cui procul dubio obnoxios sese reddidissent, si cæco impetu quasi servum pecus unius addicti iurassent in verba Magistri. Neminem utpote fugit: multa quidem vera, et utilia cum ab antiquis, tum novioribus Philosophis detecta, et asserta, sed quam plurima insimul incerta, inutilia, et a veritate prorsus aliena illorum placitis inserta fuisse, prout copiosa argumentorum inductione de Platone, Aristotele, Epicuro, Cartesio, Gassendo, Wolfio, aliisque ostendere pronum foret. Ut igitur eo felicius supra tactum finem consequerentur, omnem authoritatis humanæ fiduciam abiecere, turpe existimantes cum Pythagoricis despoticum illud *Αυτός εἶναι* tanquam veri regulam respicere; cum alioquin ab ipso authore naturæ præter inndtum quævis penetrandi desiderium aptissima quoque ad hunc finem assequendum media mentibus humanis subministrata esse cognoscerent (*). quibus proinde adiuti nihil in dogma philosophi-

(*) Eleganter in hanc rem Lactantius apud Anton. Gen. l. i. art. Log. crit. c. V. sic disserit. *Dedit omnibus DEUS pro virili portione sapientiam, ut et inaudita investigare possent, et audita perpendere. Nec quia nos illi (maiores nostri) temporibus antecesserunt; sapientia quoque antecesserunt; quæ si omnibus equaliter datur, occupari ab antecessentibus non potest. Vel qua demum ex licentia ipsus* Aristot-

sophicum assumere contendebant, quod non aut sanæ rationi, aut oculari, palpabilique sensuum testimonio, siue utrique consentaneum fuerit visum. Eapropter illa pariter aliorum Philosophorum placita (videlicet, ne cum colligerent Zizania, eradicarent simul et triticum) civitate donabant, quæ ad eundem rationis, et experientiæ lapidem, lydium examinata, veritatis, aut rigidæ saltem hypothesis æstimatione digna fuere inventa. verbo. in hac ratione philosophandi eclectica non quæritur: quis, aut quidnam dixerit? sed quam recte, id est rationi conforme. ut adeo probe coincidant verba illa perantiqui cuiusdam Eclectici (*): *Philosophiam non dico Stoicam, nec Platoniam, aut Epicuream, et Aristotelicam* (imo nec Cartesianam, Atomisticam Wolfianam, aut Newtonianam) *sed quæcunque ab his sectis recte dicta sunt, hoc totum selectum dico Philosophiam.*

Postquam igitur Secta eclectica reformandæ Philosophiæ negotium aggressa est, nova illico rerum facies apparere cepit, cum quælibet Philosophiæ pars recenti eruditionis apparatu instructa fuit. Ex Logica nimirum otiosa terminorum discussio proturbata, & mechanica syllogismorum confibulatio a sophisticis argutiis depurata fuit: & e diverso succinctæ regulæ, quæ artem cogitandi, inveniendi, iudicandi, ac differendi promoverent, morbisque intellectus, ac iudicii mederentur, constitutæ fuere. Metaphysica exterminatis

C 4

inani-

Aristoteles vestigiis Magistri sui Platonis relictis novum philosophandi genus apprehendit? cur ergo Religioni sibi ducunt Scholastici e castris Peripateticis discedere? *quasi vero* (ut perbene Cl. P. Donatus a Tranfig. Dom. in præfat. ad introductionem in logicam advertit) *quasi vero solus ille* (Aristoteles) *verum viderit, nihilque posteris videndum reliquerit.*

(*) Clemens Alexand. in Imo Strom,



inanium subtilitatum senticetis puriora modo cognitio-
num nostrarum principia, ac fontes subministrat. Ethica
dudum antea neglecta, imo inter Scholasticas tricas
penitus suffocata denuo reviviscit. Physica tandem,
quam, iuxta sæpe laudatum Baconem (*), Aristoteles
Dialectica corripit, ut *iam nil aliud, quam dialecticæ
voces sonet, quam etiam in Metaphysicis sub solenniori
nomine, et ut magis scilicet realis, non nominalis retra-*
ctavit. non amplius infulsis verborum vitiligationibus,
sterilibusque occupatur conceptibus, sed sensuum cri-
terio adiuta, iugique eventuum naturalium observatio-
ni intenta sincera de causis, et effectibus physicis effor-
mat iudicia. & miro nexu utile dulci permiscet (**).

Incrementum, et nitorem sectæ huius Eclecticæ
hodierni Philosophiæ cultores nunquam latius propaga-
runt, aut altius promoverunt, ac dum ad explicanda
naturæ Phænomena mathematicis ut plurimum, et
Geometricis subsidiis eventu pariter ex omni latere se-
cundo uterentur. Inde tamen contigisse arbitror: ut,
quemadmodum Scholastici plurima ex penu theologica
ad profanos Philosophiæ usus transtulerunt; ita etiam
satismulta ex Mathematicis disciplinis scitis præcipue
physicis commista fuere, ut quasi species quædam *Ma-*
theseos, aut *physices mixtæ* exsurgere ceperit. Quinimo,
ut omnes omnino Peripati reliquiæ funditus extirpa-
rentur,

(*) In novo Organo Aphorif. LXIII.

(**) Neque prodest Fautoribus Aristotelis, Philoso-
phum hunc experientiæ quoque studiosum fuisse,
prout ex illius libris de animalibus, et ex Problema-
tibus inferunt. nam denuo observat laudatus Baco
citato Aphorismo: Aristotelem prius decrevisse, et
tunc primum experientiam ad sua placita tortam cir-
cumduxisse, et captivam; ut hoc etiam nomine ma-
gis accusandus sit, quam sectatores eius (Scholastici)
qui experientiam omnino deseruerunt.



rentur, in singulis pariter Philosophiæ partibus pertra-
ctandis Methodus Mathematicis communis adhibita est,
eliminatum fuit omne artificium syllogisticum, nihilque
propugnandum assumebatur, quod non regulis analyti-
cis, aut syntheticis conformiter elaboratum fuerat. Hæc
itaque philosophandi ratio cum simplicissima sit, et vel
ipsi rationis lumini conformior, merito, et iure in omni-
bus athenæis literariis civitate legitima fruitur; licet
hinc inde Sarcasmis edentulorum quorundam Scholasti-
corum, & ferulæ censoriæ Theologorum exposita sit.
qui, utpote ineluctabili præiudiciorum vortice correpti,
illos Philosophos Eclecticis esse arbitrantur, qui suum
duntaxat iudicium sequuntur, et ea, quæ sibi oppor-
tuniora sunt amplectuntur; imo *malunt libertatem quid-
libet sentiendi errandi periculo redimere, quam alterum
maiores agnoscere, atque sequi Magistrum* (*). Verum
enim vero palmarem hoc calumniam innuere, nemo
est, qui ambigit. nam

- - - *Male verum examinat omnis*
corruptus (**)

anticipatione iudiciorum, crassumque errorem Elenchi
incurrit; cum Eclecticis criminis incusant, cui nulla ra-
tione, ex allata modo descriptione obnoxii esse possunt.
Id tamen potius cavendum esse reor: ne Eclectici tam
ingenua libertate abutantur, et libidinis suæ fervi eva-
dant, aut in turpem contemptum declinent. cum omnes
illos vel effuso risu, vel cavillabundo sibilo explodunt,
qui non in eandem cum ipsis sententiam discesserunt.
quasi vero Philosophi alicuius doctrina haud sana pos-
set esse, nisi Wolfiana, aut Newtoniana audiat? non ne
enim

C 5

- - Quot

(*) Plinius in Præfat. Hist. natur.

(**) Horat. l. II. Sat. II.



= = Quot capitum vivunt, totidem studiorum
Millia (*)?

Medius fidius! et sunt quædam acute a Peripateticis excogitata, a Cartesianis, plurima summo iudicio scripta, quæ idcirco contemnere, quod Newtoniana, aut Wolfiana non sint, juveniliter desipere est. Antequam igitur novaturientes talismodi scioli ad aliorum dogmata nares attrahant, studiose prius animo imprimant aureum canonem Cl. Antonii Gen. (**)

Tu nullius hominis contemnito ingenium: de humanarum mentium cogitatis non ex ullo præiudicio, sed ex ratione iudicato: libertatem philosophandi, quæ DIVINA QUÆDAM RES est, ut ne vis consuetudinis, et seculi secum abripiat caveto: nulli nimium credito: neminem sine ratione aversator.

Hæc tandem sunt celebriora Philosophiæ fata, hæc notiorum Sectarum indoles. Interest modo, ut mentis meæ sensa candide, et quantum per modicum rationis meæ lumen licet, proferam: quænam videlicet philosophandi methodus, an Scholastica, an Eclectica retinenda sit? ut resolvendo problemati tandem propius accedamus. Atque ne diu morer, rotunde profiteor: Rationem philosophandi Eclecticam etiam in ordine ad subeundum SS. Theologiæ, aut Iurisprudentiæ studium, Scholasticæ præferendam esse. cum per eam longe felicius et veritati, et utilitati cum ex parte docentium, tum ex parte discipulorum consulatur, sicque præfixus sobriæ Philosophiæ finis facilius obtineatur. sincerum tamen artificium syllogisticum a Paralogismis, inanique verborum lusu depuratum ex methodo scholastica utiliter retinendum esse existimo: non quidem, ac si aliud methodi genus ignobile, aut minus utile foret; sed

(*) Horat. l. II. Sat. I.

(**) l. I. Art. Log. crit. C. VI.

sed præcipue, quod methodus syllogistica ob rotunditatem, ordinem, claritatem, et invictum propemodum constringendi robur non minus Philosophicis, et Theologicis, sed et omnibus aliis literarum disciplinis defer-
viat.

Profecto, nec novum, nec paradoxum quid asse-
ro. etenim dudum quam plurimi et virtute Religionis,
et doctrinæ laude conspicui Monachi in hac semita facem
ter faustis avibus prætulere: quorum vestigiis ego quo-
que pro virili insistere laboravi. imo nullus dubito:
quin et reliqui pauci in hanc philosophandi methodum
proni forent; nisi iras et minas Seniorum suorum per-
timefcerent. qui utpote tenacibus præiudiciis irretiti,
et clamoræ Scholasticorum eruditioni assuefacti omnia
eliminatam eunt, quæ Peripatum non sapiunt, nempe,
ut olim Vates Venusinus cecinisse legitur:

- *Quia nil rectum, nisi quod placuit sibi, ducunt.
vel quia turpe putant parere minoribus: et quæ
imberbes didicere, senes perdenda fateri (*)*.

Hinc nullum non arietem movent, ut recentem hoc ævo
Philosophiam, quam ironice non nisi *Tornatoriam*, seu
Drechsler Philosophie nuncupant, despectam, imo etiam
de ipsa fide suspectam reddant. Expedit profecto ut
non nulla momenta expendamus, quæ tam acerba odia
in animis Virorum istorum excitarunt adversus reforma-
tam Philosophiæ faciem.

In prima statim fronte occurrit inviolabilis Aristo-
telis Authoritas, quæ per tot secula a Viris literatissimis,
imo et sanctissimis unanimi consensu summo in honore,
ac pretio habita fuit: a qua authoritate, et consensu vel
transversum unguem discedere aut juvenile, aut teme-
rarium

(*) Horat. l. II. Epist. I. ad August.



rarium videri existimant. Verum non est, cur notam temeritatis incurrisse metuamus. Non enim ideo Aristotelis, aut Scholasticorum non nulla placita despiciamus (quæ enim bona sunt adhucdum recipiuntur, et a feris posteris recipientur) quoniam pyliam vetustatem redolent. sed vel maxime, quod aut aperte falsa sint, aut omni penitus utilitate destituantur: vel quia temporis successu ob industrias sensuum indagaciones, et observationes alia modo effectus cuiusdam, seu causæ naturalis ratio habenda est, nisi quis apertis oculis, et pleno meridie cœcutire velit (*). quin imo multa adhuc in apricum proferet ætas, quæ nobis occultata sunt, aut de quibus non nisi obscuram ideam habemus: apertæ dein infantiæ foret; succedaneos nostros temerariæ novitatis incusare, si clariorem illarum rerum ideam ex multiplicatis experientiæ tentaminibus eruissent. Quid

*Quod si tam Græcis novitas invisâ fuisset (**)*
quam nobis, - - - - -

quomodo vel ipse Aristoteles sectæ Peripateticæ antesignanus salutari promeritus fuisset? Audiri profecto meretur hac super re insignis *Author artis cogitandi* hunc in modum differens (***).

„Si

(*) Quis enim quæso! hodiernorum Scholasticorum amplius ad metum vacui recurrit ad explicanda phænomena ascensus Mercurii in Barometro, aut aquæ in antlia aspirante, vel Syringe? Vel quis ausit hodie pertinaciter asserere: non dari Antipodes: eoquod Sanctissimi Viri Augustinus, Lactantius, Beda &c. illorum existentiam negassent, et S. P. Zacharias Virgilium Salipolitanum Episcopum eorum existentiam propugnantem ab officio suspenderit!

(**) Horat. l. II. Epist. I. ad August.

(***) In proëmiali dissertatione 2da ad artem cogitandi. edit. Venet. MDCCXLIX. quæ concordat cum Gallica Amsterodamensi de anno M.D. CCXVIII. In editione per Cornel. ab Ackersdyck a. Clb CLXVI. Traiecti ad Rhenum adornata autem ambæ dissertationes desiderantur.



„Si tamen quidam sint, qui nefas arbitrantur vel
„tantillum ab Aristotele dissentire, idque palam testari;
„non erit admodum difficile ostendere, quam a ratione
„aliena sit hæc teneritudo. Si quibusdam Philosophis
„reverentiam deferre tenemur, id tantum duas ob caus-
„sas faciendum est, vel scilicet intuitu veritatis, quam
„coluerunt, vel æstimationis, quam sibi apud eruditos
„acquisivere. Veritatis autem causa tunc solum illis
„cultus debetur, cum illam sunt affecuti; veritas au-
„tem non exigit, ut falsitatem, apud quemcumque de-
„mum fuerit, revereamur. Quantum vero ad æstima-
„tionem, quam ab unanimi approbatorum consensu Phi-
„losophi habent, fatendum est, illi aliquid deferendum
„esse, nec citra imprudentiam posse sine debitis cautelis
„labefactari, et ratio est. qui receptam omnium opi-
„nionem impugnat, superbiæ, et præsumptionis cri-
„men videtur incurrere, dum plus sibi lucis, quam ce-
„teris omnibus arrogat. Cum vero in Authore aliquo
„æstimando divisus in partes Eruditorum orbis sit, cum
„utrimque consistant Viri doctrina præstantes; non iam
„amplius has tenemur cautiones adhibere, sed libere
„possumus vel condemnare, vel approbare ea, de qui-
„bus inter doctos opinionum dissensio est. Iam enim
„non tam sensum nostrum Authoris, et approbatorum
„sensui anteponimus, quam in partes abimus contraria
„docentium. En vero ipsissimam, in qua nunc dierum
„versatur, Aristotelis conditionem! Illius placita utram-
„que experta fortunam sunt; quondam ab omnibus im-
„pugnata, et reiecta, ab omnibus alias culta, et ap-
„probata; nunc vero medium inter hæc extrema locum
„tenent, a pluribus viris doctis propugnantur, ab aliis
„non minoris inter eruditos famæ impetuntur. - - -
„Celeberrimi Professores non amplius se ad illam dam-
„nant servitutem, quidvis scilicet clausis oculis acceptan-
„di, tuendique, quod in illius (Aristotelis) libris pro-
„poni-



„ponitur; imo quædam Aristotelicarum opinionum prorsus antiquantur. - - - Nimis quidem durum est omnes omnino Aristotelis opiniones proscribere, quod aliquando factum est; omnibus autem assensum oppignorare, illumque solum pro regula Philosophiæ habere, quod postea est agitatum, immanis servitus visa: talem homines tyrannidem diu pati nequeunt, sensim innativam rationabilis libertatis possessionem sese vindicant; hæc autem in eo sita est, ut unusquisque id approbet, quod verum, id reiiciat, quod falsum iudicat.

Verum longe graviora sunt adhuc, quæ Scholasticorum animos ad iusta prorsus odia commovent, si illorum propensum in sacra fidei dogmata pietatis zelum intueamur; cum quibus utpote disciplinas Philosophicas arcte connecti arbitrantur. dolentes enim ingeminant: Sectam Eclecticam, quæ modo in usu est, natales suos trahere ex perversis A catholicorum, et hæreticorum libellis: in quibus sub schemate cultioris Philosophiæ semina Libertinismi, et Indifferentismi dispersa sunt, cum aperto periculo; ut si aliquando libertas sentiendi in rebus philosophicis civitatem obtinuerit, liberior quoque novaturiendi pruritus in materiis ad fidem, et Religionem pertinentibus succedat, cuius rei tristitia prorsus exempla enumerat Celeberrimus P. Veremundus Guss Benedictinus in *Examine Theologico Philosophiæ Neotericiæ* (*). Ut igitur æqui, bonique consulant, Philosophiam

(*) Memoriam Doctissimi, una & pientissimi huius Viri immortalitati transcriptam esse nemo ignorat, quisquis præclara Eiusdem opuscula literaria vel in superficie inspexerit. In præsentitamen negotio, cum adversus Neotericos calamum stringeret, plus iusto antiquis præiudiciis abreptum fuisse facile colligitur: cum omnes reliquas sectas excepta Peripatetico-Scholastica apertæ hæreseos insimulat.



phiam tam periculosa libertate privandam esse contendunt, et ad pristinum S. S. Theologiæ servitium redigendam.

Hæc fane, si ita se habeant, si revera tam grandis ruina ex liberiori Philosophorum aura orthodoxæ fidei immineat; manibus utique, pedibusque in Scholasticorum sententiam redeundum esse aio. Ipse enim ego haud aliter

Ac Lugdunensem Rhetor dicturus ad aram ()*

vel audito tantum *Libertini* nomine expalleo, ipse hanc immanem feram cane peius et angue exhorresco. At si de vero sobriæ libertatis usu sermonem miscemus, nulla ratione sectam Eclecticam reiiciendam esse contendo; cuius munus utpote est, ut ea, quæcunque ab aliis sectis (sive Peripateticam, sive Atomisticam, Cartesianam, aut Wolfianam spectes) recte dicta sunt, ad forum suum pertrahat. Tam parum itaque Eclectico Philosopho obest, quædam veritati, et sanæ experientiæ consentanea ex Wolfio, Sturmio, Leibnitzio &c. mutuasse, quam parum ipse Doctor Gentium ad Athenienses verba faciens reprehensibilis censetur; quod aliquot versiculos ex gentili poeta assumptos prædicationi suæ inferuerit. vel, quod ipsi Scholastici placita Gentilis Philosophi, et quidem magis de Atheismo quam idololatria suspecti, qualis erat Aristoteles, scholis orthodoxis inveherent. Non enim, quis quidquam dixerit, attendendum est, sed quam bene dixerit, aut scripserit.

Quod perversionis periculum attinet, paribus utriusque conscientiae angoribus ut exagitemur, necesse est. quemadmodum enim, ex placitis Neotericorum, et Eclecticorum fides orthodoxa permultis maculis

lis

(*) Juvenal. Sat. I.



lis conspersa fuisse, Scholasticis videtur; sic et Philosophia Peripatetica omnibus qua vetustioribus, qua novioribus hæresibus ianuas, postesque aperuit. sincera inductione id contestatur insignis Eclecticus Philagrius le Roy, Philosophiæ Radicalis Eclecticæ compiler (*), qui audacter asserere non reformidat: *non esse hæresin, quæ in Aristotele non fulciatur*. longa dein serie ramusculos tam malignæ arboris recenset. imo et sanctos Patres de secta Aristotelica querulantes adducit, et præprimis S. Justinum: qui sese *a Peripateticis in impietatem tractum fuisse* profitetur. In eandem sententiam abiit quoque insignis Theologus Melchior Canus magnum ordinis Prædicatorum lumen (**), cum ex Peripateticismo exiisse Machiavellismum, radicem illam peccatorum, et insolentiae Principum, et seditionis Populorum, atque hinc sectam *Politicoꝝ*, et *Libertinoꝝ*, quorum proceres sunt Machiavellistæ, et Atheistæ, apud citatum Philagrium affirmat. Multam profecto paginam implerem, si enumerandis erroribus singulis inhærerem, qui ex dogmate Aristotelico pullularunt. Eapropter etiam tribus primis Orthodoxæ Ecclesiæ seculis Christiani non admodum favebant Peripateticis, imo plurimi SS. Patres graviter in Philosophiam Aristotelicam invec̃ti sunt; timebant nempe, ne S. fidei simplicitas periculum pateretur, si acuminibus præsertim logicis, et rationi, quam Aristoteles ubique urgebat, iusto nimium tribueretur, quod tunc temporis Hæretici armis ex Logica Peripatetica

(*) In Præfatione ad eandem Philosophiam Radicalem. Integra hæc Præfatio a quovis Religioso Philosopho relegi meretur, et præsertim a Cisterciensi, eo quod sub inscriptione huius nominis Philagrii le Roy quidam Cisterciensis familiæ Alumnus latere videtur, qui illa ætate inter Scholasticos, et Neotericos syncretismum disponere meditatus est.

(**) l. 10. de loc. Theolog.



tetica mutuatis temere factitabant. Neque melius Scholastici causæ suæ prospiciunt, si sectam suam ab erroribus, et gentilismum redolentibus opinionibus defæcatam esse, et ea tantum placita retenta fuisse, quæ non minus cum sana ratione, quam sanctis orthodoxæ fidei principiis componuntur, adeo gloriose iactitant. Atqui id ipsum sobrii Eclecticis cogitant, id faciunt, quibus utique non nisi veritatis, et utilitatis amor cordi est: aliter qui meditantur, et agunt, Eclecticis non sunt, sed turpia propriæ complacentiæ mancipia vocitari merentur, quorum dux non fides, non ratio, sed *Φιλαυτία* est. In Eclecticorum enim partes si discedimus, *Apes debemus imitari, quæ vagantur, et flores ad mel faciendum idoneos carpunt, deinde quidquid attulere disponunt, ac per favos digerunt (*)*.

Verum bene memini, Scholasticos ulterius urgere, et contracto supercilio insistere: ut quid ergo hodierni Eclecticis temerarias adeo, et a placitis Theologicis prorsus alienas opiniones amplectantur? et ductum sacræ Theologiæ reformident, cui tamen vel ipsa Mater Ecclesia subditos ex asse omnes Philosophos esse voluit (**)? Hic Rhodus, hic Saltus! Antequam vero me de molesta hac obiectione expediam, sit mihi fas aliorum Literatorum in medium afferre sententia, quid illis de laudato sæpius nexu Philosophiæ cum Theologia, et de prætenso eiusdem erga illam ancillari obsequio visum fuerit. Primus omnium de utroque conquestus est citatus sæpe Baco de Verulamio, cum spinosam, et pugnacem Aristotelis Philosophiam corpori Religionis, plus quam par esset, immistam fuisse dolet (***). imo satis confiden-

D

denter

(*) Seneca Epist. 84.

(**) In Decreto, seu Bulla in Concil. Lateran. V. General. XVII. Sess. VIII. condita, quæ incipit *Apostolici Regiminis*.

(***) In novo Organo Aphorif. LXXXIX.



denter asserit: per temerariam hanc confusionem utriusque scientiæ, superstitionem, et zelum Religionis cæcum, et immoderatum in mentes hominum fuisse derivatum. Atque cum Theologia longe altioris subsellii sit, nullam omnino dependentiam, et mutuam proportionem agnoscit; ut adeo Theologiam in Philosophia, aut Philosophiam in Theologia indagare nil aliud sit: quam *quærere vivos inter mortuos, aut mortuos inter vivos* (*). Neque arguendum est, adeo conspicuum virum, aut ex præiudicata opinione, aut immoderata sui complacentia id ausum fuisse profari absque sanæ rationis argumento. Probe etenim illustri Viro perspectum erat: ad veritatem mysteriorum fidei penetrandam frustra adhiberi argutias sophisticas, aut sensuum criteria, cum potius intellectum in obsequium fidei captivari oportet: et insuper ipsa *fides*, qua creditur ad iustitiam, *non habet meritum, cui ratio humana præbet experimentum*. Altioris profecto indaginis est Theologia, quæ utpote circa veritatem revelatam occupatur, cuius dein arcana scholasticis disceptatiunculis, ac coniecturis rimari, nil aliud est, quam curiose nimis in omnipotentiam divinam intendere, imo impie sacra profanis commiscere, haud aliter ac olim Nadab et Abiu ignem alienum, ac impurum sacris oblationibus adhibuerunt.

Nec ab hac opinione alienum esse legimus celeberrimum Mabillonium; cum et ipse fatetur (**): quod per temerariam hanc Philosophiæ cum Theologia commistionem, Scholastici integram Theologiæ faciem nedum frivolis quæsitis miserum in modum deturparunt, sed et theologicos discursus pene omiserunt, alios eorum loco subrogantes, sæpe numero iriden-

(*) De Augment. Scient. l. IX. c. I.

(**) In Tract. de stud. Monast. P. II. C. VI.



ridendos, utpote pueriles, nugatorios, et almæ Religionis, quam profitemur, incongruos. Insuper a traditione ipsa, ex nimia philosophandi libidine, multoties declinarunt. Inter ipsos autem celebriori censebantur nomine, qui sophistica invicem cavillandi arte præstabant. Eodem prorsus tenore Cl. e S. I. P. Gauthier conqueritur, dum ait (*): *Theologos Philosophia abufos fuisse, cum sophismatis, aut inanibus argutiis dialecticis Theologiæ maiestate indignis sacra fidei mysteria non tam explanare, quam obscurare conati sunt: imo defecerunt etiam ad quæstiones prorsus inutiles, frivolas, et sæpe ridiculas, quibus totam fere suæ pseudo-scholasticæ summam confecerunt. quin imo Philosophiam non sine magno S. Fidei damno Theologiæ connexam fuisse dolenter reprehendit insignis notæ Theologus, ac magnum sui temporis eruditionis sydus Melchior Canus (**). Egit ergo diabolus, inquit, quod sine lacrymis non queo dicere, ut, quo tempore adversus ingruentes ex Germania hæreses oportebat scholæ Theologos optimis esse armis instructos, ea nulla prorsus haberent nisi arundines longas, arma videlicet levia puerorum: ita irrisi sunt a plerisque, et merito irrisi, quoniam veræ Theologiæ solidam effigiem nullam tenebant. Theologiam enim ingressi, non Theologiam, sed fumum Theologiæ sequebantur. En fructus egregios e clandestino Theologiæ cum scholastica Philosophia conubio exortos!*

De ancillari Philosophiæ erga Theologiam obsequio quid aliis videatur, luculenter nobis suppeditat profundæ doctrinæ vir Udalricus Weis Benedictinus Ursinensis, qui in edito præstantissimo libro *de emendatione intellectus humani* hunc in modum differit (***) „Passim

D 2

„Philo-

(*) In Prodr. Theol.

(**) l. 9. de locis theol. c. I.

(***) P. II. Sect. IV. C. XIX. §. CCCCXXXI.



Philosophiam universam aiunt (*Scholastici*) Theologiae esse vernam, et ancillam, sed aiunt: et nescio quid illud sit, ob quod Philosophia tam abiecto nomine compellari digna sit; nec enim, quod aliquando veritatibus sacris pollicem premat, et succinat, eo obsequio in ancillae sortem redigi meretur, cum et vicissim revelatae veritates aliquando facem, lumenque Philosophiae praeferant; siquidem si hoc suis placitis Theologiam revera contradicere videat, se in opinione sua aberrasse, sententiamque suam etiam philosophice falsam, et adeo corrigendam esse Philosophia convincitur. Præterea, nisi quod Philosophia rationalis, hoc est, Philosophiae pars intellectum instruat, quomodo in cuiusvis veritatis vel monstrandae, si reperta iam sit, vel inquirendae, si etiamnum lateat, examine procedendum, quam instructionem et ipsa Theologia in suos convertit usus, et adhibet, alia principia, quæ Theologia a Philosophia emutuet, nescio; cum longe alterius ordinis sint Theologiae, quam Philosophiae principia. An vero modum progrediendi in quavis veri meditatione præscribere, ancillari sit? et si hoc ancillari sit, Philosophiam rationalem non unius Theologiae, sed reliquarum omnium scientiarum ancillam dici oportuit. Theologiam quoque sæpius obsequiis egere Philosophiae compertum est, quam vice versa: non vero omnia obsequia, et officia sunt servitia. Philosophia moralis (*seu Ethica*) si ea docet, quæ respondent, et consona sunt Theologiae morum, non ideo docet, ut velificetur, aduletur, aut ancilletur Theologiae, sed quia ea verissima sunt; unde Philosophiae per accidens est, quod Theologia morum doctrinam moralis Philosophiae aptam inveniat, qua sua dogmata aut confirmet, aut cui suam doctrinam superstruat; fundamentum autem ancillari ædificio audiui nunquam. Forte quia Theologia nobilior longe scientia est, quam Philo-



„Philosophia, ideo hæc ipsius ancilla salutatur? - - -
„minime gentium: et si aliquando hæc illi sententias
„suas attemperet, non studio ancillandi id facit, sed ne
„ipsa Philosophia falsum dicat, et erret, cum noverit,
„quod theologice verum est, falsum philosophice esse
„non posse. Etsi quondam difficile nimium problema
„Philosophiæ occurrat, quod solvendo suo Marte non
„sit, gaudet a Theologia saltem certior, securiorque red-
„di veritatis, etiamsi cur verum quid? nesciat, nec a
„Theologia aliter nisi autoritate verum esse convinca-
„tur. Nempe hæc Philosophiæ ancillaris servitus po-
„tissimum præiudicio nititur ex misera Philosophiæ cum
„Theologia confusione enato? hac in Philosophia Theo-
„logi, et in Theologia Philosophi esse cogimur. In
„scholis Philosophia ancillari cogitur Theologiæ, qua præ-
„postero utramque concordandi studio plus quam syn-
„cretico sæpe ex iis, quæ supra naturæ vires sunt, et
„non nisi miracula potentiae natura superioris, ad natu-
„ram concludunt, qua prodigia gratiæ in tantum phi-
„losophandi materiam faciunt, quatenus philosophicam
„illorum rationem reddere temerarii illi contendunt, sed
„potissimum inanem, plerumque vocabulariam. E. g.
„*fide certum sit divina corpus Christi sub diversis hostiis*
„*idem numero realiter coram esse; ergo in Philosophia do-*
„*cent penetrationem, replicationem, accidentium sine sub-*
„*iecto exsistentium esse possibilem, et in id ratiunculas Phi-*
„*losophicas exquirunt, quamvis revera miserabiles. Quid*
„*de relationibus, subsistentiis divinis ad humanas? quid de*
„*personarum divinarum origine ad cognitionem, et vo-*
„*luntatem humanam concludere liceat?* et cetera sex-
„centa, ubi vix aliquando circuli vitium declinant:
„cum ob theologica dogmata primo sic philosophentur,
„mox philosophumena sua in probationem theologicam
„adhibeant, hoc est, *philosophicam opinionem suam theo-*
„*logicam, mox eandem theologicam per philosophicam con-*



„*firment.* - - - quo verius fit, ut non iam Philosophia
 „Theologiæ, sed Theologia Philosophiæ servire, et
 „ancillari cogatur. Recidantur ex Philosophia illa, quæ
 „philosophica non sunt, repurgetur Theologia philoso-
 „phicis, et metaphysicis, præiudicium de Philosophia
 „ancillante sponte evanescet: simili præiudicio nititur
 „obtentus ille, quo stertorem suum, et veternum pal-
 „liant, et excusant, dum cordatius philosophari ad-
 „monentur, invitanturque: tum enimvero si alioquin
 „ad incitas redactos se vident, eo effugio elabi student,
 „quod in ordine ad Theologiam, antiquo tamen, et me-
 „rito antiquando illo more philosophari oporteat. sed
 „falluntur misere in supposito, quasi vero et more ve-
 „teri (sit verbo venia) foret theologizandum; instrua-
 „tur, et instauretur genuina Theologiæ facies, tum vi-
 „debunt, quousque, et quibus usibus Theologiæ Phi-
 „losophia sit futura.

Acribus profecto verbis insignis hic Author Philo-
 sophiam a servitute ancillari liberam vindicat: Ego ta-
 men mea ex parte, ne in reverentiam literatæ vetusta-
 tis peccare videar, mediam quodammodo semitam ap-
 prehendo, et aio: Theologiam scholasticam cum Phi-
 losophia æque scholastica, facta semel utriusque permi-
 ssione, connexam, et, cum scientia naturalis ad scien-
 tiam supernaturalem comparata inferioris longe ordi-
 nis sit, ideo Philosophiam Theologiæ subiectam fuisse.
 de quo nexu forsan, et subiectione altesata Synodus La-
 teranensis intelligenda esset, cum illa ætate non alia
 nisi Theologia et Philosophia methodo scholastica tra-
 ducta circumferebatur. At vero postquam utriusque
 huius scientiæ inutilitas deprehensa, et ipsa Theosophia
 a scholasticis speculationibus percolata, primævoque
 splendori reddita est: desiit iste nexus, et ancillaris
 servitus sublata est, nisi in tantum, in quantum ipsa
 Philo-



Philosophia ad capeffendas altiores scientiarum discipli-
nas necessaria effe nofcitur ; aut circa idem obiectum
verfatur, quod Theologia ope fupernaturalis revelatio-
nis, Philosophia vero opitulante cognitione naturali at-
tingit. fic moderna literarum ætate positiones *dogma-
ticæ, hiftorico - criticæ, et morales* univerfam pene
Theofophiæ materiam efficiunt. dogmata igitur quod
attinet, ea non ratione naturali, fed ex revelatione,
traditione, et ecclefiafticæ disciplinæ ufu consolidan-
da funt. quodfi vero contigerit, quosdam hæreticos
confutandos effe, qui quoddam fidei dogma dialecticis Lo-
gogryphis ex abufu nimirum Philosophiæ divexarunt,
opportunum erit ad regulas dialecticas confugere, ex
quibus illico palam erit, fruftra peti ex ratione naturali
argumentum contra veritatem fupernaturalem. probe
tamen cavendum eft, ne, dum fophismata eliduntur, no-
va denuo cudantur (*). Quæftiones hiftorico-criti-
cas præfertim *facti* per regulas artis criticæ, et Her-
meneuticæ, quas Dialectica non quidem fcholastica,
fed ad genium præfentis feculi efformata abunde sub-
miniftrat, difcutiendas effe quilibet fapit, et capit. Po-
fitionibus moralibus elucidandis Philosophia moralis fup-
petias ferre valet, qua doctрина, fi rite ad formandam
voluntatem inftituatur, nihil in hominum mores, uſum-
que vitæ communis potentius, præftantiusve eft. At-
que hac ratione liquet, qualis demum fit ille nexus,
qualisque fubiectio Theologiam inter, et Philosophiam.

D 4

reve-

(*) Contra cautellam hanc præcipue peccant Scholaſti-
ci, ut patet in famoſa altercatione *de Accidentibus ab-
ſolutis*. quamprimum enim cognoverunt S. Synodum
Conſtantienſem contra Wicleſum definiſſe: *manere
accidentia panis, non tamen eorum ſubiectum*. illico men-
tem Concilii ad accidentia in ſenſu peripatetico ſum-
ta reduxerunt, et profanis manibus in myſterium in-
volarunt, quod adorandum potius, quam ſcrutan-
dum eſt.



revera etenim ex eo, quod Theologia quædam principia, et non nullas regulas ex Philosophia mutuas recipiat, plus non sequitur, quam, quod una scientia alteri amica obsequia ministrare valeat; quemadmodum in præsentî providentia Philosophi de Mathesi, et præprimis Geometria fassentur, et experimento didicerunt. Porro si tam Philosophia, quam Theologia circa idem obiectum occupantur, id methodo cuiusvis scientiæ propria contingat, oportet. Extra sphaeram enim activitatis suæ rapitur Scientia naturalis, si veritatem quamdam ob solam revelationem divinam credibilem magis, quam cognoscibilem contemplari cogitur; utpote cui non nisi lumen rationis naturalis, aut sensuum criteria in promptu sunt. Quæcunque autem utroque hoc medio attingi nequeunt, ad altius, sanctiusque forum pertinere, neque amplius inter obiecta cognitionis humanæ referri debent. sic, ut rem exemplo declarer: *DEUM existere, Eumque esse unum, et in omni perfectionis linea infinitum.* Sincerus Philosophus nequaquam ex SS. paginis, aut PP. effatis demonstrat, sed illico ad lumen rationis, ad abstractiones metaphysicas convertitur, et deprehensa insufficientia Entium contingentium ad existendum per se, protinus infert: dari Ens quoddam necessarium, quod sibi, ceterisque entibus contingentibus adtribuendam existentiam omnino sufficit. Hoc autem ens DEUS est, qui nisi infinite iterum perfectus foret, DEUS non esset: cum ens longe perfectius, quod nimirum infinite perfectum esset, denuo excogitari posset. Quodsi DEUS ens infinite perfectum est, Unus sit, oportet: cum æqualem sibi habere, infinitudinem perfectionis tollit, et potius imperfectionem arguit. En! qua ratione Philosophia de obiecto etiam Theologiæ proprio discurret, quin ad rationem supernaturalem recurrat. At vero, si ceptum discursum ulterius promoventes inquirimus: *An Deus existens Tri-unus quoque sit?* extemplo hæret ratio, sensus-

fusque deficiunt manifesto indicio, rem omnem mysterio involvi, ac vires intellectus creati longissime transcendere, et vel ideo ad forum philosophicum nulla ratione pertinere (*).

Rescindantur itaque a Philosophia similes spuriae quaestiones, quas plerumque Scholastici insipida curiositate scientiis naturalibus invexere, abstergantur a frontibus cum Theologiae, tum Philosophiae fuci scholastici, et illico sincera utriusque facies, ac genuina indoles apparebit, et longe diverso nexu easdem scientias inter se colligari deprehendemus.

*Singula quæque locum teneant sortita decenter (**),*

nempe, quæ vere philosophica sunt, tractentur philosophice; in iis autem, ubi naturalis ratio deest, sed solius revelationis, aut traditionis, aut ecclesiasticæ definitionis ratio habenda est, philosophari temerarium, imo impium voco: frustra enim alias intellectum captivari oporteret in obsequium fidei.

Verum perbene adverto, Scholasticos denuo confugere ad laudatum supra Lateranense Concilium, ex quo luculenter inferre tentant: dari materiam philosophicam cum veritatibus revelatis connexam, cum illud in citata Sessione VIII. omnibus & singulis Philosophis in universitatibus studiorum generalium, et alibi publice legentibus districte præcipiendo mandavit: *ut, cum Philosophorum principia, aut conclusiones, in quibus a vera fide deviare noscuntur, auditoribus suis legerint, seu*

D 5

expla-

(*) Tentarunt equidem Lullistæ altissimum hoc mysterium ratione naturali demonstrare. At quam futilia corraferint argumenta, vel ex eo claret, quod manifeste semper supponant id, quod in quaestione est.

(**) Horat. in Arte poët.



*explanaverint, quale hoc est de animæ mortalitate, aut unitate, aut mundi æternitate, ac alia huiusmodi, teneantur eisdem veritatem Religionis Christianæ omni conatu manifestam facere, et persuadendo pro posse docere, ac omni studio huiusmodi Philosophorum argumenta (prout videlicet illa ætate non nulli licentius, quam verius argutabantur) cum omnia solubilia existant, pro viribus excludere, atque resolvere. Laudabilis profecto fuit in hoc negotio S. Matris Ecclesiæ sollicitudo, et rationabilis providentia. Fontem tamen sollicitudinis huius, et providentiæ non pauci Neoterici ex eo deducere tentant: quod illo temporum curriculo ubivis fere locorum secta Philosophorum non minus, ac Theologorum Scholastica imperitaret: cumque Philosophis scholasticis illius temporis impune permissum esset, quæstiones theologicas eodem fere modo discutere, prout etiam scholastici Theologi res philosophicas examinare soleant; imo et ipsi Patres in illa S. Synodo congregati iisdem vel maxime Scholasticorum principiis prævie imbuti essent, inde factum esse arbitrantur: ut Ecclesia receptæ iamiam assuetudini morem gerens, ob plenitudinem potestatis rectam, quoque rationem in subsidium vocaret ad profliganda tam immania errorum monstra. eo autem tempore publice creditum fuit, *rectam rationem, et Philosophiam Aristotelicam unam eandemque rem esse* (*). quod ipsum patere videtur ex oppositis in eadem sessione, circa eandem materiam exceptionibus D. Nicolai Episcopi Bergomensis, et R. D. P. Thomæ Generalis Ord. Prædicat. (***) in dicta enim sessione D. Joannes Archiepiscopus Gneznensis orator Regis Poloniæ ascendit ambonem, & legit quamdam schedulam super fide, et hæc continebat Bullam, quæ incipit *Apostolici**

(*) Ita nunquam satis laudandus Anton. Genuen. T. II. Element. Metaph. in Proœmio n. XXI.

(**) vide Acta Concil. T. IX.

stolici Regiminis &c. „Qua perlecta, petiit, an place-
 „rent Paternitatibus suis contenta in schedula. Et omnes
 „responderunt simpliciter placere, excepto Reverendo
 „Patre Domino Nicolao Episcopo Bergomenfi, qui dixit:
 „quod non placebat sibi, quod Theologi imponerent
 „Philosophis disputantibus de veritate intellectus, tam-
 „quam de materia posita de mente Aristotelis, quam si-
 „bi imponit Averrois, licet secundum veritatem talis
 „opinio falsa est. Et Reverendus Dominus Pater Tho-
 „mas Generalis Ordinis Prædicatorum dixit: quod non
 „placet secunda pars Bullæ, præcipiens Philosophis, ut
 „publice persuadendo doceant veritatem fidei.

Verumtamen modus iste Ecclesiæ mentem inter-
 pretandi in debitam reverentiam peccare videtur; cum
 facili brachio inde inferri posset: ad dogma fidei stabi-
 liendum nec revelationem divinam, nec definitionem
 ecclesiasticam sufficere, sed insuper rationem naturalem
 æqua lance adhibendam esse. has igitur cautes ut evi-
 tem, ego sic existimo: Illo procul dubio ævo exstite-
 re viri, qui rationem naturalem in Adæ filiis stulte
 supra revelationem extulere, ita, ut rectam rationem
 supremam normam credendorum, et non credendorum
 adstruerent; quemadmodum contendit Author Anony-
 mus libri *Philosophia Scripturæ interpretes*. ac cum aliis
 Deistis Anton. Collinus libello *de libertate cogitandi* (*).
 Horum itaque fanaticorum insaniam ut Ecclesia sup-
 primeret, non revelatione tantum agendum esse censuit,
 quam utique tales Philosophastri rationi naturali post-
 ponunt, sed hac ipsa quoque naturali ratione, telis ni-
 mirum ex ipsorum pharetra depromptis; ut ostenderet,
 illorum deliria, et impia dogmata non solum revelatio-
 ni divinæ, et traditioni ecclesiasticæ refragari, sed et
 ipsi

(*) De fatis infamis huius Philosophi vide Christ.
 Gott. Jöcher allgemeines Gelehrten Lexicon T. I. Lit. C.



ipſi rationi naturali, de qua tamen adeo Thraſonice gloriantur : imo eam ipſam rationem naturalem interdum S. Fidei obiectis plus conferre vix poſſe, quam, quod ipſa revelatio de obiecto, et obiectum revelatum nec ſanæ rationi opponatur, neque implicantia quadam involvatur.

Atque hac ratione mentem Concilii fere ad literam ſalvari poſſe autumo, et Theologiam, cum Philoſophia amico foedere conciliari. Theologia enim, quæ felicibus tandem auſpiciis a fermento Scholaſticorum depurata in omnibus fere athenæis literariis, ac regularibus ſodalitiis obtinet, dogmata ſua non niſi ex legitimis fontibus derivat : nimirum ex revelatione divina, Patrum traditione, et infallibili Eccleſiæ, ſummorumque Pontificum definitione, queis fontibus rationem quoque naturalem adiungit. Hac opitulante profundiffima fidei myſteria perſpicaciæ quidem intellectus humani impervia, per ſe tamen non repugnare deprehendit; ea prælucente agnoſcit non ſolum revelationem, traditionem, aut definitionem quamdam exſiſtere, ſed certior inſimul redditur de qualitate revelantis, tradentis, et definientis, de occasione, ac circumſtantiis, revelationis, traditionis, et definitionis &c. atque inde tandem eruitur : mentes fidelium ſinceris, ac rationabilibus motivis impelli ad præſtandum aſſenſum S. Fidei, et dogmatis theologiſ. ſic denique in cuiusmodi negotio naturali ratione uti, eſt philoſophari in Theologia (*), et ſic philoſophari,

(*) Eiusdem mentis iterum eſſe legitur Ant. Genuen. in citato ſuperius procemio, ubi n. XIII. ait : „cum „nemo inducitur ad divinam revelationem acceptan- „dam ſine *motivis* quibusdam, quæ Theologi *motiva* „*credibilitatis* appellare conſueverunt ; hæc quoque „motiva ratio primum hominibus ſuppeditavit, id „quod magna conſenſione Theologi omnes docuere.



phari, est utramque scientiam naturalem, & supernaturalem amico, non ancillari connecti vinculo,

- - - - - *alterius sic*
altera poscit opem, — et coniurat amice ()*.

Ut autem naturalis ratio Theosophiæ opportuna ministeria propinare valeat, disciplinis philosophicis, ac præprimis Dialecticis, Metaphysicis ac Ethicis eam dirigi oportet. Dialecticæ autem nomine non intelligo mechanicum ratiociniorum apparatus, cui adeo officiose Scholastici insudarunt, sed artem illam, ac præcepta, quæ nos ad statuendas nativas rerum notiones perducunt, has legitimis terminis exprimere, expressas sedula comparatione aut conferre, aut separare, atque ita diiudicare, diiudicatas vero aliis communicare edocent. Verbo, talem scientiam indigito, quæ non solum idonea ad veritatem penetrandi media, sed et firmas temperatæ criticæ regulas suppeditat ad verum a falso legitime discernendum. Dialecticæ, seu Logicæ haud dispari ratione adnumeranda est Metaphysica; sed non illa, quæ ieiunas, inutiles, et chymericas prorsus quæstiones complectitur, qualem denuo Scholasticis familiarem fuisse novimus, longe utilius autem Principia, generalesque rerum notiones, velut cognitionum nostrarum bases, ac fundamenta subministrat. Utrique huic scientiæ ea ratione in nitidiorem ordinem redactæ Ethicam quoque si addiderimus, profecto Philosophiæ studium in singulis Asce-
teriis regularibus ad Theologiam præcipue, ac iurisprudentiam seu canonicam, seu civilem perutile, imo et necessarium fore manifeste liquet. illam e diverso Scholasticorum, vel magis Arabum insipidam philosophandi methodum, præterea quod inutilis sit, et his, et aliis scientiis noxiam potius esse, quilibet eo facilius penetra-

(*) Horat. de arte poëtica.



netrabit, quo adcuratius Scholastici Peripati indolem vitio magis Aristotelicorum, quam ipsius Aristotelis depravatam perspectam habuerit.

Hæc itaque Philosophiæ cum eclecticæ, tum scholasticæ vicissitudines, ac momenta postquam seria, & a præiudiciis libera mente, quantum pro tenuitate mea valeo, in periculum vocaveram; eâ tandem me induxere: ut disciplinas philosophicas (quarum necessitudinem ab exordio præsentis dissertationis fixam, ratamque comprobavi) in sodalitiis Monasticis seu temporum iniuria collapsas de novo restituendas, seu Pseudophilosophorum affectata inscitia, et supina negligentia misere deformatas ab ovo usque ad malum reformandas iudicarem. Tollatur ergo inveterata quorundam Monachorum pertinacia, qui scientiam adeo præstantem, artem tam liberalem Scholasticorum *Pædanteriæ* velut turpe mancipium subiecere, ubi ratio, nobilissima utique mentis humanæ facultas nil nisi steriles Logomachias, insulas hypotheses, ac litigia vocabularia, quæ mentem a vero, verique studio avertunt, et ad fabulas convertunt, triturare, et discutere cogitur. Restituatur inclytæ huic scientiæ naturali sobria sentiendi libertas, quæ ductui sanæ rationis, ac sensuum experientiæ subordinata est, et extemplo apparebit: disciplinas philosophicas non solum pristino nitori redditas, sed vel maxime ad veritatem investigandam, aut consolidandam, et utilitatem inde procurandam, vel promovendam (is enim omnis Philosophiæ finis esse debet) summe proficuas, imo necessarias esse: et vel ideo S. fidei, aut Religioni nulla ratione refragari. cum nec dogma revelatum naturali rationi, nec ratio naturalis revelato dogmati opponatur, ut omnes Theosophi vetustiores, una et moderni adversus Robertum Olchot Anglum, veterisque scholæ Theologum (*) ingenue fatentur.

Ad

(*) Ita Franc. Ferrariensis ad l. I. contra Gent. c. 8. apud Anton. Genuen. T. II. in Prooemio n. XII.

Ad hanc proin oeconomiam studia philosophica in
 sedalitiis monasticis instituenda esse arbitror, et ad hanc
 cynosuram ipse ego vela facere contendo. sed ne solus
 ego ex mera novaturiendi libidine in morem hodierno-
 rum (Petit Maitres) sciolorum sapere videar, et in
 prolixam Scholasticorum barbam plus quam profanis
 manibus involasse arguar, ipsissimum monasticorum stu-
 diorum Zelotem Joannem Mabillonium a mente mea
 nullatenus alienum esse commonstrabo. Me Castor! Vir
 ille literatissimus in Tractatu tot vicibus laudato de stu-
 diis monasticis, non solum propositum de reforman-
 dis disciplinis philosophicis impense dilaudat, quin et
 media insuper, ordinemque subministrat, quo attentata
 reformatio affectui queat mancipari (*). Postquam
 enim non solum de necessitate studiorum in Claustris
 regularibus, sed præprimis studii philosophici longa ra-
 tionum serie differuisset, tandem ut insimul caveret, ne
 scientiæ naturales monachorum præsertim iuniorum
 mentes profanas nimis, et curiosas reddant: ex singu-
 lis Philosophiæ partibus *Dialecticam*, *Metaphysicam*, et
Ethicam, Monachis abunde sufficere arbitratur, ut ad
 scripturarum intelligentiam, Patrum Lectionem, verbo
 demum ad theologicum studium dirigantur, et dispo-
 nantur; sunt enim ista præcipuus scopus, ad quem sci-
 entia philosophica in Asceteriis collimare debet. Porro
 ut enumeratæ Philosophiæ partes utiliter, et absque
 scholasticis quisquiliis proponantur, Dialecticam ea me-
 thodo disponendam esse monet, quæ „ veri, falsi, affir-
 „ mationis, negationis, erroris, ac dubii ideas intra
 „ nos gignat. inprimis autem ideam illationis, et conse-
 „ quentiæ, unde scilicet percipimus determinatam ali-
 „ quam enunciationem ex alia sequi: item syllogismum
 „ ali-

(*) Quæ hic consequuntur, fusius quilibet deprehendet
 in citato Tractatu P. II. C. IX. ubi singulariter de stu-
 dio philosophico differit citatus Author.



„aliquem apte concludere, secus vero alium. Ceterum
 „quælibet alia logicalis controversia huc non spectans
 „supprimenda est veluti inutilis, et supervacua. Enim-
 „vero quid prodest e. g. tam acriter, et fufe de Logicæ
 „obieccto disputare? quid inquirere, utrum illud sint en-
 „tia rationis, an termini, qui sunt eorum notæ, ac
 „signa, eoquod de utrisque dialectica pertractet? rur-
 „sus, quid scire iuvat, num universale fiat dependen-
 „ter ab intellectu? an universale genericum, vel sal-
 „tem specificum revera existat ex natura rei? an den-
 „tur entia rationis? an DEUS sit sub prædicamento
 „substantiæ? Pluraque id genus alia in æquivocis ple-
 „rumque tantum consistentia, quæve paucis verbis pos-
 „sent expendi, æquivoca explanando, vel rationes
 „hinc inde mere innuendo, si forte id etiam fieri ex-
 „pediat. - - - Logica igitur utendum est, ut ad re-
 „cte concipiendum, ac ratiocinandum exerceamur, et
 „ut inde dirigatur noster intellectus, non vero ut vi-
 „tietur. Ex quibus verbis manifestum profecto reddi-
 „tur: Logicam, seu Dialecticam non tantum ad veri-
 „tatem aliunde cognitam ordinate disponendam, sed ad
 „eam ipsam insuper inveniendam dirigi; quem finem an-
 „tiquiores Scholastici turpiter neglexerunt. quod dudum
 „conquestus est Franc. Baco (*), cum Logicam illorum
 „ad inventionem scientiarum inutilem, quin ad stabili-
 „endos, et figendos errores potius, quam ad inquisitio-
 „nem veritatis valere, fatis candide profitetur. Longe
 „utilius igitur Religiosus Philosophus circa Dialecticam
 „occupabitur, si primo loco in rei veritatem inquirere
 „tentat per notas mentis humanæ operationes, queis in-
 „primis rerum ideas effingimus, terminis exprimimus,
 „et tandem plures ideas inter se conferentes diiudicamus:
 „atque ne in iudiciis nostris a semita veri deflectamus,
 „per sobrias criticæ regulas horum iudiciorum momen-
 „ta

(*) In novo Organo Aphoris. XI. et XII.



ta exploramus. stabilita dein Dialecticæ parte quasi *Theoretica*, ad *practicam* divertì pronum erit, per quam cognitam, et adinventam semel veritatem (si qua haberi potest) certa methodo, seu *mathematica*, seu *syllogistica*, vel, ut ex infra subiiciendis inclarescet, *mixta*, non solum aliis succincte proponere, sed et communicare addiscamus (*). Hac tandem ratione nullus profecto inficias ibit: *Logicam esse artem recte utendi ratione humana ad veritatem cognoscendam, et oratione ad illam aliis explicandam* (**).

De Metaphysicâ Laudatus Mabillonius pariter asserit: eam Logicæ multum affinem esse, et non nisi prima rerum principia pro obiecto respicere, quæ omnium fere nostrarum cognitionum Bases sunt, et Fundamenta. Hanc quoque scientiam a sæcibus scholasticis similiter purgandam esse vel obvius deprehendet. obiecta igitur scientiæ huic propria dicuntur esse res ab omni concretionem materiali, et corporea abstractæ: talis autem rerum abstractio, et præcisio vel a virtute ingenita humani intellectus, aut ab ipsa pariter rerum natura oritur. ut adeo hæc ipsa scientia in *generalem*, et *specialem* dispesci queat. Generalem distribuendam esse iterum in *Ontologiam*, & *Ætiologiam* arbitror: quarum prior Entium notionem, naturam, et affectiones tum-in-tum extrinsecas pertractat: posterior vero enti-

E
um

(*) In qua providentia neutiquam reprehendere attento divisionem idearum, terminorum, eorumque diversam usurpationem, quam non nulli antiquo-novi Philosophi adornarunt. imo eam scitu illis necessariam fore duco, qui methodo aut pure, aut mixte syllogistica, qualem ipse profiteor, uti velint. nam ubi plura nitent, cur ego paucis offendar?

(**) Ita Cl. P. Donatus a transfiguratione Domini definit Logicam C.I. Prooemii, seu Enarrationis historicæ in Logicam.



um causas, et originem disquirat, ex utraque vero non solum universales rerum ideas, sed adeo sincera eruimus principia, ac axiomata, ut ab erroris periculo immunes rite nos cogitasse, aut iudicasse cognoscamus, et cognita pari mensura aliis clara reddere valeamus. sincerus enim Metaphysicus non ex sterilibus vocabulis, aut levibus coniecturis veritatem rerum discutit, sed rem prius in naturæ tenebris delitescentem ope abstractionis, seu præcisionis mentalis intellectui nostro magis cognoscibilem efficit, cum

*Non fumum ex fulgore, sed ex fumo dare lucem
cogitat, (*)* - - - - -

specialis Metaphysica solam fere *Pneumatologiam* seu doctrinam de spiritibus complectitur. hos enim ipsa natura iamiam ultra entia corporea elevat, et ab omni concretionem materiali abstrahit; cum spiritus nomine intelligitur *substantia intellectu, et voluntate prædita*, quas tamen potentias, seu facultates rudi materiæ convenire posse, nullus certe audebit asserere; nisi cum Hobbesio, Cowardo aliisque Materialistis et sacra, et profana anathematis fulmina in caput suum provocare tentaverit. Præstantiam, et necessitudinem Pneumatologiæ commendare videtur nobilitas obiectorum circa quæ scientia hæc occupari consuevit. de DEO nimirum, de Angelicis spiritibus, de anima hominis et bruti differit hæc scientia; cum quatuor spirituum genera nota sunt. - - Pecoris, Nostræ, Angelicus, et qui condidit istos (**). Atque ob hanc obiectorum varietatem Pneumatologia rite distribuitur in *Theologiam naturalem, Daemonologiam, Psychologiam, et Zoologiam*. Hanc posteriorem doctrinæ de spiritibus adnumerandam quoque censeo; cum non desunt præsentis ætatis Viri et pie-

(*) Horat. in Arte poetica.

(**) S. P. Bernardus in serm. 5. super Cant.



pietate, et doctrina valde conspicui, qui perpensa operationum analogia, qua nobiscum bruta utuntur, eorum animas vere spirituales esse inferunt, licet ab Authore naturæ eas ad finem pariter supernaturalem elevatas esse non constet. alii e diverso tales animas non quidem spirituales, sed neque materiales, bene tamen mediam veluti inter materiam, et spiritum substantiam esse contendunt. Cuinam parti ego pro imbecillitate mentis meæ accedam, inferius patebit. Inter omnes has Pnevmatologiæ partes summa sollicitudine pertractandam arbitror Theologiam cum Psychologia (Dæmonologiam enim, si angelicorum spirituum existentiam, et eas excipiamus facultates, quibus ii ob analogiam cum mentibus humanis pollere videntur, plurimis hinc inde conjecturis involutam esse novimus) (*): in his videlicet naturalis ratio ad consolidandam veritatem supernaturalem præprimis concurrit. Firmissimi enim cardines et veluti Religionis Christianæ bases sunt DEI tanquam entis perfectissimi existentia, et mentis humanæ immortalitas, quibus omnem morigeræ vitæ normam ringentibus frustra Atheis, Deistis, et Libertinis inniti cognoscimus. Atqui utramque hanc provinciam strenue propugnandam suscipit Theologia naturalis, et Psychologia: quarum prior DEI existen-

E 2

tiam

(*) Hinc bene advertit Cl. Joannes Clericus Pnevmat. Sect. II. C. III. *Hic sola ratio in veritate inquirenda nos nequaquam iuvat, agitur enim de naturis, quas expendere non possumus, quoniam cum iis versari nobis non licet, quidquid de iis novimus, pendet ex narratione eorum, qui Angelorum observarunt ministeria. Quid vero ex talismodi narrationibus erui possit, is ipse Author C. I. huius sect. ostendit. nempe 1mo Angelos esse mentes ab humanis distinctas: 2do eas DEO ministrare: 3tio Corporibus, sub humana specie, interdum indutas apparuisse: 4to Ne corpora illa nostris plane similia suspicaremur, ea subito ex adspicientium conspectu ablata, et cuilibet motui, seu ascendendum, seu descendendum esset, apta fuisse.*



tiam moralibus, physicis, et metaphysicis argumentis demonstrat, Eiusdem perfectiones limitibus nullis circumscriptas declarat: imo et Religionis cultum non solum a naturali lumine, sed et ipsa revelatione præscriptum exhiberi præcipit. Posterior vero mentem humanam a putridis Materialistarum sordibus defæctam solius DEI creatoris opus esse commonstrat, illam omnis compositionis materialis expertem, et vel ideo nullius corruptionis, et per consequens, nec mortalitatis capacem esse luculenter ostendit. Id tamen sedulo cavendum reor: ne Philosophus, etiam Religiosus in tali negotio falcem in alienam demittat messem, si per decursum utriusque huius scientiæ ea corradat argumenta, talesque discutiendas suscipiat quæstiunculas, quæ ad Theologos pertinent: cum hac ratione scientiæ naturalis, et supernaturalis ordinem ex integro pervertit. Enimvero sanæ Philosophiæ systema exigit, (quemadmodum huc usque monui) ut naturalis ratio intra eos terminos cohibeatur, quos ultra, citraque nequit pervagari, quin systematis proportio pereat. Sufficiat itaque Philosopho simpliciter retulisse: hanc, aut illam materiam esse de fide, et ad fidem pertinere. adeoque, si fors naturalis ratio deficeret, ut plerumque in mysteriis Fidei fieri amat, Theologorum postea interest, ut ex locis domesticis rei veritatem edoceant. quod si tamen non nulla scientiæ naturalis axiomata superessent, quæ cum revelata veritate nulla ratione concilianda forent; Libethriis indoctior sit, oportet, si illa non magis ad naturalia, quam supernaturalia dogmata adhibenda esse cognoscat (*). Præter Pnevmatologiam addunt non pauci hodie disciplinis metaphysicis *Cosmologiam* quoque, seu doctrinam *Universi* aut *Mundi*.

(*) Bene insuper advertit Cl. Canzius in Meditationibus philosophicis C. XIX. §. 48. *Regulas philosophicas revelationi opponendas non esse.*



Mundi. Ego tamen, cum in ea quam plurima contineri adverterem, quæ per meram intellectus præcisionem vix penetrari queant, quin adminicula physica adhibeantur, integram hanc Metaphysicæ partem facta distributione legitima ad Physicam esse reiiciendam censeo, salva tamen meliori uniuscuiusque opinione. nam

Velle suum cuique est, nec voto vivitur uno ().*

Metaphysicæ subiungit Mabillonius *Philosophiam moralem*, seu *Ethicam*. de qua testatur Genuensis (**): nulla studia aut magis necessaria, aut magis utilia, aut magis iucunda, aut a Viris doctioribus maiori cum laude tractata esse, quam Ethicæ. Est enim Ethica quasi ceterarum disciplinarum fructus, et sine qua reliquæ disciplinæ pondus sunt iners. Monet tamen insuper altesfatus Philosophus, studia hæc rite instituenda esse: nam ut recte suscepta vitam, et societatem fervant, et beatam efficiunt, ita non recte instituta perturbant, atque evertunt, vel ut Vates Venusinus legitur cecinisse: Ethicæ studium

*Æque pauperibus prodest, locupletibus æque,
æque neglectum pueris, senibusque nocebit (**).*

Ut autem hoc ipsum rite instituatur, præmittendam suadet is ipse Author Physicam, Metaphysicam, et Historiam humanam. atque eam ob rem ipse eo inducor, ut Ethica primum post Physicam discutienda proponatur, ne congruis hæc scientia adminiculis destituatur. Ipsa quidem Ethica (seu multitudinem, seu gravitatem obiectorum consideres) in latissimos campos extendenda esset, cum ea omnia officia declarat, quæ

E 3

nobis

(*) Persius Sat. V.

(**) In Arte Logicocritica l. 2. c. 7.

(***) Horat. l. 1. Epist. 1. ad Mæcenatem;



nobis erga DEUM, nosmet ipsos, ac alios supplenda incumbunt. Verum cum non nulli aut temporis angustis ab illa pro dignitate pertractanda præcludantur, vel etiam absque sollicitudine prælegant tam salubria dogmata; inde factum fuisse arbitror, ut hæc Philosophiæ pars pene per negligentiam aliorum interierit. Posset equidem tam supina scientiæ huius incuria per illorum solertiam emendari, et præcipue in conventibus regularibus, quibus Theologiæ moralis explanandæ provincia delata est (*): verum tamen cum et illi præcipue circa eas occupari solent materias, quæ conscientiarum arbitris in promptu esse debent, hinc parum solliciti redduntur de eiusmodi doctrina morali insiti luminis naturalis; atque ideo quasi neglectis foribus et vestibulo per fenestras in medium Theologiæ moralis atrium irruunt. Aequi, bonique igitur ut consulam, aliqua saltem Ethicæ adminicula ad subeundum Theologiæ moralis, ac iurisprudentiæ studium Religiosis Philosophis propinanda esse iudico: ac inprimis quidem proderit præmittere dissertationem de natura hominis morali: de affectibus, et moribus, eorumque signis et characteribus, variisque corporis temperamentis, quæ

(*) Plurimum insuper ad rem facere autumo, si Patres spirituales, tyrociniique religiosi Magistri (ut ipse etiam Mabillonius monet) moralia quædam principia suggerant *de capiendæ veræ emendationis consilio: de sui cognitione: de iugis lucta adversus seditiosos affectus: de Heroicis virtutibus. &c. &c.* quibus non modicum pondus superaddet instituti, ac Regulæ authoritas, cui sese Familiæ sacre devoverunt. pari insimul utilitate novellis Clericis insinuari possunt Obligationes Fraternalis charitatis, mutuæ conversationis, ac denique omnis utilis, et decori studium atque hac ratione veluti rudimenta quædam Philosophiæ moralis mentibus tenellis inferuntur. sed manum de tabula, ne doctos docere velle videar.



quæ omnia Cl. Heineccius (*) succincto ordine completitur, et aptissima subministrant media, per quæ quisvis ad veram sui cognitionem penetrare valet. Dissertationi huic subiici dein meretur contemplatio summi Boni, tanquam ultimi finis in quem homo quilibet ex innato appetitu fertur, in quo etiam illius Beatitas tam naturalis, quam supernaturalis reposita est. Hanc contemplationem peraccomode, excipit discussio mediorum, et actuum humanorum ad consecutionem finis ultimi conducentium (**): studiose dein stabilienda est regula quædam rectitudinis, seu bonitatis, et malitiæ moralis humanorum actuum: in qua discussione singularem mentionem promeretur tot litibus infame *Juris naturæ Principium*. Pronum deinde erit breviter quædam comminisci de habitibus seu bonis, seu malis ex frequentatis actibus oriundis, sive de virtutibus, et vitiis; quorum tamen amplior pertractatio Theologis relinquenda est. Ex recensitis tandem Ethicæ principiis deducantur generales quædam regulæ, quæ hominem dirigant in officiis erga DEUM, semet ipsum, et proximum pro varia vitæ conditione (***). Atque hæc Ethicæ adminicula ad partem saltem sufficere arbitror: fusius autem qui hæc pertractare contendit, consulat egregios Ethicos Pourchotium, Corfinum, Du Hamel, Heineccium, Genuensem,

E 4

(*) Vide inclyti huius Viri *Elementa Philosophiæ rationalis & moralis*.

(**) Ea tamen, quæ de actibus humanis, ac moralitatis regula pertractanda sunt, curto calamo expediri possunt, cum Theologi morales easdem materias latius deducere solent; ut adeo tempus etiam perbreve Ethicis principiis sufficere queat.

(***) Cum in præsentiarum systema philosophicum non nisi Monachis intra septa sua proficuum instituere laboro; ad rem fore arbitror, si Religiosi quoque Philosophi de illis insuper officiis commoneantur, quæ erga



ensem (*), P. Ottonem Aicher, et præclarum opus Ethicum, quod nuper insignis P. Simpertus Schwarzhueber Benedictinus Wessofontanus summo omnium Literatorum applausu publici iuris fecerat.

Suprema tandem Regularis Philosophiæ pars est Physica, seu scientia rerum naturalium, et præprimis corporearum. Huius quoque necessitudinem in claustris regularibus affirmat Mabillonius, cum eam ad moralem Philosophiam plurimum conferre asserit. imo nuper primum Clar. quidam Recentior luculentis rationum momentis arctissimum physicæ cum disciplinis theologicis nexum ostendit, eamque animarum curatoribus perutilem esse commonstravit (**). Verum absit, ut nomine physicæ spuriam illam Scholasticorum scientiam naturalem intelligamus, quæ barbara illa, et fordidissimi metalli ætate in Coetibus monasticis circumferebatur (***) ; illam potius cum Mabillonio Physicam in Athenæis regularibus prælegendam censeo,

erga Superiores, Confratres, Seniores, et iuniores observare tenentur, nisi forte eorum iamiam in annuo tyrocinio certiores redditi sint, ut in superiori animadversione insinuaveram.

(*) Ad præsens negotium apprime inserviet integer Tomus IV. Element. Metaph. huius Authoris.

(**) P. Leopoldus Bivvald S. I. in Alma Græcensi Physicæ Prof. P. O. in Dissertatione de studii physici natura P. III. A. I.

(***) Deformitas physicæ huius tanta erat, ut Author *Spectaculorum natura*, quem plerique aiunt esse Cl. Le. Pluche, palam fateatur: *quod illo tempore, in Monasteriis, ubi scientia naturæ tradebatur, plerumque frater Pharmacopola, aut frater coquus plus sanæ physicæ in suo cerebro possideret, quam frater Lector. vide Schauplaz der Natur 4. Th. 498. Blat.*

seo, cuius præcipuum munus in particularium corporum contemplatione consistit, principiorum naturam perscrutando, ex quibus coalescunt. Obiectum igitur Physicæ præcipuum est *corpus naturale*, cuius originem, essentiam, affectiones, vires, diversosque status opitulante hac scientia contemplamur. Hoc ipsum vero naturale corpus dum Physica in genere attingit, *Generalis*: sin autem in specie considerat, *Physicæ particularis* denominationem fortitur. Physica generalis, meo saltem iudicio, in quinque partes, seu dissertationes discesci potest; quarum prima complectitur *Somatologiam*, seu doctrinam de principiis, essentia, ac generalibus corporis physici affectionibus, quæ ad propriam eiusdem essentiam pertinent. Alteram constituit *Æsdiseologia*, sive doctrina de illis naturalis corporis qualitatibus, quibus id ipsum in sensus animales agere noscitur (*). Cum vero corpus physicum, sicut certo tempore, et loco, ita pariter in determinato statu motus, aut quietis, vel potius minoris, ac remissioris motus exsistere debeat; Somatologiæ, et Æsdiseologiæ subiici possunt *Phoronomia*, et *Statica*, quarum prior doctrinam de motu corporum cum in genere, tum in specie: posterior vero doctrinam de æquilibrio eorundem, qua solidorum, qua fluidorum complectitur. Utrique tamen præmittendam esse opinor *Dynamicam*, seu doctrinam de viribus corporum relate ad illorum motum, aut quietem. Singulis hisce dissertationibus servata proportionem interferi possunt sensuum testimonia experimen-

E 5

rimen-

(*) Solent equidem non pauci Philosophi hanc de qualitatibus sensibilibus dissertationem ad Physicam particularem reiicere, ubi de obiectis sensuum externorum agunt: consultius tamen mihi visum est, in hoc negotio ordinem magis naturæ insequi, et ea, quæ omnibus corporibus communia sunt, eo in loco pertractare, ubi eorundem generalis notitia instituitur.



rimentis comprobata, sed adhibita iterum moderatione. nam quantum ad physica experimenta attinet, monet de-
nuo Cl. Mabillonius: Non nulla ex principalibus suppo-
ni poterunt, quæ iam ad praxin redacta leguntur. Ve-
rumtamen non expedit, ut Monachi hisce curiositatum
generibus operam navent, tametsi non nihil utilitatis
inde obvenire queat (*).

Physica generali hac ratione in meliorem ordinem
redacta ad specialem transire oportet. Hæc scientia
corpora præcipue in specie considerat, quæ familiari
divisione a Physicis in viventia, et vitæ expertia di-
tribuuntur. Atque eam ob rem scientiam hanc bifa-
riam dispescere mihi visum est, quarum una pars ad
Megacosmum altera *Microcosmum* respicit. Priorem con-
stituit *Cosmologia*, seu scientia Mundi universe spectati.
Hæc aspectabile hoc universum triplici contemplatione
examinat: *Metaphysice* nimirum, *Mathematice*, et
Physice. Tertiæ huic contemplationi subiacet *Ura-
nologia*, *Meteorologia*, et *Geologia* cum *Hydrologia*. qua-
rum

(*) Sit mihi fas non nihil a cynosura methodi Mabillo-
nianæ in hoc negotio discedere, cum usum experi-
mentorum satis dilaudare nequeo. Illorum enim ad-
miniculo Auditorum intelligendi, et penetrandi vim
longe commodius adiuvari expertus sum, quam si in-
tegra volumina experimentis, et relationibus confer-
ta illorum oculis subiiciantur. Adhæc, si machinæ
quædam pro instituendis tentaminibus ad manus sunt;
multum certe temporis aliis consecrari potest mate-
riis, quod alias in describendo machinarum apparatu,
applicatione, et effectu consumendum esset. suffice-
re tamen existimo: si communia Electricitatis, ac
Antliæ pnevmaticæ tentamina iuvenibus Clericis ex-
hibeantur; vel non nulla ad Opticam pertinentia sub-
ministrentur, cum hac ratione illorum curiositati pro
temporis usura abunde satisfieri possit.



rum prior continet doctrinam eorum corporum, quæ in sphaera coelesti circumrotantur: Altera circa illa phaenomena tum hypostaticatum emphatica occupatur, quæ in sphaera elementari comparent: utraque vero postrema illa disquirat corpora, quæ in sphaera terrestri, et eiusdem Atmosphaera, et intimis visceribus hospitantur. Cosmologiam excipit *Anthropozoologia*, seu doctrina de corpore animali, et præcipue hominis, in qua præter *Osteologiam*, ac *Neurologiam*, quarum princeps munus est, compagem ossium, ac nervorum (a quibus animalis sceleti ædificium sustentatur) industrie considerare, studiose attendenda est Oeconomia sensuum cum externorum, tum internorum. reliqua vero, quorum notitia non nisi chirurgos, et medicinæ cultores condecet, tutius omittuntur, quam fusius pertractantur: oportet enim, Monachos, ut magis in ea, quæ sunt spiritus, indagent, quam molis carnalis curiosa nimis sollicitudine afficiantur, quæ honestati religiosæ derogare videtur. Ut autem Physicus Religiosus nullum corpus seu vivens, seu non vivens intactum reponat; Anthro-Zoologiæ adiiciendam reor *Phytologiam*, seu doctrinam, et Anatomem de Plantis; Longior tamen materiæ huius dilucidatio otiosis naturæ scrutatoribus transcribenda esse videtur; ne nimiae biennalis temporis angustiae (in quibus modo studia literaria, modo exercitia Religiosa vi regularis consuetudinis in Choro, et communitate introducta alternas vices subeunt) Religiosum Philosophum plura parantem in termino suffocent; qui utique in tali providentia redditur.

*Infelix operis summa, quia ponere totum
nesciet. (*)* - - - - -

Affo.

(*) Horat. in Arte poet.



Assolent insuper hodierni Physici novaturientes disciplinis physicis adiungere Mathesin, sororio, ut aiunt, vinculo iisdem connexam. Verum eam ipsam pure in se spectatam non solum Religioso sed omni Philosopho supervacaneam, et inutilem esse ipse Author Artis cogitandi asserit, cum ait (*): *scientiæ istæ (nimirum Astronomia, Geometria &c.) non tantum sinus, et recessus parum utiles habent; sed omnino inutiles sunt, si in se, et propter se solæ spectentur. Homines non sunt nati, ut in mensurandis lineis, examinandis angulorum rationibus, variis materiæ motibus speculandis consenescant. Mens eorum sublimior est, vita brevior, et tempus pretiosius, quam ut rebus adeo vilibus occupentur.* Absit tamen, ut et ego has cavillationes hodiernis Philosophis oggeram, qui utputa tam admirabili commercio Mathesin scientiæ naturali haud exiguo Reipublicæ emolumento associarunt. Id unice contendo: eam iuxta mentem Mabillonii Religiosis intra septa claustrī cohærentibus, et commorantibus (ad hanc enim præcise providentiam præsentis systematis de Philosophia regulari modicus hic conatus collimat) incongruam esse. „Inde namque „(pergit profundissimus hic coenobita) inde namque „nimium distrahuntur, et libera spiritui facultas furripitur ad iis vacandum, quæ sunt Monasticæ conversationi magis consentanea. Rursus tempus, quod superest post exercitia communia, satis non esset ad explendam cupiditatem maiora semper indagandi in istis scientiarum generibus. Præterea multa ad hoc instrumenta non sine magnis sumptibus requiruntur; pluraque fieri debent experimenta, queis valde distorquentur animi, ac proinde Ascetas minime decent. Verum eodem modo vivimus tempora, ubi Mathematicas disci-

(*) In Præfat. ad Artem Cogitandi ex citata iam semel versione Cornel. ab Ackersdyck.



disciplinas plus iusto iamiam scientiæ naturali insertas esse novimus : hinc, ne contra torrentem agere videar, cum eodem Mabillonio enuntio : Etiam Religiosis prodesse aliqua saltem *Geometriæ* principia, et quatuor species, seu præcipuas *Arithmeticæ* regulas, et *Algebræ* fundamenta non ignorasse ; reliqua vero Monachis non videntur adeo necessaria. Hæc autem subsidia ex *Mathesi* petita *Physicæ* generali in modum *Præcognitorum*, aut *Prolegomeni* præmittenda esse autumo, cum illorum usus ad penetrandas vires corporum, ac *Leges* motus cum simplicis, tum compositi ad maximam partem valet ; prout etiam Author *Mundi aspectabilis* (*) perbene advertit, cum ait : *Mathesin quod attinet, illa plane ad naturalium rerum intelligentiam est necessaria : cum enim DEUS omnia fecerit in numero, pondere, et mensura, in quibus tota consistit Mathesis, nemo certe rerum in hoc mundo ordinem, proprietates, proportiones, vires, agendi modos sine hac intelliget, aut explicabit, ut adeo hæc omnia ad unam scientiam pertinere videantur, nempe Philosophiam perfectam.* cum vero hæc scientia difficultatum spinis undequaque referta sit, ut animos vel ad extremos usque sudores exagitet, aut tædio tandem afficiat, hinc altesatus Author provide suadet : ut omnia sic temperentur, ne iuvenes animi facile absterreantur : præsertim si talia referantur problemata, quæ præter intensissimam ingenii perspicaciam, assiduam quoque meditationem exigunt. sufficiet igitur naturalis scientiæ tyronibus ex *Mathesi* mutuasce præter *arithmeticam vulgarem*, etiam *speciosam* saltem quoad principia magis generalia. Ex *geometria* vero notiones linearum, angulorum, triangulorum, circuli, figurarum solidarum &c., de quibus etiam pro exercitatione aliquot *Theoremata* leviora institui possunt. Atque hac ratione
Phy.

(*) Cl. P. Jos. Falk in *Præfat.* huius operis. 1



Phyfica non minus utilis quam iucunda erit, fi moderatis hisce Mathefeos subsidiis adiuvetur. Talis itaque scientia naturalis, feu Phyfica tam generalis, tam particularis athenæis monasticis restituenda est, quam brevi calamo hucusque descripsi: ex qua utique non solum maior utilitas promanat, sed et ingenia longe melius per eam acuuntur, quam per inanes scholasticorum subtilitates, quibus aliquando Peripatetici integram naturalem scientiam misere obruebant, et deformabant; ita quidem, ut insignis Vir Christianus Thomafius palam profiteatur (*): *omne tempus pro perduto esse iudicandum, quod in Physicam Peripateticorum impenditur, ita inepta, et stulta ibi sunt omnia.*

Enumeratis igitur totius Philosophiæ partibus, et eo ordine digestis, quo utiliter in coetibus religiosis studia philosophica institui posse iudicaveram, ad eam tandem devolvimur quæstionem: qualis methodus in his disciplinis pertractandis adhibenda sit? sive an illa antiquorum Scholasticorum sit retinenda, vel ad genium præsentis ævi illa Mathematicorum et Geometrarum apprehendenda sit, quæ non nisi synthetice, aut analytice incedit? illa enim Socratica (seu potius Platonica) per dialogos philosophandi, et sermocinandi ratio, licet in se peramæna, ac valde temperata sit, et insuper illam Cl. Joannes Clericus cum multis aliis summis deprædicet laudibus (**), ad studium quoddam systematicum, quale tamen disciplinæ naturales exigunt, minus conveniens videtur. Fateor equidem methodum mathematicam, seu syntheticam, quæ præsentì temporum curriculo in omnibus coetibus literariis domestica, et familiaris evasit, pro capeffendis scientiis in se omnino aptam,

(*) In introductione ad Philosophiam aulicam C. XI. §. 34.

(**) Log. P. III. C. IX. de Argument.

aptam, et utilem esse; et ideo haud abs ratione a viris profundissimis in ordine ad veritatem inveniendam, ac stabiliendam usurpari. Verum non defunt momenta, quibus æque multi huius methodi usum carpunt, eamque non quidem in omni eruditionis genere roboratis, novitiis tamen in foro literario ingeniis minus proficuum, imo prorsus molestim, ac implexam nimis esse contendunt; quodque multiplici experientia comprobare fatagunt (*). Discipulos videlicet languere, et disturbari, si sensa sua ad rigidas methodi istius leges exprimere, ac proferre cogantur: si in scriptis ad plures propositiones quasi concatenatas ob insertas frequentes citationes repente subsistere, atque ad priora mentem ætatis vitio vagari assuetam reflectere, aut præmissarum aliunde suppositarum veritatem perspicue recolere, connexionem acutissime scrutari, atque prolixam interdum seriem conclusionum velut per foritem deductam extricare iubeantur. Ut igitur ab hac molesta controversia memet expediam, placuit mihi præprimis ad munus prudentis Doctoris respicere; cuius interest, ut doctrinam, et methodum non suo genio, sed discipulis præcise accommodet, neque enim omnes omnia æquis humeris sufferre valent, nec de omnibus cum omnibus differendum est. Eum in finem in Asceteriis monasticis adeo expeditam docendi methodum assumendam esse aio, quæ omnibus et singulis discipulis pro quibusvis literarum studiis usuvenire possit. Talem vero methodum ex sobria commixtione syntheticæ, et scholasticæ, seu melius syllogisticæ derivandam esse reor, quæ veluti *Syncretistica* nuncupari promereatur. Atque hanc methodum tradendæ cum primis Philosophiæ peraccommodam cenfeo; eo quod tam ad veritatem inveniendam, quam ad eandem stabiliendam, promovendam, diu-

dican-

(*) Id ipsum conqueritur Cl. P. Mako S. J. C. IV. P. II. in Institut. Log. n. 140.



dicandam, et cum aliis communicandam utiliter defer-
 viat, quem finem omnes utique disciplinarum philoso-
 phicarum Promicondi insequi solent, et tenentur. Ar-
 tificium enim syllogisticum solitarie spectatum (quod mi-
 hi fas sit dicere bona omnium Scholasticorum venia) ad
 quamdam veritatem inveniendam nihil conducit, cum
 magis veritatem aliis adminiculis iamiam inventam præ-
 supponat, ut perbene arguit Verulamius, dum ait (*):
*Syllogismus ad principia scientiarum non adhibetur ad me-
 dia axiomata frustra adhibetur, cum sit subtilitati natu-
 ræ longe impar. assensum itaque constringit non res. Syl-
 logismus ex propositionibus constat, propositiones ex ver-
 bis, verba notionum tesserae sunt. itaque si notiones ipsæ
 (id quod basis est rei) confusæ sint, et temere a rebus ab-
 stractæ; nihil in iis, quæ superstruuntur est firmitudinis.*
 Promptiora igitur ad veritatem securius, faciliusve in-
 vestigandam, ac adinveniendam auxilia suppeditat me-
 thodus synthetica, seu compositionis (**), per quam
 nimi-

(*) In novo Organo Aphorif. XIII. et XIV.

(**) Methodus, quæ ad veritatem inveniendam ex na-
 tura sua ordinata est, esset quidem *Analytica*, synthe-
 tica enim magis *methodus doctrinæ* dicitur. verum quia
 hæc nimis late diffunditur, ac nimis scrupulis subii-
 citur. syntheticam tanquam arctiorem, limatiorem,
 brevior, fortiusque convincentem tutius adhiberi
 existimo; præsertim cum et hæc veritati eruendæ ali-
 quomodo præsto sit, prout advertit Joan. Clericus Log.
 P. III. C. I. *In analytica methodo, ex veritate particulari
 nota, ad alias quæ pertinent ad rem aliquam singularem
 progredimur. In synthetica vero methodo, generales quasdam
 veritates proponimus, ex quibus veritates singulares deducimus.*
 Ipsæ autem veritates generales applicantur nobis po-
 tissimum per observationes, et experientias sensuum,
 quæ deinde nos ad aliam veritatem deducendam ma-
 nuducunt. Hoc interea non diffiteor, methodum
 syntheticam interdum nullo modo adhiberi posse, ut
 in physica non nunquam fieri amat: interdum vero
 cum regulis analyticis coincidere. Prudentis dein
 erit, in hisce casibus æqui bonique consulere.



nimirum a notioribus, et facilioribus incipimus, atque hinc pedetentim ad difficilia, et ignota progredimur; qua in parte methodus synthetica cum analytica coincidit. Postquam vero per legitimas notiones ex fundamento evidenti, aut certo veritas quædam specialis eruta fuit, ea tandem ratiociniis ad formam syllogisticam compositis stabilienda, et ab Adversariorum replicis vindicanda est. Hæc enim philosophandi ratio iuxta requisitas methodi dotes *brevis* est; cum ad unum medium terminum veritatis examen restringitur, superflua prolixitas rescatur, et oppositis argumentis absque mora satisfacit: est *clara*; eo quod obscura dilucidat, dubia distinguit, et fallacias dissipat, ac non nisi claris notionibus et terminis utitur: est *solida*; quia ex præmissis legitime comprobatis, aut demonstratis ad legitimas pariter conclusiones progredimur; tantoque pollet constringendi robore, ut intellectus bene dispositus cognita ratiocinationum oeconomia non possit non assensum propositæ veritati præstare. silentio prætermitto plura alia commoda ex methodo syllogistica redundantia, quibus aut brevitati memoriæ succurritur, aut imbecillitas iudicii in non nullis adiuvatur. et animi discipulorum in eruditis conflictibus (quorum perutilem esse consuetudinem inferius declarabo) debitos intra cancellos continentur. Non nescio equidem hanc methodum ob aliquorum garulorum Sophistarum licentiam, seu mage inscitiam in steriles verbivelitationes degenerasse; sed expedit, ut turpis hic artis syllogisticæ abusus radicitus eliminetur, et sobrius eiusdem usus athenæis philosophicis restituitur, quemadmodum Viri literatissimi, et in ipsis etiam disciplinis mathematicis exercitatissimi hodiedum perquam utile fore agnoverunt (*): ut adeo illorum nova-

F

turien-

(*) In Monasteriis hoc artificium syllogisticum præcipue attendendum esse puto; ne Theologiæ Professores,



turientium ambitio, qui omnem formæ syllogisticæ usum
nafo suspendunt adunco, aut iuvenilis, aut Thrafonica
audiat.

Hæc igitur syncrētistica methodus hoc ordine in-
stituenda esse mihi videtur.

„Inprimis cuilibet materiæ, cuius periculum
„facere contendimus, præmittantur *observationes*
„et *experientiæ*, quæ nobis aut sensus externi, aut
„interni rite tamen applicati, et dispositi suppedi-
„tant, si revera haberi possint.

„Observationibus subiiciantur *Definitiones*, et
„*Divisiones* rerum, quas observatione usurpavimus.

Definitionibus, ac Divisionibus subiungantur
„pro opportunitate *Axiomata*, si locum habere
„queant: aut *Corollaria*, aut *Scholia*, quæ penitiori
„inspectioni materiæ discutiendæ deserviunt.

„Quodsi ipsa materia controversiam patitur, il-
„lico figendus est *Status quæstionis* iuxta singula
„materiæ controversæ momenta.

„Posito statu quæstionis enumerentur variorum
„Authorum *sententiæ*, aut *Hypotheses* circa mate-
„riam controversam. ubi studiose recensendum est,
„an et isti Authores easdem nobiscum adstruant
„Observationes, Divisiones, ac Definitiones &c.
„secus enim illorum principia fideliter referenda
„sunt.

„Exant-

res, qui plerumque hoc artificio tam in dogmaticis,
quam speculativis (ut aiunt) sobrie utuntur, conque-
ri possint: Philosophiam ad scientias theologicas aut
parum, aut nihil conducere.



„Exantlatis Authorum placitis, ad eorumdem
„discussionem descendendum est; ita, ut posita
„quadam *Propositione*, aut *Conclusione* infirmita-
„tem opinionis ab hoc, vel illo Authore susceptæ
„ostendamus. Hoc autem, cur per syllogismos,
„aut Enthymemata, methodo videlicet syllogistica
„fieri nequeat? non video. Interim tamen exi-
„stimo: nullum Philosophum teneri alterius opi-
„nionem præcise refellere. per hoc enim, quod
„alicuius opinionis valorem evertam, inepte uti-
„que inferrem, meam assertionem veriore, aut
„probabiliorem esse. secure igitur abstinere licet
„a refutatione aliorum Authorum; dummodo pro-
„pria assertio ab oppositis Adversariorum sufficien-
„ter vindicetur (*).

„Enervatis sententiis, aut hypothesebus decre-
„toria tandem propriæ assertionis conclusio, aut
„Propositio statuenda est: quæ cohærenter cum
„datis principiis [methodo identidem syllogistica
„deducenda est.

„Stabilita ea ratione asserti Conclusionem, nisi
„adiicienda adhuc sint quædam Corollaria, aut Scho-
„lia pro maiori soliditate, vel claritate Propositio-
„nis, transgredi oportet ad diluenda Adversario-
„rum opposita; seu *obiectiones*, quæ denuo forma
„syllogistica institui possunt, et eadem ratione re-
„solvi.

Quodsi vero materies pertractanda litigiis sub-
F 2 iecta

(*) Hæc in solatium illorum animadvertere volui, qui
pacificos Philosophos agere student.



„iecta non est, neque Authores in diversas opinio-
 „nes abeunt; Propositiones decretorias illico post
 „Definitiones, Divisiones, et Axiomata &c. col-
 „locandas esse autumo, Scholia vero, et Corolla-
 „ria easdem subsequantur: in quibus, si opportu-
 „nitas tulerit, res ad Propositiones adhuc perti-
 „nentes disquiri poterunt.

„Cum vero ex recepta in Scholis assuetudine
 „non nulla in Philosophia pertractantur, quæ cum
 „rebus fidei, scitisque theologicis connexa esse sci-
 „mus, ita tamen, ut assensum, quem iisdem ex-
 „hibemus; iuxta exigentiam motivorum adorna-
 „re soleamus; hinc, licet pro tali casu philoso-
 „phandum omnino non esset (prout ex hucusque
 „dictis colligere licet) ea tamen dogmata, quæ
 „certitudine fidei gaudent, qualia v. g. sunt
 „Mentis humanæ Origo, Spiritualitas, Immor-
 „talitas, Libertas &c. aliqua saltem mentione
 „attingi debent: ne ratio humana illud for-
 „san impossibile censeat, quod tamen authori-
 „tas per fidem applicata seu divina, seu ecclesiasti-
 „ca, credibile non minus, ac possibile efficit. Ea-
 „propter, ut naturalis ratio S. Fidei subordinetur,
 „scholion, aut brevior quædam Propositio ante
 „hypotheses, seu varias opiniones Authorum præ-
 „figenda est: in qua ex SS. paginis, traditione ore
 „Patrum confirmata, et Conciliorum effatis osten-
 „datur, materiam esse de fide, quod si forte ex
 „iisdem fontibus quidam textus ad speciem oppo-
 „siti esse videntur, ii confestim post statutam Pro-
 „positionem de fide in modum Corollarii collocan-
 „di sunt, et resolvendi, aut declarandi, sed omni-
 „no breviter; ne temere in illud munus invole-
 „mus, quod Theologis proprie incumbit, neque
 „amplius

„amplius intra naturalis scientiæ limites contine-
tur (*).

Cogitabam equidem pro illustranda methodi huius
syncretisticæ œconomia Paradigma, seu tentamen adii-
cere, ut eo melius quivis animi mei intentionem dispi-
cere queat. Verum longe felicius illud exhibet Cl. P.
Fortunatus a Brixia immortalis nominis Philosophus in
Philosophia Mentis et sensuum sex tomis comprehensa.
Hanc igitur methodum nec nimis scholasticam esse, et
contentiosam, nec mathematico rigore plus iusto per-
mixtam vel intuenti patet: sed cum media via incedat,
singulis Philosophiæ discipulis rite instituendis facilis,
atque perutilis visa est mihi. per eam nimirum consuli-
tur brevitati, claritati, et soliditati: discipuli concin-
no ordine studia, et contemplationes protelare addi-
scunt: ad extricandas impigre difficultates cordati, ac ro-
busti redduntur, et ad easdem ordinate, et clare pro-
ponendas feliciter manuducuntur, nec non ab oppositis
argumentis sese expedire norunt. Hoc autem si iuve-
nes Philosophiæ candidati præstiterint ope mixtæ huius
methodi, nullus me hercle dubio locus superesse poterit,
quin methodus syncretistica in cunctis regularibus sode-
litiis aut retinenda, aut introducenda sit.

F 3

Eum

(*) Incidi aliquando in manuscripta cuiusdam Viri in sci-
tis philosophicis perquam versati. Et ecce! cum in
iisdem ad materiam de libertate mentis humanæ per-
tigissem (quam in prima facie iuxta sobriam philoso-
phiam egregie pertractat) quatuor, aut quinque offen-
di paginas vindiciis et apologia refertas de S. P. Au-
gustino eiusdemque scriptis *de libero arbitrio*. laudabunt
forsan aliqui factum hoc: Ego autem Philosophum
istum illi pictori apud Horatium in art. poët. similem
esse existimo, qui *Delphicum silvis appingit, fluctibus*
aprum.



Eum itaque in finem consultius longe videtur, si Professores, Lectores, vel quibuscunque demum tradendæ Philosophiæ munus incumbit, tyronibus suis scripta dicent, ut iterum præclare monet laudatus sæpe Mabillonius (*): „enim vero ex uno capite (ait) cuilibet Magistro negotium plerumque faceffit Authoris scholastici „(*Classici*) prælo editi opiniones mere explanare; difficillimum quippe est, quod in cunctis sibi plane arri- „deat. Præterea parum existimationis, authoritatisve „apud discipulos suos sibi conciliat, nisi scripta proprio „marte composita iisdem tradiderit. Insuper Magister, „qui sapiens, prudensque habetur, multo melius propria scripta discipulorum ingenio poterit conformare, „quam si librum impressum iisdem explicet (**). rursus scientiæ vividius discipulorum mentibus imprimuntur, si calamo exarentur, quam si pure legantur; possunt siquidem animo distrahi, dum a Magistro explicatur Author; at vero dum scribunt, se cohibent, cohibere autem se nequeunt, quin aliqua ratione attentos eidem se præbeant Auditores, præsertim vero cum scriptorum explanatio continuo subsequitur. Tandem „universalis omnium fere temporum praxis iugiter existit, scripta adolescentibus tradere; unde etiam palam „evincitur modus hic longe utilior esse. Id tamen serio cavendum esse reor; ne scripta nimis prolixè deducantur brevitati enim summopere studendum suadet citatus Mabillonius loco itidem citato. „ne iuvenes inutiliter defatigentur in exarandis prolixis tractatibus. Id ipsum

(*) In tract. de stud. Monast. P. II. C. X. n. I.

(**) Plerumque insuper Viri scientiarum cathedris destinati in matura præprimis virilitate calent scribendi studio; et ad Cleanthis lampadem expallescere solent, ut in classe *Authorum* collocari mereantur. commune etenim omnis generis literatorum calcar est: *digitis monstrari, et dici, hic est.*

ipsum quoque parcitas temporis in coetibus regularibus postulare videtur. si nimirum horas servitio divino, exercitiis regularibus, refectiōi, scriptioni, repetitioni destinatas a penso diurno subtraxeris, exigua profecto temporis portio superabit, qua tyrones ad studia domestica subeunda uti possunt. quid, quod ob nimiam prolixitatem mentes studentium tædio ac nausea sensim obruantur, et alacritas illa, cum primævo fervore tandem exspiret, quæ discentium industriam continuo animare assolet? Vitio huic avertendo cum primis studere oportet illos, qui occurrentem quamvis materiam coadervatis obiectionibus, sterilibusque quæstiunculis augere amant. præterea enim, quod auditoribus suis temporis usuram subtrahant, imbelles isti, aut terrores panicos sese pati profitentur, aut congrua principia, si non ignorasse, saltem neglexisse arguendi sunt: imo, quod deterius est, nonnunquam muscam fugunt, et Camelum deglutiant, et non nisi nodum in scirpo plerumque aucupantur. At vero monendum restat, ne, dum prolixam charybdim evitare parant, incidant in scyllam brevitatē, ita, ut, cum breves esse laborant, obscurifiant. commune enim fert adagium: compendia esse obscura, et vel ideo tyronum captui minus accommoda. Omnis igitur sollicitudo, ac industria acuenda est, ut scripta nec nitida claritate, nec succincto ordine destituantur: præsertim vero cavendum est barbarum scribendi genus, quod antiquis Scholasticis frequens fuisse scimus, turpemque Pædantismum olet.

Scriptis ea ratione ad iustam brevitatē, venustamque claritatem ac soliditatem compositis utiliter accedere potest succincta pariter explicatio, qua præcipue illi tyrones iuvantur, qui aut modum studendi ignorant, aut hebeti non nisi acie ingenii ob mentis brevitatē pollent. Explicationem pari utilitate excipit Repetitio, in qua



Magistris primum erit explorare, qua ratione candidati scripta, datamque scriptorum explicationem penetraverint; imo plurimum facundiæ tyronum consulitur, si in repetitione datas quæstiones permutatis nonnihil vocabulis, constructionumve nexu hinc inde inverso resolvere cogantur. Repetitioni magno certe commodo inserviunt Exercitationes scholasticæ; quas *Circulos* vocare solemus. In his ex tyronibus unus defendentis, alter oppugnantis munus suscipit. Prior incipit enarrare seriem materiæ iniunctæ inchoando ab observationibus, aut definitionibus, et singula eo ordine persequitur, quàm superius ostendi: confutatis dein opinionibus adversis, et decretoria conclusione firmata alter methodo syllogistica difficultates opponi solitas in medium profert, quas prior mox fideliter resumit, et habita proportionem aut legitime distinguendo, aut negando, dataque negati ratione resolvit. sedulo tamen attendendum est Magistris, in quorum præsentia exercitationes istæ celebrari debent, ne ambo tyrones ad præcipites clamores devolvantur, quibus alter alterius verba suffocare assolet: cum hac ratione non solum in modestiam religiosam, ac virilem peccant; sed plerumque extra statum quæstionis prolapsi in tenebras abeunt, imas summis commiscent, ita, ut utriusque obiectiones ac responsiones nil aliud sint, quam

Non bene iunctarum discordia semina rerum ()*.

summe proficuum igitur erit discipulis, si Professores pacato animo ipsos disputare doceant, juvenilem fervorem temperent, gesticulatoriosque motus ac situs, qui raro deesse solent, acriter improbent (**). Ex hac autem

(*) Ovid. l. i. Metam.

(**) Plura de hac animadversione suppeditant Cl. Anton. Genuen. *de methodo disputandi* in arte Logico-critica.



autem exercitationum industria frequentia tyrones tandem expediti redduntur ad edenda quoque publica haustæ doctrinæ specimina, si nempe in confesso aut suorum confratrum, aut aliorum literatorum positiones quasdam controversas defendendas suscipiunt.

Repetitiones non minus, ac dialecticas hæcæ exercitationes in physica generali, et speciali plurimum promovere solent experimenta, si forte quædam machinæ ad manus sint: cum per ea Phantasia longe vivacius afficitur, quam per meram enarrationem. Namque

*segnius irritant animos demissa per aurem,
quam quæ sunt oculis subiecta fidelibus - - (*)*

quamprimum vero eiusmodi tentamina producenda suscipiuntur; illico discursus instituendus est: quæ experimenti causa sit? quave ratione in his, illisque circumstantiis applicata agere solet? neque a re alienum erit, si discipuli non nulla problemata arithmetica, et theoremata geometrica, sed non nisi leviora resolvere addiscunt, cum hac ratione intellectus illorum expeditus redditur ad capeffendam materiam de motu et quiete corporum, prout ea præsentî ætate pertractari consuevit.

F 5

Hæc

tica. P. Hauser, et Udalricus Weis in libro *de emendatione intellectus humani*. ex quibus valde utiliter discipulis quædam huc pertinentia prælegi possunt. Interim tamen fateor: clamositatem in disputationibus tam firmam civitatem obtinuisse, ut vix amplius ex ea deiici possit.

(*) Horat. in arte. poët.



Hæc tandem totius Philosophiæ regularis oeconomia est, hæc genuina illius facies, prout illam dispo-
nere cogitabam eum in finem, ut tyronibus religiosis
utilis evaderet, neque molestis mathematicorum spinis
obrueretur, aut decrepitis scholasticorum nugis ac cre-
pundiis perverteretur. Atque ut Auditores Philosophiæ
huius, cum ad disciplinas theologicas, seu dogmaticas,
seu morales transvolant, eiusdem scientiæ usum habere
queant, artificium dialecticum ubique adhibendum
esse censui, et illarum notionum, ac terminorum,
saltem faciendam esse mentionem iudicavi, quos non
nulli Theologi ex Philosophia vel supponere, vel mu-
tuos accipere amant. Usquedum sanctiores theosophiæ
disciplinæ unanimi tandem Literatorum consensu, iun-
ctisque manibus a Scholasticorum speculationibus depu-
ratae in melius reformatur, et prætenus ille nexus
Theologiam inter, et Philosophiam, ancillarisque servi-
tus in auras penitus discedat, et scientiæ naturales pri-
stinæ ac nativæ libertati restituantur, quod, ut eo fa-
ciliori brachio, breviorique temporis intervallo contin-
gere queat; plurimum conducere arbitror sobriam sen-
tiendi libertatem, seu eclecticam philosophandi rationem.
quod ipsum pariter persuadere videtur Mabillonius,
cum in suprascripto capite ait: „Qui Philosophi nomine
„vere gloriantur, nullius unquam authoritati, doctri-
„næque despondet, sed tamdiu suoapte ingenio medi-
„tatur, donec luminis naturalis, et inconcussæ verita-
„tis principium nanciscatur, de quo non amplius queat
ambigere,,. Absit tamen, ut hac ratione longævam
consuetudinem quarundam regularium Familiarum re-
prehendam, quibus fixum, ratumque manet, unius
Authoris, et Magistri placitis tenaciter insistere. Id so-
lum contendo, et confidenter assero: rationes, quæ
pro eclectica philosophia pugnant longe saniores, ac fir-
miores iis esse, quibus persuadere solent libertatem sen-
tiendi



tiendi ad verba unius Magistri restringendam esse. Nam Imo: non ideo (utor denuo verbis Cl. Mabillonii) non ideo rerum scientia acquiritur, statim ac Authoris innotescit opinio, quacumque aliter sentiendi, aut scribendi præclusa facultate. II. Sæpe sæpius temporis multum frustra transigitur, germanum vestigando proprii Authoris sensum, speciatim in aliquibus controversiis, quas ipse subobscurè resolvit. III. Hinc ea penitus non declinantur, quæ timentur absurda, hoc est, circa opinandi libertatem; Magister enim non nihil acutus, Authorem quempiam ad proprium sensum iugiter potest exponendo trahere, ita, ut in cunctis sibi patrocinari videatur (*). IV. In philosophicis aliunde unicuique liberum esse debet suo pte nutu de rerum natura sentire. imo scrutandæ veritati plurimum obest ita iurare in verba Doctorum, ut horum authoritati haudquaquam liceat refragari. V. Isto potissimum loco Divi Augustini normam sequi oportet, asserentis: quantavis authoritate, ac sanctitate fulgeat aliquis Author, ipsi tamen indubitatum, firmumque assensum eo solum esse præbendum, quo rationes, quas Author in discutienda materia adhibet, illum a nobis extorquent. Aequum enim non est, ut unius autoritas tantum possit, ut etiam sine ratione vincat.

Ne vero omnem omnino autoritatis usum reie-
cisse insimuler, sequentes canones statuendos esse exi-
stimo.

I. DEUS

(*) Quotidiana id docet experientia de mente Angelici Doctoris, quam Scholæ dissidentes æqua lance perspectam ac faventem habere volunt.



I. *DEUS* unus est, cuius *Authoritati*, utpote infallibili sit cæce fidendum, et sine mora credendum.

II. *Authoritas DEI* præcipue nobis applicatur per *S. scripturas*. Harum autem finis nunquam est, nos erudire profana, et naturalia: certissimum tamen est, sacros *Historicos* esse veracissimos, referreque verissima. quia vero *Hagiographi* persæpe tropologice, aut in communi tenore loquendi scripserunt, ideo omnia verba *S. scripturarum* promiscue in sensu litterali et proprio usurpanda non sunt. imo interdum personæ quædam in iis adducuntur loquentes; sed neque *Historicus*, neque *DEUS* hos sermones suos facere protinus censendus est, nisi expresse id constet. Ut ergo *Philosophus* divina scripturarum auctoritate legitime utatur, constare oportet inprimis: *DEUM* locutum esse: 2do: quænam sint *DEI* verba: 3tio: qui sit verborum sensus. quorum trium unum si ignoretur, omnis divina auctoritas perit (*).

III. *Ecclesiæ infallibilitas* ultra extendi non potest, quam quousque ipsi est collata divinitus. siquid unquam in physicis credendum proposuit, id factum, quod illud ad fidem, vel fidei dogma quodpiam pertinere crediderit: siquam philosophicam unquam opinionem prescripserit, eius damnationem præiudicialiter ad dogma quoddam Religionis stabiliendum præmitti necesse fuerit. Hinc, si quæ sententia physica sustineri non possit, nisi per necessariam consequentiam veritas quædam revelata inde convellatur, illa

(*) Minime igitur tolerandi sunt illi, qui *SS. voluminum* abutuntur auctoritate, eorumque testimonia in suas profanas detorquent opiniones, et non solum renitentem, sed invitam quoque scripturam sua sentire cogunt in iis, ubi scriptura vocum suarum ipsa met interpretes est, seseque explicat luculenter.



illa haud dubie falsa est, et argumenta eius non nisi ad apparentiam conficta esse, et speciem veri præ se ferre certissimum est (*). Quod si apertus, et evidens inter dogma philosophicum, et revelatum intercedat nexus, isque constet Ecclesiæ, tum eius est, noxiam opinionis erroneæ in physicis affirmationem, aut negationem configere, atque opprimere: et sic opinionum etiam philosophicarum iudex competens est, et irrecusabilis. Secus autem manet sua quemque libertas.

III. Sanctorum Patrum autoritas, uti in sacris omnium concors sententia habenda sancte, singulorum comiter, sic in philosophicis id saltem meretur, ut eorum opinionis ratio ita habeatur, quod sine sufficienti examine prævio non simpliciter reiicienda sit. cetera autem neque plus assensus, aut fidei exigunt, quam in id genus argumentis probant; præsertim dum ex Philosophis, uti plerumque fit, aliis sapiunt, eosque sequuntur.

V. Autoritate profana ut secure niti liceat, observandum est; an tanta scientia rei in Authore possit præsumi, quæ nos reddat erroris securos? et, an veram scriptor suæ mentis sententiam referat? an potius studio partibus serviendi, vel insultandi?

VI. Deni-

(*) Non semper autem ex veritate unius propositionis philosophicæ necessario veritas sequitur, aut falsitas alterius revelatæ; sed sequi non nullis videtur vel errore quodam, vel etiam malitia, ut sub obtentu Religionis maiorem opinioni invisæ invidiam possint consciscere. Ita præclare Cl. P. Udalricus Weis in libro *de emendatione intellectus humani* P. II. Sect. II. C. XVII. s. CCCLXXII.



VI. Denique in his quæ ad hominem interiorem pertinent nulla authoritas locum meretur, eorum testis enim luculentissimus est cuiusvis conscientia intima. in illis vero, quæ sensibus externis subiecta sunt, unice sensuum experimenta sunt adhibenda, cum intima conscientia eousque provinciam suam non extendit. Authoritas tamen in his locum habere non debet, nisi aut cum ipsi experimenta instituire nequimus: aut cum quæ ipsi observavimus, communi aliorum sensu confirmare volumus; quod ubi fieri potest commode, faciendum est semper.

Ad hos itaque canones si authoritatis usum restringimus, et sanæ rationi attemperamus, profecto, non potest non Philosophia eclectica coetibus religiosis summe proficua advenire: cum talis philosophandi ratio, utpote non nisi sobrie applicata ad haurienda S. fidei dogmata longe commodior, ad capeffendas disciplinas theologicas multo expeditior, et ad excolendos iuvenum Religiosorum animos, acuendamque ingeniorum perspicaciam facilior, feliciorque existat, quam omnis scholasticæ eruditionis apparatus, quantumcumque vetustate natalium, et numero, dignitateque gravissimorum virorum eminere iactetur. perbene igitur cum Cl. Philagrio le Roy concludo (*).

*Prisca docent, nova delectant, eclectica sector;
nam neque prisca mihi, nec nova, vera placent.
Libera nullius iuravi in verba Magistri,
sola Magistra mihi cum ratione fides.
Hæc teneo, quæ sana docet ratio esse tenenda
dogmata, Romana non inhibente fide.*

Post-

(*) Ad calcem Præfationis in philosoph. radica: eclect.

Postquam igitur Philosophiam regularem (seu potius Regularium) ecclēstice disponendam esse luculenter hucusque ostendi: oporteret insuper, ut de selectu materiarum, quarum discussio, et illustratio necessario, et utiliter suscipienda esset, latiori calamo adhucdum differerem. talis autem selectus in Asceteriis monasticis rationem esse habendam, cum Cl. Mabillonio profundissimi Religiosi dudum agnoverunt, videlicet ne iuvenum Clericorum mentes nimis novaturientes, et ad turpitudinem muliebre[m] usque curiositate[m] evadant. apud Religiosos

Multa etenim bene tecta latent, nescitaque profunt ()*.

ut itaque nec in hac providentia partibus meis desim: ad iicere paro huic dissertatiunculæ systema quoddam problematicum alicuius Philosophiæ in monasteriis tradendæ, in quo seriem materiarum aut necessario, aut utiliter pertractandarum contexui. Ipse ego hoc systemate usus sum, cum placita philosophica confratribus meis ad calamum dare iussus sum. Ordinem quoque in eodem disponendo, singularem adhibere tentavi (fateor) ex modesta quadam novaturiendi lubedine; ut saltem inter corrosa quædam vetustatis fragmenta, aliquid novi appareret, ne occidat miserum crambe repetita Magistrum: aut amaris criticorum sibilis pateam, si in opusculo recenti anatomia utar lippis tonsoribusque nota. cum etiam

- - - - - *citharædus*
*videtur, chorda qui semper oberrat eadem (**).*

Eum etiam in finem non reformidavi opinionibus quibusdam etiam minus frequentibus interdum accedere, ut per contraria iuxta se posita veritas faciliiori via erui valeat, et disputandi zelus recentem continuo inveniret fomitem. Interim tamen nulla ratione Philosophos religiosos obligatos volo, ut eandem mecum amplectantur

(*) S. Prosper in carm. de ingratis.

(**) Horat. in arte.



tur opinionem aut distributionem materiarum sectentur; nam *velle suum cuique est, nec voto vivitur uno*. Salvo enim meliori aliorum iudicio, cui me quoque lubens submitto, in præsentī negotio id unice tentavi effectui mancipare, ut utilis, et sobria Philosophia monasteriis restitueretur præcise ad usum domesticorum Religiosorum; non enim diffiteor aliam rationem prorsus ineundam esse in illis sacris familiis, ex quarum literatis gremiis Viri profundissimi ad munia Professoria in *studiis publicis*, aut *Academiis* mixto auditorio Regularium, et Secularium præditis subeunda avocantur. si itaque in athenæis domesticis Religiosi Philosophi eas sufficienter penetraverint materias, quarum ego in præsentī systemate numerum inii; Medius fidius! nullus dubito: quin dignissimi evaserint, ut ad altius theosophiæ forum, ac sacræ themidis tribunal hoc philosophico ancili præmuniti ascendant. Non nescio equidem susceptum hocce negotium non solum vires meas altius transcendere, sed et fulmina et odia Scholasticorum plus quam vatiniana in caput meum provocare, Noviorum vero Philosophorum sarcasmiss, criticorum ferulis, quin et contribulium invidiis memet exponere. At non exhorreo Palinodiam canere, aut saniora edoceri, si modo humano, vel etiam fraterno, et sincero corrigar. Id si præstare refugiant; et fulmina, et odia, sarcasmos, et ferulas et invidias, excandescantibus Scholasticis, ringentibus novioribus, expallescantibus criticis, ac tabescentibus contribulibus velut Thrriorum strepitum negligo, et eludo. Sapere enim audeo, et sapere ad sobrietatem, sapere cum aliis, non supra alios: placeat ergo saltem conatus! *in magnis etenim voluisse sat est*. Quemadmodum in præfatione præsentis opellæ candide

DIXI.

SYSTE.

SYSTEMATIS
PROBLEMATICI
PARS PRIMA

COMPLECTENS

PROLEGOMENA
IN
UNIVERSAM PHILOSOPHIAM,
CUM LOGICA.

(*) Ubicunque numeri Romani apppositi conspiciuntur;
ibi decretoriæ indicantur Positiones; quas Author
in solenni exercitatione propugnandas suscepit.



PROLEGOMENA

in

Universam Philosophiam.

I. **P**hilosophia est rerum divinarum, et humanarum, causarumque, quibus hæ res continentur scientia: seu, ut Ill. Wolfio placet, est scientia rationis sufficientis eorum, quæ sunt, aut fiunt. Hanc exsistere contra Acatalepticos, et Scepticos evidenter ostenditur: licet in multis adhucdum valde imperfecta esse deprehendatur.

Affertio hæc ut legitime deducatur, applicanda est *methodus syncretistica*, cuius ordinem, et leges in Dissertatione recensui. Præmittantur nimirum *observationes* de cognitione humana, eiusdemque *definitio*, *divisio*,



aliaque ad illam pertinentia. Ex cognitione deinde inferitur rerum scientia, quid sit, et quousque se extendat? referuntur scientiæ hostes, nempe Acataleptici, et Sceptici, quorum argumenta, et fundamenta fideliter expenduntur. tandem statuitur Propositio Ima: *datur multiplex rerum scientia certa, ac evidens.* IIda. *Hæc tamen scientia ex magna adhuc parte imperfecta est.* IIItia. *Datur itaque, et exsistit Philosophia, licet necdum ad amussim perfecta.* nimirum iuxta datas observationes, definitiones &c. His tandem præstabilitis enervantur opposita Scepticorum, et Acatalepticorum, aliorumque huius furfuris Philosophastrorum. Hanc itaque philosophandi methodum in omnibus materiis per decursum Philosophiæ continuo adhibendam suadeo: eoquod non solum a Viris eruditissimis rata habetur, sed omnino facilis, et perspicua est. Ne vero in præsentî systemate brevitatis cancellos excedam, sufficiat mihi, perbreve hoc Schema exhibuisse; qua ratione etenim hæc methodus materiis, aut materiæ methodo applicandæ sint, Prudens Lector facile poterit dispicere.

Ex hac Philosophiæ definitione ulterius eruitur *obiectum* eiusdem qua *materiale*, qua *formale*. Ob diversitatem, ac multiplicitem autem materialis obiecti scientia hæc dividitur in *Logicam*, *Metaphysicam*, *Physicam*, et *Ethicam*. ulterior divisio cuiuslibet partis reicienda est ad eum locum, ubi singulæ partes pro dignitate discutuntur.

Subiectum huius scientiæ capax in præsentî providentia est *homo* mente cogitante, iusta organorum dispositione, sanaque sensuum harmonia præditus. adiici potest huic discursui perbrevis disquisitio, quid nomine mentis humanæ veniat? quæ eiusdem facultates? quid, et quotuplices sint sensus? quæ corporis humani organificatio



nifatio ad sensuum ministerium ordinata? fusiora enim suppeditat Psychologia, et Anthropologia.

Finis tandem, ad quem omnes Philosophiæ partes collimant, ex parte intellectus humani cognitio veritatis est, ex parte voluntatis autem exercitium virtutis. *Media* ad hunc finem consequendum sunt mentis, sensuumque operationes ad regulas veræ Philosophiæ compositæ.

Si per temporis angustias licet, afferri quoque potest Dissertatio historico - critica, in qua Philosophiæ natales, varius apud diversas gentes cultus, sectarum diversarum scaturigo, earumque cum prospera, tum adversa fata, defectus, et incrementa pro multiplici temporum vicissitudine succincte explanari possunt; cum similis notitia discipulis non minus iucunda, quam utilis obvenire queat. Ex qua denique dissertatione opportunum erit inferre: quod

II. Non expedit Philosopho unum solummodo insequi Philosophum, aut in unius Magistri verba iurare: sed iuvat magis ex diversis ea, quæ veriora, meliora, et utiliora obveniunt, feligere, ut adeo Secta Philosophorum eclecticæ ceteris iure, et merito præferatur.



LOGICA

five

Ars cogitandi, et differendi.

III. **L**ogica est scientia actuum rationis directiva in ordine ad veritatem investigandam, et illam inventam cum aliis communicandam.

Si Sub hac definitione tam Logica *naturalis*, quam *artificialis* a Zenone Eleatenſi adornata, comprehenditur. Scholaſticorum næniæ, de Logica *an ſit Virtus intellectualis? an ſcientia practica? an ars?* &c. vel omnino breviffime deducantur, vel etiam absque formidine detrimenti omittantur.

Finis ſcientiæ huius ex eadem definitione luculenter erui poteſt.

Obiectum illius ſunt Cogitationes Mentis humanæ eo ordine diſpoſitæ, ut ad verum cognoscendum, et diſcernendum habiles evadant. Ipſe vero cogitationum noſtrarum *ordo* ex duplici Mentis noſtræ operatione deſcendit; ſimplici videlicet *rei apprehenſione*, et *eiusdem apprehenſæ diiudicatione*. An vero tres, aut omnino quatuor mentis operationes ſint adſtruendæ, diſcuſſionem exiguæ utilitatis, adeoque fuſiori calamo indignam eſſe arbitror.

§. I.

DE PRIMA MENTIS HUMANAЕ
OPERATIONE.

Eorum quæ sunt, aut fiunt conscii reddimur, si certa quadam ratione sensus nostri afficiantur; qua affectione posita, illico in mente nostra oritur imago quædam, ac repræsentatio earum rerum, a quibus organi sensorii affectio profecta est. Hanc imaginem, quæ recepto vocabulo *Idea*, vel *Notio rei* nuncupatur, cum Mens humana intuendo cognoscit nihil de ea aut affirmando, vel negando, dicitur illa habere simplicem eiusdem apprehensionem.

Cum vero multiplicia dentur, ac varia obiecta, quæ in sensus nostros agunt, et ea Mens humana diverso modo cognoscit: necessario fluit, diversas quoque a nobis acquiri ideas. hinc idearum differentia alia bene dicitur *materialis*, quæ ex hac ipsa obiectorum varietate emergit: alia *formalis*, quæ ex diversitate modi, quo in ideas ferimur, scaturit.

Materialiter igitur diversæ sunt ideæ inprimis *ratione originis*. nempe aliæ sunt per sensus externos *adventitiæ* aliæ ex adventitiis *factitiæ*. cum vero persuasum mihi est: omnem prorsus cognitionem sensuum adminiculo acquiri vix posse. Hinc, licet contra torrentem modernorum Philosophorum luctandum mihi sit, attamen



IV. Admittendas esse iudico saltem ideas rerum spiritualium, et universalium innatas (*).

Ratione naturæ vero ideæ dicuntur aut *simplices*, aut *compositæ*, pro diversitate nimirum *notarum*, quæ in diversis obiectis deprehenduntur.

Formaliter autem diversæ noscuntur ideæ *ratione obiecti*, aliæ nempe sunt *singulares*, *particulares*, *universales* &c. his commode accenferi possunt decantata apud Scholasticos *Porphyrii universalia*.

Ratione modi ideæ sunt aut *claræ*, *distinctæ* aut *obscuræ*, *confusæ* &c. Ad earumdem claritatem, et distinctionem determinandam tam antiquiores, quam recentiores varias *categorias* confinxerunt; quarum tamen mentio non nisi brevi manu expedienda est.

Summopere studendum est, ut ideas claras, distinctas, et veras acquiramus; qua de re opportunum erit detegere morbos animi, quibus Mens nostra imbecilla redditur ad sinceras rerum ideas conformandas, his industrie discussis subiungi merentur non nullæ *regulæ efformationi idearum deservientes*, quarum ope iisdem animi morbis succurrere pronum erit (**).

Ut

(*) Etiam si aliis placuerit sententiam oppositam apprehendere, neutiquam tamen in seriem, et cohærentiam systematis peccare poterit. ut infra patebit.

(**) Quæstio illa, an simplex, aut idea composita solum vera, vel etiam falsa esse possit? discutienda mihi non videtur, nisi quis materiam in prima statim Logicæ fronte disputationibus suppeditare desiderat. cum aliunde certum sit, ideam aliquam dari non posse, nisi quæ sit conformis obiecto aut repræsentato, aut repræsentando.

Ut autem cognitiones, seu ideas nos inter communicare valeamus, opus pariter est signis externis una et expressis sensus nostros ferientibus; enimvero nec nobis datum est, aliorum cogitationes, nec cuiquam mortalium, nostras in se ipsis intueri. Hæc itaque signa ea ratione sunt constituta, ut præter ideam sui, alterius quoque rei significatæ ideam ingenerent. Licet autem dentur signa varii generis, nostrarum tamen idearum signa sunt *voces humanæ articulatæ*. Has voces considerant Philosophi quatenus aliquam notionem denotant, easque in ordine ad usum scientificum *terminos*, seu *nomina* vocant, quæ si significant ideam rei velut per se existentem, erunt *substantiva*; sin autem indigent ideam, quæ rem aliqua qualitate affectam repræsentat, dicuntur *adiectiva*, cetera Grammaticorum curæ illis non sunt. In consideratione autem Logica omnis terminus est nomen, quod in aliqua propositione potest affirmari, aut negari, et in quod ipsa Propositio resolvi potest tanquam in subiectum, et attributum.

Terminorum varietas in ordine ad usum dialecticum habetur ex respectu *rei significantis*, *rei significatæ modi significandi*, aut *relatione unius termini ad alium*. hæc tamen terminorum divisio compendiose perstringenda est. utilius autem recenseri possunt quædam *regulæ ad usum terminorum pertinentes* velut quædam *Principia artis Hermeneuticæ*.

§. II.

DE ALTERA MENTIS HUMANAÆ OPERATIONE.

Mens nostra, cum duas ideas apprehendit, eas inter sese comparare solet, qua comparatione facta deprehendit nonnunquam in una rationem contineri,



cur et altera rei per priorem repræsentatæ conveniat: aut vicissim, cur disconveniat: in quo casu Mens dicitur rem aliquam diiudicare, et quidem si ideæ convenire noscuntur, *iudicium affirmativum*, si vero disconveniunt, *iudicium negativum* dabitur. Ipsum ergo iudicium intra nos existens est actus mentis duas ideas iungentis, vel separantis (*).

Perfectiones iudiciorum præcipuæ sunt: *veritas, evidentia, certitudo, infallibilitas, et probabilitas*. his directe opponuntur: *falsitas, obscuritas, incertitudo, fallibilitas, et improbabilitas*. quatenus nempe iudicia nostra spectantur relate *ad obiecta, ad ideas prævias*, et comparate *ad ipsam mentem*. Fideliter deinde indagandum est, cur iudicia nostra dictis perfectionibus subinde destituantur; nimirum *ob vitiosas ideas, sinistram vocabulorum interpretationem, philautiam, præiudicia, et præcipitantiam*. quibus errorum causis illico remedia quædam opponenda sunt.

Quemadmodum vero ideas mentis per signa, seu terminos exprimimus: sic pariter iudicia, quæ mente concepimus, verbis manifestare solemus, quæ verba *Enuntiationes*, aut *Propositiones* nuncupamus, in quibus affirmando, aut negando unum enuntiatur de altero.

Quæ-

(*) Solent hic aliqui quæstionem controversam instituere contra Cartesianos: *an iudicium sit actus intellectus, an voluntatis?* ego sane multum utilitatis huic quæstioni inesse vix suspicio. Id tamen cuilibet discutiendum liberere relinquo: *an iudicia nostra a voluntate pendeant?*



Quælibet Propositio constat *subiecto*, *attributo*, et *copula*. termini in Propositionibus diversimode usurpari solent; octo plerumque hac de re modi familiares existunt: nempe *status distractio*, *ampliatio*, *restrictio*, *diminutio*, *alienatio*, *appellatio*, et præcipue *suppositio*, cuius usus cum valde frequens est, eiusdem regulæ negligendæ non sunt.

Diversitas enuntiationum oritur ex earundem *materia*, *forma*, *quantitate*, et *qualitate*. Species earum præcipuæ, et primariæ censentur esse *Definitio*, et *Divisio*, quarum naturam ut utiliter penetremus, Regulæ, quibus utraque dirigitur, fideliter considerandæ sunt.

Proprietates Propositionum aliæ sunt *simplices*, nempe *veritas*, aut *falsitas*, sive conformitas, et difformitas propositionis cum obiecto. Aliæ sunt *complexæ*, videlicet *oppositio*, *æquipollentia*, et *conversio*. Omnes istæ proprietates certis iterum regulis alligatæ sunt, quarum brevis mentio fieri potest præcipue de extremis duabus, quarum usus vix non penitus exolevit.

Quemadmodum autem ex idearum comparatione eruitur rei alicuius diiudicatio. ita pariter ex collatis pluribus Enuntiationibus, seu Propositionibus, nova iterum iudicii species emergit, videlicet *Discursus*, aut *Ratiocinatio*, quæ ope *argumentationis* perficitur. Huius vero octo vulgariter enumerantur species: nimirum *Syllogismus*, *Enthymema* (de quibus paulo inferius) *Dilemma*, *Epicherema*, *Prosyllogismus*, *Sorites*, *Inductio*, quam summopere commendat Verulamius, *Exemplum*, *Parabola*, et *Apologus*. Affectiones harum specierum præcipuæ censentur *Evidentia*, *Demonstratio*,
Certi-



Certitudo, et *Probabilitas*. Pro legitimo argumentationis usu Dialectici quasdam Leges sanxerunt, quas *regulas bonæ consequentiæ* appellitant; variasque solent addere fallacias, quæ ex Paralogismis oriuntur. Hæc autem singula succincto calamo expedienda censeo.

§. III.

DE CRITERIO VERI, ET FALSI.

Omne studium, quod Philosophus, et præcipue Logicus in se suscipit, solius veritatis amore inchoandum, deducendum, ac terminandum est; hac adepta, quilibet in hac vita beatus sit, oportet. in huius veritatis gratiam aut inveniendæ, aut stabiliendæ Mens humana continuo ideas concipit, et iudicia efformat. Cum igitur veritatis studium finis sit operationum Mentis; consultum utique erit, ut quædam characteres ac notæ constituantur, quæ positis intellectus humanus tandem verum sese apprehendisse cognoscat: hæc autem characteres in complexo sumuntur *criterium veritatis* vocitantur, quorum præcipue septem enumerantur: nimirum *evidentia*, *conscientia intima*, *testimonium sensuum*, *experientia*, *persuasio communis*, et *authoritas utraque divina*, scilicet, et humana, ac tandem *ratio*. ut autem hæ notæ criticæ ad veritatem detegendam rite applicentur, cuiuslibet notæ conditio, leges, et cautellæ summa industria considerandæ sunt (*).

In

(*) Pronum erit cuivis Magistro, dum præsentibus criteriis notas describit, regulas quasdam de earum in variis rebus ac casibus usu superaddere, quæ tyronibus velut non nulla principia artis criticæ suppeditare possunt.



In quonam autem sensu enumerata criteria pro prima veritatis regula assumenda sint, Philosophi ab invicem discedunt; mihi opportunum visum est cum Cl. Leibnitzio sentire, adeoque

V. Evidentiam intellectus, seu rationis, sensuum, ac utriusque auctoritatis pro prima veritatis regula statuo.

Ex præsentia, et absentia horum criteriorum Mens humana circa veritatem diiudicandam in varios status coniiicitur; tales sunt: *Scientia, fides, opinio, dubium, suspicio, error, ac superstitio*. quaecunque ad hos status pertinent, solícite discutiantur. inanes tamen illæ quæstiunculæ a Scholasticis ad ravim usque declamari solitæ, de concursu fidei, et scientiæ, aut opinionis, brevissime absolvantur: utilius enim occupabuntur discipuli, si illarum loco sobriis *artis criticæ* principiis imbuantur, quibus ideas, et iudicia cum propria, tum aliorum exacte discutere valeant, sicque cordate cogitare, et provide iudicare possint: cum per eiusmodi artis criticæ regulas intellectus longe acutior redditur, quam per omnes scholasticæ Dialecticæ leges ac subtilitatis.

§. III.

DE METHODO SCIENTIFICA.

Ea est mentis humanæ brevitās, ut plerasque veritates non nisi longa iudiciorum, ac ratiocinationum serie assequi valeamus; quæ series ut ne confusio-
nem



nem potius, obscuritatemque pariat, quam studium veritatis adiuvet, debitus in ea fervandus est ordo, quem ad maximam partem dirigit *Methodus*, five ars bene disponendi seriem cogitationum, ac enuntiationum aut ad ignotam veritatem investigandam, aut ad cognitam, aliis explicandam (*). Dotes huius artis præcipuæ sunt *claritas*, *brevitas*, *soliditas*. Divisio methodi communiter fit in *Analyticam* seu *resolutionis*, et *syntheticam* seu *compositionis* methodum: *socraticum* autem fermocinandi *modum* ad hanc artem proprie referri posse, vix inducor.

Methodi, quæ hodie in scientiis familiares evaserunt, sunt præprimis *mathematica*, *scholastica*, et *syllogistica*. quælibet earum congruis dirigitur legibus. Maxime interea controversum est, *quænam methodus tradendis scientiis gratior adhibenda sit?* Moderni quidem omnes pugnant pro methodo mathematica, et scholasticam cum syllogistica plenis buccis exhibilant. contra hos autem mihi

VI. statuendum videtur: Methodum mathematicam simpliciter necessariam non esse, neque scholasticam temere reiiciendam.

VII.

(*) Quæstio olim agitari solita: *an methodus sit distincta mentis operatio?* satis frivola, adeoque discussione indigna videtur.



VII. Systemati autem nostro fatis
confuli per quamdam methodum mix-
tam, cui prorsus utiliter adiungitur ar-
tificium syllogisticum (*).

Hoc ipsum vero artificium syllogisticum perspicacissimo Stagiritæi senis ingenio acceptum referimus. Ipse tamen syllogismus est *argumentatio, qua duæ ideæ, vel duo termini singillatim, et explicite comparantur cum tertio, ut inde concludatur eorum convenientia, et disconvenientia.* Eiusdem varietas desumitur a *materia, forma, quantitate, et qualitate* earum propositionum, ex quibus componitur. Ad legitimum argumentationis huius usum procurandum vetustiores Dialectici varia scitu digna compilarunt: de Principiis syllogismi extrinsecis, et intrinsecis, de illius modis ac figuris, quas etiam carmine quodam magico comprehenderunt: de Regulis syllogismorum generalibus et specialibus &c. quæ tamen omnia non nisi succincte percurrenda sunt, ne in profundam summularum abyssum præcipites volvamur.

Atque Hæc tandem sunt, quæ ad capeffendas Dialecticæ disciplinas Religioso brevitatis, et utilitatis Studio sufficere posse arbitror, meoque saltem periculo sufficere quoque expertus sum. ut autem propositas in hoc systemate Logico materias pro dignitate excolerem, usus sum opera, et operibus Clarissimorum Dialecticorum Pourchotii, Corfini, Du Hamel, Antonii Genuensis, Fortunati a Brixia, Authoris artis cogitandi,
Ioan-

(*) De hac methodo vide in Dissert.



Ioannis Clerici, Hauser, Iosephi Mangold, Léonardi Grueber Benedictini Mettensis, Mako, Ivancsics, Donati a Transfiguratione Domini, Udalrici Weis, aliorumque: ut adeo non mea, sed istorum Philosophorum potius sensa retulerim (*).

(*) Neque etiam turpe mihi visum est aliena vivere quadra. nonne enim viri isti publicæ utilitatis studiosi fuerunt? ut quid ergo scriptis tantorum authorum publice, et sine invidia uti, crimini ducatur? imo mihimet ipsi indoleo, quod adeo curta suppellex Philosophorum mihi ad manus sit, forsitan dignius quidquam meliori minerva in chartam e calamo defluxisset.



SYSTEMATIS
PROBLEMATICI
PARS SECUNDA

COMPLECTENS
METAPHYSICAM.

SYSTEMATIS
PROBLEMATICI

PARS SECUNDA

COMPLETENS

METAPHYSICAM.

Metaphysica iuxta vim nominis scientia supra, vel præter naturam audit. communiter tamen definitur esse: *scientia theoretica, quæ circa res a materiæ commercio solutas versatur.* Cumque res duplici ratione a concretione materiæ possint liberæ concipi; nimirum vel per intellectus nostri abstractionem, ac præcisionem, vel per ipsam rei naturam. Hinc Metaphysicæ obiecta censentur esse *notiones, ac causæ rerum universales, ac generales*, utpote quas mentis operatione a materia secernimus: et *spiritus cum increati, tum creati*, quos ipsa eorum natura a mole materiali eximios esse voluit. Ob hanc igitur obiectorum discrepantiam Metaphysica bene dispescitur in *Ontologiam, Aetiologiam ac Pneumatologiam*, quæ nimirum doctrinam de Entibus in genere, de Entium causis, et spiritibus suppeditant. Eapropter opportunum quoque cuilibet erit, tres istas Metaphysicæ partes triplici pariter sectione expedire.

SECTIO PRIMA

COMPLECTENS

ONTOLOGIAM

seu

Doctrinam de Entibus.

Ontologia idem sonat, ac doctrina de ente. Ens autem omne illud dicitur, *cui non repugnat existere*, sive substantia illud sit, sive modus eiusdem.



Principia huius scientiæ primaria sunt illud, quod vocant *contradictionis*, et alterum *rationis sufficientis* (*). Altercatio tamen illa, quodnam ex his principiis sit primum? secure omitti potest: utilius vero cuilibet principio axiomata ex utroque promanantia subiunguntur.

Cum autem ens omne illud sit, cui non repugnat exsistere, hoc ipsum necessario in se continere debet rationem huius non repugnantiae, quæ alia non est, ac ipsius entis *Possibilitas*. famosa circumfertur Possibilitatis divisio in *extrinsecam*, et *intrinsecam*, quam tamen Thomistæ magno repudiant stomacho contenti sola possibilitate rerum extrinseca, seu omnipotentia divina (**). Contra hos autem mihi saltem

VIII. Videtur statuendum: dari præter possibilitatem rerum extrinsecam aliam pariter ipsis rebus intrinsecam.

Possibilitati e regione opponitur entium *impossibilitas*, cui merito adnumerari merentur *Negationes physicae*, et infamia apud Scholasticos *Entia rationis*, quæ olim nobilissimam Metaphysicæ partem constituebant.

Complementum possibilitatis est ipsa entis *Exsistentia*, seu quando essentia entis incipit adesse, aut extra

(*) III. Wolfius addit quoque tertium, nempe *Principium indiscernibilium*, quod tamen hodie paucis Philosophis probatur, ut videre est apud celeberrimum Voltairium *daus la Comparaison de la Philos. de Mr. Newton, et Leibniz*.

(**) Hinc iurgia prima sonare incipiunt inter Thomistas, et Patres e S. J. aliosque fautores scientiæ mediæ. quapropter haud vanum erit, quæstionem hanc non nihil attente discutere.



tra suas causas collocatur. Quæstio illa inter Thomistas, et RRes: An essentia, et actualis existentia entis creati inter se distinguantur? scholasticen sapit, adeoque non nisi breviter absolvenda est.

Entia ab invicem differre dicuntur tum numero, tum genere, et si eodem sub genere comprehensa habent dissimilitudinem essentialem, specie quoque differunt. quæ regula non minus ad ipsam substantiam, quam substantiæ modum sese extendit.

In distributione entium consideratione digna habentur: *Ens necessarium, contingens, singulare, universale* (pervetusta de universali apud Scholasticos altercatio utilius omittitur, quam ut uberiori calamo illustretur) *simplex, compositum*, (quæcunque hic de denominationibus, aut concretis afferri consueverunt, ea non nisi succinctis verbis perstringantur) et tandem *ens substantiale seu substantia*, ad quam referendæ sunt notiones *subsistentiæ, suppositi*, et *Personæ*. *Accidentia* vero e classe entium penitus expungenda sunt, et ad modos entis reiicienda. Quæcunque hic non nulli de *ente corporeo*, et *quanto* differere assolent, ego interea pro meliori opportunitate ad Physicam reiicio.

Entium affectiones præcipuæ censentur *Veritas, Bonitas, Unitas, et Identitas*, cui opponitur *distinctio* tam *realis*, quam *formalis*. Cum distinctionis frequens mentio etiam in Theologia recurrat, negligendæ utique non sunt characteristicæ Scotistarum, et Thomistarum opiniones, de *distinctione* nimirum *ex natura rei formali*, et *virtuali* cum *intrinseca*, tum *extrinseca*. Illam tamen quæstionem controversam antiqua iamiam civitate donatam: qualis inter gradus metaphysicos distinctio admittenda sit? cuilibet pro lubedine discutendam relinquo: meo saltem iudicio tam insignis uti-



litas, quam Scholaſtici adeo iactant, inde expectanda non eſt.

Inter entium modos eminet eorundem *quantitas*, et *qualitas*, ex quarum concordia, et diſcordia entium *ſimilitudo*, et *diſſimilitudo*, *æqualitas*, aut *inæqualitas* ac tandem ipſa *relatio*, ſeu proportio, atque ordo reſultat, quo unum ens ſe habet comparate ad alterum. dari relationem *tranſcendentalem*, et *prædicamentalem* a parte rei, contra Stoicos probandum quidem eſt. Iſtamen illa de Scotiſtarum entitate ſuperaddita fundamento, termino, et rationi ad forum frivolarium Scholaſticorum remittenda eſt.

Quodſi ordo, ac proportio entium ſpectatur relate ad *locum*, et *tempus* (implicat enim, ut res exiſtat, et ſit aut nunquam, aut nuſpiam) entia inter ſe erunt aut ſimultanea, ſeu coexiſtentia, aut ſucceſſiva. Ens autem per hoc dicitur eſſe in loco, quod hanc potius ſpatii partem, ac aliam præſentia ſua occupet. Ipſa tamen

IX. Ratio loci non bene, et proprie explicatur cum Cartefio per ſolam ſuperficiem corporis ambientis: adeoque præter locum externum admittendus eſt internus, qui eſt ſpatium ab ipſis corporibus occupatum.

Dumque ens aliquod in loco conſtitutum exiſtentiam ſuam continuat, *durare* illud dicitur. hæc autem entis duratio ſi initio, et fine caret *æternitas*, ſi initium habet



habet non autem finem *ævum*, si vero initium et finem habuerit, *tempus* dicitur; atque hoc denuo duplex est: nimirum *tempus internum*, seu successiva rei existentis duratio: et *externum*, seu mensura temporis interni constituta in motu regulari astrorum diurno, et annuo præsertim solis, ac lunæ.

Non exiguam certe eruditionis partem vendicabit sibi hæc de tempore pertractatio, si eidem succincta *Chronographiæ Elementa* adiiciantur de *Die, Hebdomada, Mense, Anno, Cyclo solari, et lunari, Indictione, Periodo Juliana, et Gregoriana, Epochis, Epactis &c.*

Entia omnia, cuiuscumque tandem sint naturæ, aut limite aliquo circumscribuntur, vel illo carent: ac ideo aliqua dicuntur *finita*, alia *infinita*. Quoniam vero entium finitorum, ac finium perspicua fatis idea mentibus nostris obversatur, hinc de illis nulla prorsus difficultas habetur; maior tamen exurgit de eorumdem infinitudine. Ipsum autem infinitum spectari potest relate ad entium *extensionem, durationem, numerum, et perfectionem*: quatenus videlicet dicimus aliquod ens esse infinitum *secundum essentiam, sive secundum quid*. celebris quoque in Scholis est infiniti divisio in *categorematicum*, et *syncategorematicum*. quoniam vero utriusque infiniti tanta est subtilitas, ut ab intellectu creato comprehendere nulla ratione possit, nisi inanibus coniecturis conquiescere desideremus: qua de re Religioso Philosopho sufficere arbitror, si missis Scholasticorum disceptatiunculis sobriam notitiam de natura, et proprietatibus utriusque infiniti sibi comparaverit.



SECTIO SECUNDA

COMPLECTENS

AETIOLOGIAM

feu

Doctrinam de Caussis.

Caussa in genere dicitur illud *Principium*, unde *aliquid*, quod de se est *insufficiens ad existendum*, fit, et *existentiam* habet. illud autem, quod a causa fit, *Effectus*, seu *causatum* appellatur.

Princeps caussarum distributio fit in *materialem*, *formalem*, *finalem*, *moralem*, et *idealem*: queis me iudice accenferi potest *Natura*, et *Ars*, sive causa naturalis, et artificialis. Naturæ autem nomine indigitatur *Principium intrinsecum earum omnium sensibilibus mutationum*, *motuum*, seu *effectuum*, quos in, et ab *ipsis rebus veluti sponte fieri videmus*. Effectus ergo illius erit *Naturale*, seu omne id, cuius ratio sufficiens in natura creata continetur. secus enim dabitur aut *supernaturale*, aut *violentum*. Per antiquæ illæ quæstiunculæ: an DEUS creaturis, vel an creaturæ ad invicem violentiam inferre queant? non nisi breviter resolvendæ sunt. Artis nomine designatur *Principium extrinsecum sui artefacti*. Artem naturæ simiam esse edocent nos mira, et captum humanum vix non superantia artefacta, si tamen obviis quibusvis narratiunculis fidem adhibere velimus.

Perfectiones caussarum censentur esse earum *Prioritas*, qua effectus suos aliquomodo antecedunt. *Præcontinentia perfectionis effectus*, ac ipsa tandem *virtus efficiens*,

X. Mu-

X. Mutua tamen naturæ prioritas inter duas causas físicas tam eiusdem, quam diversæ classis pro eodem instanti, et quoad primam productionem perpetuo implicat.

An vero eadem naturæ prioritas inter duas causas morales, aut unam moralem, et alteram physicam subsistere queat? parum utile videtur uberiori pagina disquirere. latius e diverso excurrendum est, si sermo sit de virtute operatrice, quæ causas creatas efficientes, et vere activas reddit, ac efficit. atque

XI. Hac virtute activa, et efficiente pollent revera causæ creatæ: nec sunt meræ causæ occasionales, ut Cartesio, eiusque sequacibus placet.

Porro *actiones* causarum aliæ sunt *immanentes*, aliæ *transeuntes*, et quidem aliter *ad intra*, aliter *ad extra*: atque iterum diverso modo se habent in substantiis immaterialibus qua creatis, qua increatis, et substantiis corporeis.

XII. Actio tamen creativa causis creatis nec principaliter, nec instrumentaliter attribui valet.



XIII. Imo neque actio entitatis novæ eductiva ad mentem Scholasticorum.

Conditiones a causa efficiente ad agendum requisitæ præcipuæ sunt: *causæ determinatio, subiecti dispositio, seu aptitudo: absentia impedimentorum inaufertibilium: et vel maxime applicatio causæ ad subiectum: causa etenim efficiens creata non agit, nisi passo sit applicata per contiguitatem vel inmediate suppositi, vel inmediate virtutis, ut adeo*

XIII. Causa creata efficiens nec naturaliter, nec supernaturaliter in distans, aut per saltum agere possit.

SECTIO TERTIA

COMPLECTENS

PNEVMATOLOGIAM

five

Doctrinam de Spiritibus.

Spiritus nomine intelligimus omnem *substantiam intellectu, et voluntate præditam*. Porro cum talis substantia vel increata esse concipitur, ut DEUS; vel creata ut *Angelus, Anima hominis, aut bruti*, merito etiam (quantum lumine naturali vacat) quadruplex Pnevmatologiæ obiectum statuimus, quod quadruplici pariter dissertatione discutiendum erit.



§. I.

DE THEOLOGIA NATURALI

five

Doctrina de DEO.

DEI nomen cum auribus nostris illabatur, illico mente concipimus *Ens a se existens, necessarium simpliciter, bonum, et in omni perfectionis linea infinitum.*

XV. Huius Entis supremi existentia lumine naturali adeo nitide relucet; ut, præterea quod singulis creaturis rationalibus idea DEI existentis a primo statim vitæ momento congenita sit (*).

XVI. Ea ipsa contra Machiavellum, Hobbesium, nonnullosque Theomachos politicos argumentis moralibus:

XVII. Contra Atheos præcipue Systematicos argumentis physicis; permiffa etiam aliqua cauffarum ferie in infinitum procedente:

XVIII.

(*) Cohærenter ad posit. IV.



XVIII. Imo adversus Idealistas argumentis quoque metaphysicis inconcusse demonstrari possit.

Errores Platonis, Democriti, Davidis Dinantii, Petri Abailardi, Bened. Spinozæ, Ioan. Tolandi, aliorumque Pantheistarum, quos in determinanda DEI essentia errarunt, ratione naturali suffocandi sunt: ac præcipue cavendum, ne ad Theologiam revelatam nimis proclives simus. sufficiet igitur dixisse DEI essentiam esse cumulum omnium perfectionum, quin propterea solliciti redamur, quinam revera conceptus DEI metaphysicus sit, aut physicus. ipsas vero perfectiones in consideratione metaphysica DEO sub triplici notione attribui posse, facile eruitur.

Ex notione nimirum *Entis a se* contra Polytheistas infertur DEUM essentialiter esse *unum*: contra veteres Rabbinos *immutabilem*: contra Vorstium Calvinicolam *æternum*, ac essentialiter *immensum*, adeoque nec locorum, nec temporum cancellis circumscriptum.

Ex notione *Spiritus simplicissimi* patet contra Anthropomorphitas DEUM esse *Ασωματον*, seu incorpoream substantiam omni concretionem materiali carentem, summo insuper intellectu, liberrimaque, ac immutabili voluntate præditam. Porro intellectus divinus in cognoscendo limites nescit: cum non solum res omnes præteritas, aut præsentem inspicit; sed et possibiles, futurasque sub quacumque demum hypothese infallibiliter prævidet, ac præscit,

XIX. Quin tamen hæc DEI præscientia libertati creatæ inimica sit.

Ingens hoc in loco suboritur Thomistas inter, Sco-
tistas, et Recentiores quæstio, nunquam non maximo
tumultu exagitata: *quonam in medio DEUS res tum
possibiles tum futuras prævideat? an in decreto suo, quod
modo prædeterminans, modo condeterminans appellitans?
sive in se ipsis?* interim tamen candide assero: sub iu-
dice adhucdum litem esse positam, num præsens quæstio
Philosophis magis, quam Theologis discutienda sit? ne
tamen in re maximi (ut aiunt) momenti nihil dixisse
videar, rotunde profiteor: DEUM videre possibile in
se ipsis, cum præscindendo a decreto divino habeant
cognoscibilitatem in seipsis, possibilitatem nimirum in-
trinsecam (*). Atque eadem ex ratione, cum

XX. Contingentia seu absolute, seu
conditionate futura, præscindendo ab
omni decreto DEI (non tamen illud ex-
cludendo, prout falso arguunt Thomi-
stæ) continent in se formalem, et de-
terminatam veritatem, aut falsitatem.

Eadem quoque DEUS videt in se ipsis. Hinc re-
vera non apparet fundamentum, cur locum habere non
possit divisio scientiæ DEI in illam *simplicis intelligentiæ*,
seu *possibilium*, *Mediam*, seu *conditionate*, et *Visionis*
sive absolute futurorum? audiendi itaque non sunt Thra-
sones quidam, qui sese reformandis scientiis natos esse
arbi-

(*) iuxta positionem VIII.



arbitrantur, atque scientiam mediam velut commentum Iesuiticum Fonsæ, aut Molinæ elato supercilio explodunt. Verum audiant quæso ! Cl. Canzium disparis quidem cultus, at insignis eruditionis Virum ita loquentem (*): *Alii hanc scientiam DEI mediam male applicant; alii, ut hoc declinent, male negant prorsus. Sapienti pauca, et satis.*

At non solum præscit, et prævidet DEUS universa, sed et providet universis. Etenim res omnes ignobiles æque ac nobiles non fatali necessitudine quadam, sed suaviter cuncta disponens ordinatissimis mediis ad fines præfixos dirigit. Ideoque bene

XXI. Adversus Epicureos, et Genethliacos statuitur: universum hoc divina gubernari providentia.

XXII. Atque ob hanc rationem *Fortuna, Casus, et Fatum* in sensu Democriti, Stoicorum, Astrologorum, Ethnicorum, Muhamedanorum, Spinozæ, ac Calvinii velut fatuum reiiciendum est, nisi in sensu Christiano per illud intelligatur DEI sapientissime omnia gubernantis invariabilis *Providentia*.

Ex notione tandem *Causæ primæ* rerum omnium infertur DEI omnipotentia, quam Theod. Beza, celebre

(*) Meditat. Philos. C. IX. §. 447.

Iebre inter Sectarios nomen impio ausu contrectare non exhorruit ; Fatalistæ autem legibus quibusdam inepte subiiciunt. Hæc omnipotentia vel maxime conspicua est in universi huius *creatione* (nam *actio creativa* soli DEO propria est (*):) *conservatione*, *simultaneoque concursu*. nimirum

XXIII. Res creatæ, ut existentiam suam continuent, non modo indigent directâ DEI conservatione :

XXIV. Sed et in omnibus actionibus immediato simul DEI concursu.

XXV. Existimo autem, hunc concursum simultaneum non esse distinguendum ab ipsa conservatione creaturæ in eo statu, quem illa agendo obtinet (**). Ut adeo DEUS cum creaturis concurrat quidem in eadem actione, non vero per eandem actionem.

Thomistæ antesignanum secuti Dominicum Banez ex familia D. Dominici præter simultaneum concursum prævium insuper DEI influxum in creaturarum actiones adstruunt, quem in famosa *prædeterminatione physisca*

(*) Iuxta Posit. XII.

(**) Ita cum Cl. Casimiro Tolosano satis multi Philosophi sentiunt.



physica constituunt. Vix unquam existit inter Scholasticos acrior controversia, ac præsens est de influxu mox dicto: hodie tamen solemnitas huius controversiæ multum deferbuit; eoquod partes litigantes ad inutiles speculationes prolaberentur, et ob utriusque partis innatam veluti pertinaciam vix amplius resolvendæ ex integro controversiæ spes affulgeat. Ego interea, ut receptæ in scholis assuetudini aliquomodo saltem morem geram sincere sic concludo.

XXVI. Prædeterminatio *physica* (iuxta indolem a Bannesio adornatam) ex parte DEI ad commendandam divini domini excellentiam videtur superflua: quin et sanctitati, aliisque DEI perfectionibus noxia;

XXVII. Ex parte creaturæ vero causis liberis inimica, in necessariis penitus frustranea esse.

Interea tamen cuilibet Religioso Philosopho bene cavendum est, ne in discussione huius materiæ argumentis theologicis, aut subtilitatibus scholasticis involvatur.



§. II.

DE DÆMONOLOGIA

five

Doctrina de Spiritibus Angelicis.

Principem locum inter spiritus creatos Angelici spiritus sibi vendicant. Et licet ipsa vox *Angelus* officii potius nomen sit, quam naturæ, per eam tamen communiter intelligitur *substantia spiritualis creata, et suo modo completa.*

XXVIII. Angelos bonos, et malos exsistere, licet ratione naturali demonstrari non possit: contra Saducæos tamen utriusque authoritatis criterio, et communi sensu exploratum habemus (*).

Ex allata vero definitione circa Angelorum naturam plus inferri nequit: quam eos esse incorporeos, intellectuque, ac voluntate pollere. quidquid vero de illorum vi cognoscitiva, locomotiva &c. non nulli asserere tentant, id omne meris coniecturis inniti, nemini non persuasum est. ideoque merito in his ulterius discutendis calamus restringitur.

Angelos tam probos, quam reprobos in res creatas potestatem habere non minus authoritate, quam multiplici experientia docemur; præcipue, cum vix sine

I

teme-

(*) De communi in hac materia sensu videri potest *Thomæ Stanleii Historia Philosophiæ orientalis* tomo II. operum philosophicorum Ioannis Clerici adiecta.



temeritate negari queat : exstitisse Energumenos, et Veneficos per *Magiam nigram*, vulgo *Schwarzfunst* olim mira et insolita patrasse. Ipsa quidem *Magia* simpliciter est *Scientia naturalis*, atque *ars mira efficiendi medio*, et *sine bono*, adeoque licita: at, si ad malos usus dirigitur, et non nisi ex *pacto implicito*, aut *explicito* cum Angelis reprobis inito exercetur, illicitissima audit. quantumcumque vero mirabilia per eam effici valent, attamen

XXIX. Dæmones nunquam verum miraculum patrare sciunt, (hoc enim est opus folius DEI) sed vel activa passivis applicant, aut per confictas species organis sensoriiis imponunt.

Liberum hic cuiilibet relinquo quædam adicere de *Sagis*, et *Lamiis*, earumque peregrinationibus aëreis, ac conventiculis: nec non de *Lemuribus*, spectrisque nocturnis, *Vampiris*, seu sanguisugis &c. &c. Ego interea mentem meam ex prudenti oeconomia reticeo; tum quia narrationum (quibus similia vel maxime innituntur) rara est concordia: tum quia narrantium fides de anticipatis iudiciis interdum non immerito valde suspecta arguitur a plerisque hodierni ævi Criticis, qui conceptas in utramque partem opiniones acerrimis fallibus licentius perficere assolent (*).

§. III.

(*) Huius rei paradigma nobis offert Anglipolis in famoso nuper casu: Von dem Mädchen im rothen Nieder, und mit dem schwarzen Vogel.



§. III.

DE P S Y C H O L O G I A

five

Doctrina de Mente Humana.

Experimur in corpore humano non solum dari ordinatissimam organorum harmoniam ad eliciendos actus vitales ; sed revera insuper deprehendimus eodem actus in dicto corpore ab intrinseco quodam principio prodire. Hoc ipsum vero Principium est *Mens humana*, quæ dum corpori humano unitur, dicitur illud *principium activum*, quo homo fit potens velle, intelligere, aliasque operationes vitales exercere. *Exsistentia* mentis humanæ, præterea quod sensu intimo cuilibet notissima sit ; vel propter solam dubitationem in dubium vocari nequit.

XXX. Origo illius non ab Angelis (ut Avicenna delirabat) sed a DEO creatore repetenda est : qui eam foetui humano sufficientibus organis instructo infundere censetur.

XXXI. Ad fabulas itaque remittatur conficta ab Origene animarum præ-exsistentia ; et fato vix meliore digna
III. Wolfii hypothesis.



XXXII. Multo minus opinio Cl. Vateri nobis probatur, qui refuscitato Tertulliani errore mentem humanam per traducem propagari existimat.

Natura, et essentia mentis humanæ, seu animæ rationalis ratione quoque naturali vindicanda est ab erroribus tum veterum, tum noviorum Philosophorum, nimirum Pythagoræ, Platonis, Lucretii, Hobbessii, Cowardi, aliorumque *Pantheistarum*, ac *Materialistarum*; contra quos vere et catholice statuendum est: *Mentem humanam esse substantiam spirituales, intellectivam, humano corpori informando destinatam.* adeoque ipsa

XXXIII. Hæc anima est purus Spiritus, simplex, et indivisibilis tam in partes essentielles phycas, quam integrales.

XXXIV. Et non solum incorruptibilis, sed ex natura sua immortalis.

XXXV. Hæc tamen immortalitas ex fide quidem certa, ex ratione tamen non nisi aliquo modo evidens est.

Finis Animæ rationalis in hac providentia est corpus humanum informare. Eapropter vera quoque ac phycica corporis humani forma dicitur, ita quidem, ut
pro

pro corporum quibus infunditur multitudine singulariter multiplicabilis, multiplicata, et multiplicanda sit ()*.

XXXVI. Hinc una, eademque anima in pluribus corporibus nec simul, nec successive adesse potest. ut adeo celebris animarum migratio, seu Μετεμψυχωσις sanæ rationi adverfetur.

XXXVII. Neque etiam plures animæ in eodem corpore aut simul, aut successive exsistere valent.

Facultates, seu potentia~~e~~ mentis humanæ duplici ratione attingi possunt, quatenus videlicet ea est *Spiritus* et quatenus *forma corporis humani* denominatur. sub primo respectu gaudet Mens humana *Intellectu* summe activo, ita, ut perceptionum suarum non sit subiectum mere passivum, sed principium revera activum (**).

XXXVIII. Licet autem valde probabile sit, intellectum ex energia sua semper cogitare: actualem tamen cogitationem ad animæ essentiam pertinere male infert Cartesius.

Commode hic mentio fieri potest de *actuali intellectione*, quæ nil aliud est quam ipsius animæ varia modi-

I 3

(*) Ita Concil. Lateran. V. in Bulla *Apostolici Regimini*

(**) Cuinam systemati de idearum origine ego accedam, facile colligi potest ex Logica.



dificatio, non autem quædam entitas Peripatetica (*)
de *Memoria*, *Reminiscencia* &c.

Gaudet insuper mens humana facultate appetendi bonum, et averfandi malum, seu *voluntate*, quæ sola libertatis capax est, cum in ipsius potestate sit *velle*, ac *nolle*, ideo quoque

XXXIX. Mens humana pollet libertate indifferentiæ non minus, ac a coactione (**).

In quantum vero anima rationalis ut forma corporis humani consideratur, prædita est ea potentia *imaginativa*, *sensitiva*, ac *potentia motrice* de quibus tamen largior sermo in *Anthropologia* redibit, ubi pariter grande illud arcanum de mutuo commercio corpus inter, et animam, ac ipsius animæ in corpore sede fufius explicabitur.

§. III.

DE ZOOLOGIA

five

Doctrina de Animabus Brutorum.

Nomine Bruti designamus *substantiam compositam ex corpore organis sensoriis instructo, et principio quodam vivente cognoscendi, appetendi, sentiendi, ac movendi facul-*

(*) Nempe cohærenter ad Posit. XIII.

(**) An vero voluntas ad determinandum individuum speciei æque libera sit ac ad ipsam speciem? subtilitas quædam scholastica est, quæ sine detrimenti periculo transmitti potest.

facultate prædito. Ac proinde a Cartesianis, qui hac in parte Stoicos, et postea Gomefium Pereiram infecuti sunt,

XL. Male statuitur: Bruta esse machinas hydraulico - pneumatico - locomotivas, sive mera *Αυτοματα*.

Deprehendimus enim in quolibet Bruto non solum ordinatissima organa; sed tales insuper operationes, quæ non nisi a principio vitali, seu anima proficiscuntur.

XLI. Exstat itaque in singulis Brutis Anima; quæ tamen non consistit in Elementorum combinatione, flore sanguinis, aut entitate pure materiali: Neque est substantia quædam media inter spiritum, et materiam.

XLII. Sed est substantia quædam spiritualis, simplex et indivisibilis, mentibus tamen humanis natura sua longe imperfectior.

Anima Brutorum gaudet similiter præter facultatem *sensitivam cognoscitivam* simul, *imaginativam*, et *rememorativam*, ita quidem,

XLIII. Ut ob angustos intellectus limites imperfecte saltem ratiocinari; et



motibus spontaneis sese ad agendum determinare posse mihi videatur (*).

Quæcunque non nulli hac occasione de Brutis in specie addere solent, ego commodius ad Physicam specialem reiicio, cum de corporibus in specie dissertatio recurret. Hæc autem de Entibus qua mentis præcisione, qua ipsa natura abstractis a commercio materiæ pro exigentia disciplinarum Metaphysicarum sufficere possunt. Ad hæc materias pro dignitate discutiendas, præter Authores in parte prima systematis huius ad finem recensitos, auxiliares manus præbuerunt, Cartesius, Wolfius, Gottlieb Canzius, Pardies, Buddeus, Baumeisterus, Eusebius Amort, Veremundus Guss Benedictinus Prunfeningensis, Benno Ganfer Benedictinus Oberaltaichensis, aliique, quorum insignia opera consulere, cuilibet pronum erit.

(*) Atque hac ratione sufficienter salvari autumo datam superius definitionem spiritus genericam, sub qua etiam bruta comprehenduntur.



SYSTE-

SYSTEMATIS
PROBLEMATICI
PARS TERTIA

COMPLECTENS
UNIVERSAM PHYSI-
CAM.

SYSTEMATIC
PROBLEMATIC
PARTS

COMPLETION

UNIVERSAL PHYSICS
CAM



(*) „Antequam in interiora doctrinæ naturalis visce-
„ra descendamus, cuilibet artium liberalium Profes-
„sori vel maxime opportunum erit, ut residuo tem-
„poris spatio quod a pertractandis materiis Logicis ac
„Metaphysicis superat, discipulis quædam *Elementa*
„*Matheseos puræ*, ceu Præcognita ad scientias physicas
„subministret ore, aut calamo. Ad hæc vero Physi-
„cæ adminicula referri possunt *Principia Arithmetica vul-*
„*garis*, et *speciosa*, nec non *Geometria*: quæ sane in
„compendio attingit Cl. P. Maximus Mangold S. I.
„in *Philosophia Recentiore publicis prælectionibus accomodata*.
„cuius insignis viri opera ego quoque pro viribus im-
„becillitatis meæ usus eram: aliis alios accedere libe-
„rum sit, dummodo perspicuitati, et brevitati pro
„discipulorum capacitate studuerint.

Nobilis illa, ac periucunda Philosophiæ pars, quæ
in penetrandis naturæ arcanis tota occupatur,
Physica, seu *scientia rerum naturalium*, præpri-
mis corporearum nuncupari amat.

Obiectum illius principale est *naturale corpus*, cu-
ius originem, essentiam, affectiones, vires, statusque
diversos solícite contemplatur. Hoc ipsum vero corpus
dum in genere attingit, *Physicæ generalis*, sin in specie
considerat, *Physicæ particularis* denominationem forti-
tur. utraque tamen pro ratione modi, quo in obiectum
fertur, aut *Historica* est, aut *Ætiologica*; si nimirum
præter nudam rerum enarrationem, et descriptionem,
earum



earum quoque causas recenset ac disquirat. Ordine igitur non minus scholæ, quam naturæ Physica generalis in prima huius systematis physici sectione pertractanda assumitur, altera Physicam particularem comprehendet.

SECTIO PRIMA

COMPLECTENS

PHYSICAM GENERALEM.

Generalis hæc de corpore physico in genere spectato contemplatio maioris claritatis conciliandæ gratia in quinque dissertationes distribuenda est: videlicet in *Somatologiam*, *Æsdiseologiam*, *Dynamicam*, *Phoronomiam*, et *Staticam*, queis Physicæ generalis partibus omnis profecto naturalis corporis doctrina, ac doctrinæ œconomia innititur.

§. I.

DE SOMATOLOGIA

sive

Doctrina de corpore physico, eiusque
Essentia, ac generalibus affectionibus.

XLIV. **C**orpora physica revera existere, adversus Idealistas, et Monistas per omnia veritatis criteria evidens, ac manifestum redditur.

Ad evitandas verbales tricas in destinanda essentia eorundem, triplicem corporis naturalis conceptum statuere placuit. ut adeo

XLV.



XLV. Essentia illius metaphysice spectati in radicali impenetrabilitate: mathematice considerati in actuali extensione trine mensurabili: physice autem in sensibili eiusdem mutabilitate posita esse videatur.

XLVI. Declamata tamen Cartesii opinio, merum conceptum mathematicum pro essentia corporis metaphysica, vel physica obtrudere conantis merito vapulat.

Præter principia corporum extrinseca dantur insuper intrinseca et naturalia, quæ *materiæ primæ* vices obeunt, ex qua omnia corpora proficiscuntur, et in quam ultimato resolvi queunt. Huius materiæ naturam, ut magis conspicuam redderent Philosophi, diversa confinxere systemata (horum tamen non nisi brevis ac succincta recensio facienda est: quæstiones autem scholasticæ de eadem materia prima, eiusdem appetitu, forma substantiali &c., quæ olim inter triviales physicos permagni habebantur, ab ovo usque ad malum eliminandæ sunt) quibus et nostrum, ceu quoddam medium superaddere licebit, cum

XLVII. Statuimus: Prima corporis physici principia metaphysice sumta ad mentem Aristotelis esse in fieri materiam,



riam, formam, et privationem: in factō autem solam materiam, et formam.

XLVIII. Hæc Principia, si physice spectantur, consistere pariter arbitramur in substantiis simplicibus, materialibus, inextensis, et ex vi congenita activis: quarum forma essentialis ex earumdem unione secundum variam dispositionem, et combinationem dependet.

Inde ulterius facile deducitur: has simplices substantias ab authore naturæ in moleculas combinatas pro principiis corporum mechanicis; et ob maiorem, vel minorem earumdem molecularum concretionem pro sensibilibus quoque principiis constitui posse. quod secundaria vero corporum principia attinet, parum refert, five ea ex Elementis vulgaribus, five chemicis deriventur.

Affectiones generales corporum physicorum præcipuæ sunt inprimis *Extensio*, ex cuius diversa modificatione iisdem certus *magnitudinis terminus*, seu *Figura*, *raritas*, aut *densitas* indicitur. quidquid hac occasione Philosophi de *rarefactione*, et *condensatione* differere solent, id breviter iterum recensendum est. Extensioni fororū vinculo adhæret *impenetrabilitas actualis*.

XLIX. Hæc tamen supernaturaliter tolli potest, ita, ut duo corpora in eodem

dem loco, et tempore simul compenetrata exsistere possint.

Cum vero extensum sine partibus concipi nequeat, congrue extensioni corporis subiungitur illius *Divisibilitas*, sed ita, ut in ipsa corporis divisione tandem deveniri oporteat ad minimas materiæ partes non iam amplius divisibiles. Quæcunque vero in Scholis occasione divisibilitatis de *Compositione continui* controversantur adeo recondita sunt, ut non nisi iis ampliori discussioni incumbere liceat, quibus plus est otii literarii.

Cum autem molculæ primigeniæ, ex quibus corpora coalescunt diversa, pollent figura, nunquam ita inter se implicantur, quin aliqua hinc inde remaneant dispersa spatiola, seu *Pori*; merito quoque *Porositas* affectionibus corporum adnumeratur: utpote cuius beneficio *transpiratio* corporum ut plurimum adiuvatur.

L. In his quidem poris quorumvis corporum saltem sensibilibium hospitatur materia quædam fluida, et subtilis: omne tamen vacuum, etiam disseminatum ibidem evitari vix potest.

Ad explicandam partium corporis *cohæsionem* sufficit pariter arctior illarum incuneatio, compactio, mutuusque nexus. limitibus tamen hanc partium cohæsionem circumscriptam esse apparet; cum quævis corpora violente tensa, aut compressa ad pristinum statum sese componere laborant. Conatus iste *Elasticitas* nuncupari assolet, quæ vel *passiva*, vel *activa* est. atque hinc



LI. Videtur Elasticitas passiva ab ædificio corporum mechanico repetenda esse: activa vero cum ab ipsa corporum materia vi inertiae prædita; tum a fluido æthereo interlabente, quod sublato partium æquilibrio vim pariter activam exerit.

Notissima tandem Corporis physici affectio est *Gravitas*, cuius phænomena quidem quotidiana sunt: at causa, et origo ipsius gravitatis in remotissimis adhuc naturæ penetralibus delitescens omnes pene investigantis intellectus humani conatus irritos reddidit. variorum quidem Philosophorum ingeniosas prorsus hac de re hypotheses manu terimus: verum næ magnus Apollo erit, qui vaticinatus fuerit, cui denique credendum sit. Interea liberum cuivis relinquo has hypotheses in examen vocare: in hac autem rerum incertitudine utor et ego digna Philosopho Eclecticæ libertate, et consonam datis principiis, corporibusque præcise sublunaribus accomodam hypothesin exstruo, et dico:

LII. Gravitatem passivam constare ex ipsa cuiusque corporis massa tam constanti, quam variabili. Activam vero, seu causam gravitantem dico partim corporibus intrinsicam, ob congenitam nimirum vim activam, quæ tamen in actu primo indifferens esse concipi-

cipitur ad motum sursum, vel deorsum, &c. partim extrinsecam, quatenus vis activa in actu secundo spectata ob accedentem determinationem ab authore naturæ, præcise deorsum versus stabile quoddam centrum tendit (*).

§. II.

DE ÆSDISEOLOGIA

sive

Doctrina de qualitatibus sensibilibus corporis physici.

Ut corpus physicum sensibile denominetur, potens fit, oportet, ita immutare sensuum animalium organa, ut inde illa suboriatur passio, quam rei sensibilis perceptio consequitur. Præstat hoc quodlibet corpus per *qualitates accidentarias*: quarum aliæ *actuosæ*, aliæ *passivæ*, et *inertes* appellitantur. Illarum origo non unice ex intima rei essentia, aut ex Elementis haurienda est; quam plurimæ enim rerum inertium qualitates ex mechanicis affectionibus haud inconcinne derivantur.

Percelebris in hoc negotio controversia agitari, et Peripateticos inter ac Atomistas ad ravim usque declamari assolet: an dictæ qualitates sensibiles absolutæ dici queant? sive, (ut dialecto scholastica utar) *An dentur*

K

Acci-

(*) Ansam condendæ huius hypothesis ad manus dederat Cl. Bezel in *Philosophia ad gustum moderni sæculi elaborata*.



Accidentia absoluta ? Nemo sane ignorat, ansam litigii huius ab Augustissimo Eucharistiæ Sacramento pendere, ut adeo integra quæstio theologica potius discussione digna perperam ad forum philosophicum deducta sit, cum in eiusmodi mysteriis rationem humanam in obsequium fidei captivari oportet. Hinc candide assero:

LIII. Sententiam Atomistarum principiis physicis longe conformiorem esse, et nulla ratione S. Fidei oppositam.

LIV. Licet sententia Peripateticorum ex Authoritate PPum, et Conciliorum probabilitatem suam iactet.

Qualitatum varietas desumitur ex diversitate sensuum externorum, in quos agere solent. Hinc aliæ dicuntur *tactiles* ut *soliditas*, *fluiditas*, *siccitas*, *mollities*, *calor*, *frigus* &c.

LV. Caloris natura in motu vehementi, perturbato, et expansivo partium insensibilium, præprimis ignearum corporis calidi consistit.

LVI. Frigoris e diverso natura, et activitas non in mera privatione caloris, atque partium quiete: sed insuper in appulsu quorundam halituum nitroforum,



forum, et falinorum, qui corporum poros facile penetrant, iisdemque se cuneorum instar infigunt, posita esse videtur.

Aliæ sunt *audibiles*, ad quas primario refertur *sonus*, qui modo *primitivus*, modo *derivativus* dicitur.

LVII. Prior habetur ex motu tremulo partium minimarum corporis sonori, orto ex eiusdem corporis percussione, collisione, aut subita, et vehementi vibratione. Posterior autem ex motu aëris iterum tremulo, a partium corporis percussi tremore aëri communicato. qui dum ad aures defertur, organum acusticum varie afficit.

His subiungi possunt, quæ notatu digna sunt de *soni propagatione*, et *reflexione*, ac *harmonia* &c.

Aliæ qualitates dicuntur *visuales*, ubi præcipue de *lumine* et *coloribus* sermo recurrit. circa naturam luminis explicandam varias iterum offendimus hypothes, præprimis Cartesii, Gassendi, et Newtoni. Mihi tamen

LVIII. Præplacet illorum opinio, qui lucem primitivam in concitato, et



celerrimo motu vibratorio minimarum partium corporis lucidi : derivativam vero in eodem motu, et pressione rectilinea fluidi ætherei a motu corporis lucidi profecta, repositam esse volunt.

Ad illustrandam hanc de lumine pertractationem pertinet quoque discussio de luminis *propagatione*, varia *reflexione*, et *refractione*, corporumque *diaphaneitate*. Leges autem, quæ ad Opticam, Catoptricam, et Dioptricam pertinent, melius in Physica particulari referuntur, cum de visu, et visione mentio fiet.

Corpus autem nullum oculis revera conspicuum esse potest, nisi in illo eiusmodi detur affectio, per quam organum visus ad percipiendum determinatur. Hæc vero affectio *color* dicitur, qui ipsum corpus *coloratum* denominat. Color alius est *fundamentalis*, alius *formalis*, *permanens*, *transiens*, *extremus*, *medius* &c. circa eorum tamen naturam exponendam multum laborarunt Viri eruditissimi varias condendo hypotheses: mihi interea placuit statuere,

LIX. Colorem fundamentalem obiecti permanenter, aut transeunter colorati consistere in certa corporis texture: formalem vero haberi per lumen modificatum.

LX. Idem quoque sentio de coloribus extremis.

LXI.

LXI. Pro determinandis autem coloribus intermediis vix sufficere arbitror hypothesen Hon. Fabri, Cartesii, et Newtoni (*).

LXII. Simplicior tamen, faciliorque apparet ratio explicandi colores intermedios per varimodam radiorum luminis vibrationem: quamvis decerni vix possit, qualis esse debeat in singulis coloribus vibrationis modus.

Qualitates *odoribiles* illas vocamus, quæ corpus odorum efficiunt, quod dein olfactus organo adhibitum in illo odoris sensationem elicit. *Odorem* vero non nisi per effluvia particularum corporis odori diffundi, experientia docemur. sunt tamen istæ particulæ potissimum salino-sulphuræ, quæ dein aëris alluvio a corporibus odoriferis abreptæ organum odoratus impellunt.

Qualitates tandem *gustuosæ* illæ censentur, quæ corpus sapidum efficiunt, quod postea linguæ impositum, ac salivæ beneficio dissolutum sensationem *saporis* in organo gustus excitat. Hinc tamen sapor habetur per particulas præcipue salinas diversa magnitudine, figura, multitudine, et motu præditas.

K 3

Huc

(*) Cuivis interea liberum permittitur tantorum Philosophorum hypothesen ad crisin vocare. Præsentem vero de coloribus materiam prorsus absorbentem esse nemo facile diffitebitur: adeoque suo quilibet consulat genio, et ingenio.



Huc referri quoque meretur disquisitio de illis qualitatibus, quas antiquiores *occultas* nuncupavere: ut erant *virtus magnetica*, et *electrica* (*), *affectus sympathetici*, et *antipathetici*, *vires venenorum*, *alexipharma-
corum*, *medicamentorum* &c. at nihil profecto obesse censeo, quo minus dictæ qualitates a diversa iterum corporis dispositione, motu, profluvio substantiali &c. repeti possint. Non nulli quoque occultis qualitatibus associant percelebrem hac ætate Newtoni *vim attrahentem*, et *repellentem*, licet eam prodigiosus hic Philosophus solum inter naturæ phænomena referat. quo tamen iure id faciant? aliorum esto iudicium: mihi sufficiat, atefati Viri summam in rebus physicis, ac præcipue mathematicis perspicaciam tacita admiratione devenerari posse.

§. III.

DE DYNAMICA

five

Doctrina de viribus Corporis physici.

Corpus physicum ex moleculis minimorum physico-
rum activorum aggregatum esse in Somatologia dictum est (**). Non abs re igitur aliqua saltem eidem activitas attribuenda est; quæ tamen in motu constituitur, aut nisu ad motum. Porro hæc activitas a vi quadam motrice corporum descendit, quæ singulis rebus materialibus cum simplicibus, tum compositis in ipsa rerum genesi ab authore naturæ indita esse concipitur. Vestigia tantæ virtutis deprehendimus non solum in iugi *motu intestino* corporum transpirantium, fermentantium, putrescen-

(*) De his in sequenti sectione sermo redibit.

(**) Posit. XLVIII.

trescentium &c. sed insuper in ipso eorum *motu locali*: dum corpora semel ad motum determinata non minus de loco in locum peregrinantur, sed et in obvia quæque agunt, ac ad similem motum determinant. Hæc tamen ad motum determinatio seu

LXIII. Motus inchoatus dependet a substantia spiritali immediate, et non nunquam ab æthereo fluido vi motrice imbuto.

Hæc vis, si actu diversas mutationes caussat, *motrix*, si vero mutationibus resistit, *vis inertiae* nuncupatur; atque ob diversum exercitium virium suarum modo *viva*, modo *mortua*, *centripeta*, *centrifuga* &c. audit. Nequit insuper ex aliis corporum affectionibus derivari: adeoque

LXIV. Vis inertiae est positiva, et distincta corporum proprietas, in qua potius reliquæ eorum proprietates fundantur.

Princeps illius munus est, ut corpus in obtento statu seu motus, seu quietis conservare nitatur. Experimur etenim corpus quodpiam in quiete positum resistere motioni extrinsecus advenienti; et si aliquando motum susceperit, non tantum in obvia agere obstacula, sed et celeriori motioni reluctari. Congrue igitur non in impetu accidentali Peripateticorum, non in æeris recurso, neque in passiva corporis indifferentia, sed

LXV. Omnis motus continuati causa in laudata vi inertiae collocanda est.



§. III.

DE PHORONOMIA

five

De motu locali corporis physici.

Per motum localem intelligitur *continua, et successiva loci mutatio*: dum nimirum mobile corpus (cuius *mobilitas* in finitudine vis inertiae ponitur constituta) ex uno loco in alium transit: ut adeo etiam supernaturaliter impossibile videatur, idem corpus eodem tempore in duplici simul loco existere.

LXVI. Implicat igitur corporum replicatio.

Ad hanc mutationem subeundam prævie in quolibet corpore requiritur determinatio quædam, seu impulsus, ac *impetus* a potentia motrice procedens; cuius tamen natura hodieum ignoratur. Iuxta hanc determinationem corpus tamdiu perseverat in motu æquabili, donec per medium aliquod resistens (dantur autem varia motus impedimenta) statum suum immutare cogatur, hinc etiam

LXVII. Omnia gravia medio non obstante æquabiliter deorsum moventur.

In omni motu locali præprimis attendendum est ad corporis *massam, momentum motus, eiusdemque celeritatem* relate ad *tempus, et spatia percursa*. qua de re leges variæ sunt recensendæ pro determinanda corporis moti celeritate, ac motus quantitate. Motus tamen omnis aut æquabilis est, aut acceleratus, vel retardatus; ubi præ-



præcipue' notanda venit proportio accelerationis, aut retardationis. nam

LXVIII. Gravia libere descendencia motum suum accelerant uniformiter in proportionem arithmetica secundum numeros impares 1. 3. 5. 7. &c.

Diversæ motuum species ex numero, et varietate directionum, aut determinationum suboriuntur. hinc alius motus est *simplex*, alius *compositus*, *refractus*, aut *reflexus*. Posterior hic, nempe

LXIX. Motus reflexus non a sola determinationis mutatione: sed vel maxime ab elatere corporis aut reflexi, aut reflectentis, aut ab utroque simul repetendus est.

Omnes tamen hæc motuum species, siue deinceps collisione corporum elasticorum, seu minus elasticorum oriantur, certis alligatæ sunt legibus, quas non modo physicorum sagacitas, sed et palpabilis experientia civitate donavit.

Hunc motum localem corporum *Mechanica* per diversas machinas artificiose non minus, quam mirifice promovet. eiusmodi machinæ sunt varii generis *vestes*, *axis in Peritrochio*, *glossocomum*, *trochlea*, *planum inclinatum*, *cuneus*, et *cochlea*. quis usus, quæve vires ad huiusmodi instrumenta requirantur non nisi succincte expendendum est,



§. V.

D E S T A T I C A

five

Doctrina de quiete, et æquilibrio corporum.

Statica corporum æquilibrium pertractat, per quod corpora ob æqualem nisum, et renisum quasi quiescere advertimus. Bifariam dividi solet hæc scientia: nimirum in *Geostaticam*, et *Hydrostaticam*. hæc fluidorum, illa solidorum æquilibrium discutit. observando solidorum æquilibrium commode infervit *Bilanz*, et *Statera*: in utraque tamen machina sedulo comparanda est ponderum æqualitas, aut inæqualitas, et distantia eorundem ab hypomochlio, seu communi sustentationis puncto, prout nempe *staticæ leges* exigunt.

LXX. Solida autem tunc in æquilibrium consistere dicuntur: quando eorum massæ, et celeritates reciprocant, cum hac ratione vires respectivæ æquales evadunt (*).

Fluida quoque omnia sibi relicta sua sponte *ad libellam* se componunt. Ut autem eorum quies exacte deprehendatur, considerata venit eorum homogeneitas, et heterogeneitas, vasorumque, quibus continentur amplitudo, ac diversitas. Aptissima tamen pro librandis
fluidis

(*) Superessent equidem multæ adhuc subtilitates, quæ tamen magis Mathesin sapiunt, adeoque secure abesse possunt a Philosopho Religioso.

fluidis vasa esse censentur *Tubi communicantes* cuiuscumque Perimetri, aut figuræ.

LXXI. In his fluida homogenea ad libellam consistunt, si eadem est utrinque altitudo perpendicularis. Heterogena vero, quando reciprocam altitudinis, et gravitatis specificæ ^{rationem} advertimus.

LXXII. Causa decretoria æquilibrii huius videtur esse æqualitas virium directe in se agentium dependens a liquorum gravitate, et altitudine.

Huc referri insuper possunt phænomena ascensus, et descensus liquidorum in *tubis capillaribus*, et quædam *Hydraulicæ principia*, quibus liquidorum motus per *lumina* examinatur: quem in finem varii canones motuum pro luminum, vasorumque diversitate in iis statui possunt.

LXXIII. Solida quoque fluidis immersa cum iisdem libellam servant.

Contingit tamen in eiusmodi statu quietis, ut solidum fluido immissum eousque mergatur; donec fluidi volumen sit solido in ratione ponderis æquale. Et, ut solidum immissum tantam sui ponderis partem quoad sensum amittat, quanti ponderis est fluidi volumen exclusum. Utroque hoc principio innumera propemodum phænomena explicantur, quæ in concursu Geo- et Hydrostaticæ explorata habentur.



SECTIO SECUNDA

COMPLECTENS

PHYSICAM PARTICULAREM.

Præcipuum Physicæ particularis munus est corpora physica in specie considerare, quæcunque in hoc universo existant. qualia sunt in primis mundus ipse, dein corpora quævis cœlestia, elementaria, et terrestria; inter quæ præcipue numerantur corpora humana, beluina, et plantæ. iuxta hanc igitur corporum seriem, ordo quoque Physicæ particularis instituendus est.

§. I.

DE COSMOLOGIA

five

Doctrina de Corpore mundano.

Mundum si metaphysice spectamus, dicitur ille *compages apte conciliata, concinnoque ordine digesta rerum omnium, quæ sub cælo, et terra continentur.* Partes illius sunt materiales et immateriales, fluidæ, ac solidæ, lucidæ, et opacæ. In destinanda eiusdem essentia turpiter hallucinati sunt Platonici, Pythagorici, et cum Bened. Spinoza Pantheistæ omnes. melius itaque

LXXIV. Mundus dicitur ens compositum, cuius essentia sita est in modo, quo ipsius partes, res nimirum simultaneæ, et successivæ inter se sociantur.

LXXV.

LXXV. Est ex nihilo productus, ideoque nulla ratione æternus: sed cum, et in tempore cepit existere.

LXXVI. Datur tamen in hac providentia non nisi unicus, qui licet perfectissimus non sit, materialiter tamen, formaliterque perfectus est. Plures vero mundos non nisi sub certa restrictione possibiles esse arbitror.

Minime hic a re alienum erit, si quædam animadversiones adiicerentur *de origine, ætate et interitu mundi* velut breve quoddam eruditionis adminiculum.

Mundum si physice contemplamur, per eum intelligimus compagem cœli, terræ, aquæ, ac omnium corporum in iis existentium coordinationem. Huius vero mundi ut ordinem, dispositionemque in explicandis eiusdem phænomenis perspectam habeamus, ad generalia quædam Systemata confugiendum est: inter quæ notiora censentur systema *Ptolemaicum, Tychonicum, et Copernicanum.*

LXXVII. Ptolemaicum mundi systema nulla ratione sustineri potest.

LXXVIII. Tychonicum autem, licet impeditum, et naturæ simplicitati minus conforme videatur, conciliari adhuc



adhuc potest cum Physicæ legibus, et Astronomiæ phænomenis.

LXXIX. Copernicanum tandem simplicitati naturæ legibusque Astronomiæ, ac Physicæ conforme esse videtur.

LXXX. Ideoque reliquis etiam ut Thesis tamdiu præferendum est, usque clare ostensum fuerit S. Scripturam aperte refragari, et e diametro oppositam esse (*).

Ad aliquam saltem mundi ideam configurandam utuntur Cosmographi triplici præcipue machina, *Sphæra* nimi-

(*) Dixi quidem, ut thesin esse systema hoc assumendum; nempe quatenus cum phænomenis physicis, et astronomicis conciliari valet: hæc vero thesis minime gentium dogmatica est, ita ut certitudine fidei constet; quod nec ipse Nicol. Copernicus intendit. neque etiam ipsa S. scriptura in ratione observationum naturalium eidem opposita esse censenda est, cum integra hæc sententia dogma nullum respiciat; nisi crinibus tortis ad tale torqueatur, ut perbene advertit Cl. P. Udalricus Weis in sæpe laudato opere de emendatione humani intellectus. mirari itaque satis nequeo, literatissimos etiam Viros quosdam ea Religione duci, ut Copernicanum systema non nisi ut hypothese defendere audent, cum tamen nec minima pars Religionis christianæ sit: terram aut moveri, aut immobilem consistere. alias enim integram quæstionem altioris fori esse continuo iudicarem, ut adeo intellectus humanus in obsequium fidei captivandus foret. Ita quidem ego censeo, sed salva Fidei autoritate aliorumque Eruditorum opinione meliori.



nimirum *armillari*, *terrestri*, et *cœlesti*: quarum prior globum cœlestem unacum terraqua simul repræsentat: reliquæ autem globum quemlibet in specie. Ex machinis hisce, factisque extrema sollicitudine observationibus inferri facile potest.

LXXXI. Mundum totum physice consideratum, ipsamque terraquam non quidem mathematicæ, sed physice, seu ad sensum rotundam esse.

Plurimum sane utilitatis offertur tyronibus, si in præsentî negotio quædam *Principia Geographica* insinuentur, quæ nimirum ad usum Sphæræ Geographicæ deservire possint. cum eiusmodi instructio iucunda non minus, quam perutilis est. interea cum terraquæ configurationem ad sensum rotundam esse constat, sane

LXXXII. Antiquiores absque sufficienti ratione negarunt dari Antipodas.

§. II.

DE URANOLOGIA

sive

Doctrina de corporibus cœlestibus.

Spatium illud, in quo corpora cœlestia hospitantur *cælum* dicitur, illudque vel *Empyreum* est (de quo tamen Philosophis sermo nullus) aliud *sydereum*, in quo stellæ fixæ, et Planetæ morantur.

LXXXIII.



LXXXIII. Cœlum tamen Planetarum non minus, ac fixarum solidum non est, sed cumprimis fluidum.

Inter ipsa corpora cœlestia primo occurrunt *stellæ fixæ* quarum numerus et magnitudo, ob diversitatem, aut defectum *Parallaxeos* varia quoque est. Præter *stellas fixas* deprehenderunt insuper Astrologi alias *temporarias*, inter quas reputant *Cometas*.

LXXXIV. Falluntur igitur, qui *Cometas* ex vaporibus terreis in sublime elatis, et accensis, vel etiam ex effluviis corporum cœlestium, aut plurium stellularum unione componi arbitrantur.

LXXXV. *Cometæ* igitur sunt corpora cœlestia in *Cosmogonia* simul cum reliquis astris condita, certa constantique periodo peculiare orbitas describentia.

In cœlo Planetario illustrissimum sydus est *Sol.* sed neque hoc a maculis immune esse deprehendit *Scheinerus*, *Galilæus*.

LXXXVI. Hæ tamen maculæ neque sunt stellularum congeries, nec corpora solida substantiæ solari innatantia: sed pro-

probabilius sunt vapores, et fuligines ex æstuario oceani solaris erumpentes, et nubium instar condensatæ.

Solem sequuntur reliqui Planetæ: *Luna*, *Venus*, *Mars*, *Mercurius*, *Iupiter*, et *Saturnus*, qui sunt corpora sphærica lumine plerumque e sole mutuato splendentia. de stellis istis notari meretur eorum cursus seu periodicus, seu annuus &c. luminisque defectus, quem *Eclipsin* vocamus.

LXXXVII. Dari in Planetis incolas absque sufficienti quidem ratione non negatur: illorum tamen possibilitas ratione sufficienti non caret.

LXXXVIII. Omnia vero astra non quidem ab Intelligentiis moventur: illorum tamen vis motrix bene repetitur a viribus centralibus.

LXXXIX. Astra quoque in corpora sublunaria non nisi actione luminis, aut caloris influere posse contra Astrologos iudiciarios plus quam certum est.



§. III.

DE STOECIOLOGIA

five

Doctrina de corporibus Elementaribus.

Stoechiologia quadrifariam dispescitur, in *Pyrologiam* nimirum, seu sermonem de igne, *aërologiam*, de aëre, *Hydrologiam* de aqua, et *Geologiam* de terra. cuiuslibet dissertationi commodè inseri potest *appendix meteorologica*, quæ meteora seu *hypostatica*, seu *emphatica* cuiuslibet Elemento convenientia suggerat.

Ignis igitur est substantia ætherea, quæ modo illuminat, modo calefacit, si nimirum requisitis motibus agitata fuerit: modo etiam, si particulis oleosis coniuncta fuerit, *flammam* efficit. ignis alius est *usualis*, alius *electricus*, cuius effectus præcipui sunt *attractio*, *repulsio*, *phosphorescentia*, et *succussio*. Horum effectuum causa adeo intricata est, ut vix certo determinari queat. liceat tamen mihi illis assentiri, qui asserunt:

XC. Virtutem electricam oriri a subtilissimis, elasticisque corporis electrici moleculis, quæ affrictu provocatæ ipsius atmosphæram commovent, rarefaciunt, inque aërem obnitentem, aut atmosphæram vicinorum corporum incurrentes vel reperiuntur, vel ipsa sub-

fubeunt, aliasque homogeneas ibidem particulas pari motu exagitant (*).

Meteoris igneis accensetur *Fulgur*, *Tonitru*, *Fulmen*, quod tamen non est lapis, ut vulgus existimat, sed exhalatio nitro-sulphurea, ac bituminosa interdum circa telluris superficiem, plerumque vero in nubibus mutua collisione accensa. Huc pertinent quoque *stellæ præcipites*, *volantes*, *transcurrentes*, *trabs*, *columna*, *pyramis*, *draco*, *clypeus*, *capra saltans*, *ignes terra*, *marique ambulantes*, *aurora*, *lux crepera*, *lumen zodiacale*, et *aurora borealis*: de qua tamen liberum cuilibet erit sentire, quæcunque in tanta materiæ subtilitate, et sententiarum diversitate sibi magis placere deprehenderit.

Aër est corpus fluidum, subtile admodum, grave, porosum, et constanter elasticum, et licet corpusculis heterogeneis undequaque refertus sit, simplex tamen est elementum. tota aëris tellurem ambientis undique massa unacum particulis heterogeneis, quæ per sursum evectos *vapores*, et *exhalationes* aëri permiscentur, *terrestris atmosphæra* dicitur: cuius tamen altitudinem certo determinare nequeunt Physici. aërem si artificialiter consideramus, plurimæ oculis nostris occurrunt machinæ, in quibus is ipse gravitate sua, et elasticitate mirificos prorsus effectus causat. Hinc

XCI. Phænomena Tubi Torricelliani, seu Barometri, Antliæ Pnevmaticæ,

L 2

Aspi-

(*) Si machinam electricam tyrones ad manus habent, singula quoque, notatuque digniora experimenta petentibus ostendant, et cuiusvis effectus rationem clare proponant. ego saltem hæc methodo usus fui.



Aspirantis, et Syringis, dæmunculorum Carthesianorum, Siphonum &c. per aëris gravis ac elastici pressionem explicari possunt (*).

XCII. Non tamen diffractio lacrymarum Batavicarum, aut phialarum Bononiensium.

Inter meteora aëris hypostatica numeratur *ventus*, qui tamen ob qualitates suas, temporum vicissitudines, regionumque, ex quibus proruit, genium varia nomina fortitur, diversosque caussat effectus.

XCIII. Origo ventorum habetur ex iis caussis, quæ motum, aut fluxum aëris efficere, atque æquilibrium atmosphæræ turbare valent.

Inter meteora aëris emphatica *Halo* circa lunam et solem, *Parhelion*, seu mentita solis imago. *Paraselene*. namque

Interdum in tenebris duplicatam est cernere Lunam. Virgæ, Vorago, seu *Chasma*. ac tandem *Iris* ~~recongescit~~

Aqua est corpus fluidum, pellucidum, odoris, saporis, et coloris expers. præcipue in septem distribuitur classes; nimirum in *marinam*, *fluvialem*, *fontanam*, *putealem*, *pluvialem*, *paludosam*, et *mineralem*, quæ interdum virtute medica aut petrefactoria prædita est.

Præ-

(*) Experimenta pariter Antliæ pnevmaticæ, a celeberrimo D. Brandtner Mechanico Augustano adornatæ in Musæo nostro indies spectanda sunt.

Præter maris amaritiem et falsedinem singulari attentione dignus est eiusdem varius motus, ac præpripriis æstus, seu intumescencia et detumescencia eiusdem. In assignandis huius æstus causis irritò ferme conatu hucusque laboratum est. Neque antiquis phænomenon hoc ignotum fuisse testatur ipse Lucanus, cum cecinit (*):

- - - - - *an sydere mota secundo*
Thetyos unda vagæ lunaribus æstuet horis,
Flammiger an Titan ut alentes hauriat undas,
erigat oceanum, fluctusque ad sydera tollat?
querite, quos agitat mundi labor.

In tanta rerum incertitudine denuo placuit mihi ad singulare quoddam systema convolare, quod tamen placitis Cl. Kircheri, et P. Kehl attemperavi. Dico enim:

XCIV. Æstus maris est diversorum marium per varios canales, et meatus inter se communicantium ingurgitatio, et regurgitatio: ita, ut dum hi canales aquas ingurgitant, dabitur refluxus, et si regurgitant dabitur affluxus.

XCV. Causa tamen continuæ in - et regurgitationis cum regularis, tum irregularis videtur probabilius esse materia gravifica oceani aquis incumbens, ac pro varia actione lunæ interpositæ, vel ventorum periodicorum seu constantium,



tium, seu inconstantium diversimode premens, et ad iugem motum in- et regurgitationis determinans.

XCVI. Fontium tamen, ac fluviorum origo haberi potest partim a mari, ut plurimum vero ex pluviis, nivibusque solutis.

Meteoris aqueis accensentur *nubes*, et *nebulae*, *pluviae*, interdum prorsus mirabiles, *nix*, *grando*, *ros*, *manna*, *aura serotina*, et *pruina*.

Terra est corpus fossile, simplex, durum, friabile, in igne fixum, nec fluens, nec in aqua dissolvi potens. partes illius gaudent diversa figura, colore, et qualitate, pro varietate nimirum particularum invicem permixtarum. Inter has partes magis sunt conspicuae *Montes*, diversae altitudinis, et affectionis.

XCVII. Montium origo ab ipsa globi terraquei genesi repetenda est: licet post cataclysmum non nulli montes recenter emerferint.

Ad exteriorem quoque terrae faciem pertinent lapides, sicut variae figurae, et coloris, ita diversae hinc inde virtutis, prout manifesto experimento in *Magnetis* discimus, cuius *directio*, *tractio*, et virtutis attractivae ac directivae communicatio vix non captum humanum excedere videtur.

XCVIII. Ad ista Magnetis phaenomena explicanda hypothesis illa, quae
ad

ad effluvia magnetica recurrit, sufficere deprehenditur.

Interiorem terræ faciem exornant *succi minerales* varii generis et virtutis, et *metalla* mira prorsus genesi in terræ visceribus efformata. Talia vero dividuntur in perfecta, et imperfecta, cuncta tamen splendore, et gravitate exsuperat *Aurum*. Confectio pretiosi huius metalli extra terræ viscera, res est imposturis obvia, et referta,

XCIX. Ipsa tamen Chrysopoeia sine sufficienti ratione velut impossibilis reii-citur.

Phænomen illud triste, quod præsentī seculo adeo frequens fuit, et *motum terræ* nuncupare solemus, triplici modo contingit: nimirum *pulsu*, *tremore*, et *inclinatione*. Causa pariter eiusdem triplex esse adstruitur: aër videlicet, aqua,

C. Præcipua tamen sunt ignes subterranei, facta nimirum subitanea materiæ sulphuræ, bituminosæ, ac nitrosæ inflammatione.

§. IV.

DE ANTHROPOLOGIA.

sive

Doctrina de Corpore Humano.

Humanum Corpus est mirabilis illa membrorum compages, quam summus rerum omnium artifex DEUS animæ immortalī sociam addidit, ut eius admi-



niculo actiones ad æternæ beatitudinis negotium pertinentes elicere valeat. Hoc ipsum corpus in tres regiones dispescitur: *caput* videlicet, *truncum*, et *artus*. Partes corporis in his regionibus dispositæ sunt vel *solidæ*, (quas *Osteologia*, et *Neurologia* enumerat) vel *fluidæ* dicuntur, quales sunt *sanguis*, et *fluor nervosus*. utriusque augmentum deducitur ex *chylo*, et *hæmatosi*. Etsi vero ipse sanguis non vivat,

CI. Perpetua tamen circulatione per totum corpus diffunditur.

Organa, quæ in corpore humano offendimus, aut sensationi internæ, aut externæ famulantur. sic organum *tactus* externum sunt nerveæ, et pyramidales papillulæ ex cute erumpentes, et versus cuticulam assurgentes. organum *gustus* sunt papillulæ conicæ ex lingua assurgentes. organum *olfactus* est membrana narium exilissimis papillis instructa. organum *auditus* constituit tenuis membrana *cochleæ* subtenfa. *visus* tandem organum est oculus, et quidem cum Scheinero dicimus:

CII. Visionem fieri in retina oculi.

Periucundæ huic disquisitioni utiliter adiunguntur *leges* visionis directæ, reflexæ, et refractæ, seu *opticæ*, *catoptricæ*, et *dioptricæ*.

Per sensus internos intelligitur potentia sensitiva in partibus internis residens, potensque elicere cognitiones materiales dependenter ab organis internis. sensus internus triplex plerumque assignatur: nimirum *communis*, *phantasia*, et *memoria*. his ego quoque adnumero *vim motricem*, quam dari in quovis corpore humano manifesta evincit experientia. status, in quibus sensus tam in- quam externi constituti esse noscuntur tempore actionis, et perceptionis, sunt *vigilia*, et *somnus*.

somnus. Organum quoque, quod omnium sensuum internorum sedes sit, a R.R. bus unanimiter dicitur esse *callosa cerebri substantia.*

CIII. In eadem quoque cerebri parte mentis humanæ sedem figimus : ut adeo opus haud sit, ad definitivam per totum corpus diffusionem, recurrere.

Corpus itaque humanum tam nobili organorum apparatu instructum unitam sibi habet formam informantem seu animam ; ita quidem ut *unio*, quæ inter utrumque datur, sit vera et proprie dicta unio constans ex complexo mutuae exigentiæ, proportionis, coexistentiæ cum impedimentorum negatione. qua posita unione facile eruitur contra Monistas seu ideales, seu materiales:

CIV. Dari in nobis verum aliquod commercium corpus inter, et animam.

Huic tamen explicando nec *systema causarum occasionalium*, nec *harmoniae præstabilitæ* par est. Imo quamvis hypothesis Cl. P. Tournemine perquam ingeniosa est, verique speciem præ se fert : attamen præplacet *systema*, quod vocant, *influxus physici* saltem quoad substantiam. ut adeo

CV. Anima agat in corpus ; et vicissim corpus in animam, licet modus, quo utrumque contingit, nos lateat.

Anthropologiæ subiungi possunt geminæ dissertationes de *corpore brutorum* seu perfectorum, seu imperfectorum et de *organizatione plantarum*. In priori enumerari merentur species animalium volatilium, aquatilium,



terrestrium, bipedum, quadrupedum, insectorum &c. omnia tamen breviter expediantur, cum fusior pertractatio ad Historicos naturales potius respicit. In posteriori vero, cum hodierno ævo inter omnes phycos constans opinio dominetur: *Plantas non vivere vita proprie tali.* succincta descriptio fieri potest de Plantarum anatomia, origine, propagatione, nutritione, et augmento, divisione, viribusque præcipuis, ac qualitatibus, ac tandem de eorumdem morbis ac interitu. uberior discussio illis relinquenda est, qui Botanicæ, aut Pythologiæ ex professo insudant. Ex utraque tamen hac dissertatione ad denique concludendum restat:

CVI. Nec animalia, nec plantas cuiuscumque generis, et speciei absque semine nasci.

Mare magnum profecto, et spatiosum nimis ingrederemur, si singulas physicæ partes pro materiæ multitudinis, fecunditate, et gravitate explanare contenderemus. At cum temporis angustia plerumque docentem, et discipulum obruant; hæc interea sufficere possunt. uberiora autem desiderantibus plura suppeditabunt Authores impressi, qui singulas Physicæ materias fusiori calamo excolere assueverunt. Ex his ego quoque quamplurima, nempe quæ utilia et necessaria scitu iudicaveram, decerpere curavi: quos inter numero: Newtonum, Muschenbroeckium, Boscovich, de Lannis, Kircherum, Schottum, Iasinsky, Biwald, Max. Mangold, Krüz, Osterrieder, Euler, Fränklin, Gordon, Hauksbée, Winkler, aliosque, qui forsan tenebris meis lumen affundere possunt; si benevolo lectori ipsorum opera adire placuerit.

SYSTEMATIS
PROBLEMATICI
PARS QUARTA

COMPLECTENS
ETHICAM.

SYSTEMATIS

PROBLEMATICI

PARS QUARTA

COMPLETUS

E. T. H. I. C. A. M.



Ethica est Scientia practica, quæ voluntatis actus considerat, quatenus illi honestatis legibus conformati ad æternam hominis felicitatem diriguntur. Ad hanc scientiam rite penetrandam inprimis considerari oportet naturam hominis moraliter considerati, tum in ordine ad mentem, ac ipsum corpus. ubi largior sermo fieri poterit de passionibus, affectibus, et habitibus moribus, vitiis, eorumque characteribus iuxta cuiusvis hominis temperamentum.

Inde transgredi licet ad varia officia, quibus erga DEUM, proximum, ac nosmetipsos obligamur. Ubi Magistris pronum erit, eandem doctrinam ad statum religiosum sobrie applicare. Discussio tamen de actibus humanis aut omnino transmittenda, vel non nisi breviter perstringenda est: cum in theologia morali fusius de iisdem agatur.

Ab actibus humanis ad eorum finem divertendum est. ubi inprimis notiones *boni* et *mali* explanentur, et tandem de *summo Bono* sermo instituatur, et tandem concludatur:

CVII. Finem hominis non in beatitudine solum naturali, sed supernaturali repositum esse.

Cumque finis iste solus DEUS sit, dignus utique erit omni amore, obsequio, ac servitute: quæ peculiaris
ris



ris ratio DEUM colendi *Religio* nuncupatur. Et hæc vel *naturalis*, vel *revelata* est.

CVIII. In præfenti tamen rerum ftatu divinæ providentiæ admodum contentaneum eft, præter religionem naturalem, revelatam quoque dari.

CIX. Prætenfa tamen religionis Avtonomia, quam multis conatibus inducere laborant noftorum temporum Statiftæ, nulla ratione fufiinenda eft.

CX. Sola igitur religio revelata Chriftiano-Catholica firmiter tenenda, et fanguine propugnanda eft.

Media, quæ nos in confecutione finis ultimi adiuvere poffunt, præcipua funt *Leges*, quæ confiderari poffunt velut *regula honeftatis* actuum noftorum ad æternam beatitatem conducentium; et tandem *fui ipfius cognitio*. qua adepta continuo verum emendationis confilium arripiendum eft, ut declinare a vitiis difcamus, nosque exercitio virtutum pro viribus addicemus. atque ideo continuo oportet nos ad luctam adverfus vitia, malasque propenfiones paratos effe.

Alia, quæ fufius alii in præfentiarum pertractanda fufcipiunt, commode præmitti poffunt aut tempore tyrocinii Religiofi, vel potius in Theologia morali, ac iurifprudentiæ facræ curriculo fuppleri poffunt. Hæc ta-
men

men dicta tanquam Elementa Ethicæ sufficient: ulterio-
ra suppeditabunt Heineccius, Corfinus, Pourchotius,
Du Hamel, P. Sympertus Schwarzhuber, P. Otto Ai-
cher, pluresque alii. Mihi interea sit satis, et utilitati,
et brevitati, et levitati docentium et discientium in
asceteriis monasticis consuluisse. quod

Si qua meo fuerint, ut erunt vitiosa libello,
excusata suo tempore Lector habe (*):

Nemo enim vitiis sine nascitur. merebitur itaque auda-
cia veniam, si exigua hæc opella offendat Virorum Eru-
ditorum oculos: volui enim utilis esse. in magnis
autem voluisse fat est.

(*) Ovid. l. IV. Trist. eleg. I.

Ut In Omnibus Glorificetur
DEUS.



* * *

Ohe! iam satis est, ohe libelle!
iam pervenimus usque ad umbilicos.
Tu procedere adhuc, et ire quæris,
nec summa potes in scheda teneri?
sic tanquam tibi res peracta non sit,
quæ prima quoque pagina peracta est?
Ohe iam satis est, ohe libelle!

MART. *Epig. l. IV. n. 89.*

* * *

Menda.

Emenda.

pag.	lin.		
22	16	restinquant	restinguant
23	12	sibi	tibi
27	12	primam	primum
33	24	patentissima caussa matrix	potentissima caussa motrix
ibid.	30	protenus	protinus
34	13	abruere	obruere
35	2	via	vias
38	24	innotum	innatum
43	31	unquem	unguem
51	2	profitemur, incon- gruos	profitemur, maiesta- ti incongruos
63	14	affectui	effectui
ibid.	28	quo	qua
68	14	fuscipit	fuscipiat
71	29	reducere	deducere
72	16	cetibus	coetibus
76	32	eo modo	ea modo
79	10	methodus istius	methodi istius
80	3	Præmicondi	Promicondi
84	19	illum	illud
88	12	quam	quem
91	14	suapte	suopte
95	10	curiose	curiosæ
102	8	Si sub hac defini- tione	Sub hac definitione
108	13	quædam Characte- res	quidam Characte- res
ibid.	15	hæ autem	hi autem
ibid.	16	sumtæ	sumti
ibid.	17	quarum	quorum
109	22	subtilitatis	subtilitates

119	25	nisi inanibus	nisi in inanibus
142	21	indicitur	inducitur
148	24	textum	textura
155	7	specificæ adverti- mus	specificæ rationem advertimus
160	21	Galilæus	<i>addatur</i> &c.
162	21	incurrenter	incurrentes
165	2	attentione	attentione
ibid.	ib.	variis	varius

Reliqua menda tam in vocabulis , quam interpunctionibus occurrentia benevola Lectoris discretio emendare poterit ; quæ forsan ipfismet , ob temporis inopiam emendaturus , si licuisset , eram.



Wurzer, Balduin

Balduini Wurzer Philosophia regularis sive systema problematicum de
philosophia in asceteriis regularibus tradenda cui insertae sunt
positiones ex universa philosophia

Ratisbonae 1769

Bamberg, Staatsbibliothek -- Ph.o.980
urn:nbn:de:bvb:12-bsb11761380-9
VD18 12435627-001